

## **OFISI YA MASOMO**



**MAJILIO NA NOELI**

## **JUMA LA KWANZA LA MAJILIO**

### **DOMINIKA YA KWANZA YA MAJILIO**

**SOMO LA KWANZA:** Isa 1,1-18

Kiitikizano:

Isa 1,16,18.17

**K.** Jiosheni, jitakaseni, uondoeni uovu wa matendo yenu usiwe mbele ya macho yangu. \* Dhambi zenu zijapokuwa nyekundu sana, zitakuwa nyeupe kama theluji.

**W.** Acheni kutenda mabaya, jifunzeni kutenda mema, tafuteni haki:

**K.** dhambi zenu zijapokuwa nyekundu sana, zitakuwa nyeupe kama theluji.

**SOMO LA PILI:**

Toka “Katekesi” za mt. Sirilo wa Yerusalemu, askofu.

#### *Majilio mawili ya Kristo*

Sisi twatangaza kwamba Kristo atakuja. Naam, ujio wake si mmoja tu, bali upo wa pili, ambao utakuwa wa utukufu zaidi kuliko ule uliotangulia. Naam, wa kwanza ulikuwa na muhuri wa mateso, mwingine utabeba taji la ufalme wa kimungu. Twaweza kusema kwamba karibu daima kila tukio katika Bwana wetu Yesu Kristo ni maradufu. Maradufu ni uzazi, mmoja kwa Mungu Baba, kabla ya nyakati, na mwingine uzazi wa kibinadamu, toka bikira kwenye utimilifu wa nyakati.

Kuwili ni kushuka kwake kwenye historia. Mara ya kwanza alikuja kwa namna ya siri na kimya, kama mvua juu ya manyoya. Mara ya pili atakuja wakati ujao kwa utukufu na uangavu mbele ya macho ya wote.

Kwenye ujio wake wa kwanza alifungwa na vitambaa, akawekwa kwenye hori, katika ule wa pili atavaa mwanga kama joho. Kwenye ule wa kwanza alikubali msalaba bila kukataa aibu, katika mwingine, atasonga mbele akisindikizwa na majeshi ya malaika na atajaa utukufu.

Kwa hiyo, tusikubali tu kutafakari ujio wa kwanza, bali tuishi tukitarajia wa pili. Na, kwa kuwa tulishangilia: “Mbarikiwa yeye ajaye kwa jina la Bwana” (Mt 21,9), sifa ile ile tutatangaza katika ule wa pili. Hivyo, tukienda kumlaki Bwana, pamoja na malaika na tukimsujudu, tutaimba: “Mbarikiwa yeye ajaye kwa jina la Bwana” (Mt 21,9).

Mwokozi hatakuja kuhukumiwa tena, bali kuwa hakimu wa wale waliomhukumu. Yeye aliyeniyamaza alipopata hukumu, atawakumbusha wahalifu wale kitendo chao, waliomtesa uchungu wa msalaba na kuwaambia kila mmojawao: “Wewe ulifanya hivi, nami nimenyamaza” (Zab 39,9).

Hapo, katika mpango wa huruma alikuja kuwafunza watu kwa uthabiti mtamu, lakini mwishoni wote, watake wasitake, watapaswa kujitia chini ya utawala wake wa kifalme.

Nabii Malaki atangaza majilio mawili ya Bwana: “Naye Bwana mnayemtafuta atalijilia hekalu lake ghafula” (Mal 3,1). Ndio ujio wa kwanza. Na baadaye, kuhusu ule wa pili, anena: “Angalieni mjumbe wa agano mnayemfurahia, angalieni, anakuja...Ni nani atakayestahimili siku ya kuja kwake? Nani atasimama atakapoonekana yeye? Yeye ni mfano wa moto wa mtu asafishaye fedha, ni mfano wa sabuni ya mtu afuaye nguo. Ataketi kwa kusafisha na kutakasa” (Mal 3,1-3).

Hata Paulo anena juu ya majilio haya mawili akimwandikia Tito hivi: “Neema ya Mungu iwaokoayo wanadamu wote imefunuliwa; nayo yatufundisha kukataa ubaya na tamaa za kidunia, tupate kuishi kwa kiasi, na haki, na utauwa katika ulimwengu huu wa sasa; tukilitazamia tumaini lenye baraka na mafunuo ya utukufu wa Kristo Yesu, Mungu mkuu na Mwokozi wetu”(Tit 2,11-13). Je, waona jinsi alivyonena juu ya ujio wa kwanza akimshukuru Mungu? Bali, juu ya ule wa pili atufahamishwa kwamba ni ule tanaotarajia.

Hii ndiyo imani tunayotangaza: kumwamini Kristo aliyepaa mbinguni na kuketi kuume kwa Baba. Yeye atakuja kwa utukufu kuwahuhumu wazima na wafu. Na ufalme wake hautakuwa na mwisho.

Atakuja, basi, atakuja Bwana wetu Yesu Kristo toka mbinguni; atakuja katika utukufu mwishoni mwa ulimwengu uliombwa, siku ya mwisho. Utakuwepo hapo mwisho wa ulimwengu huu, na kuzaliwa kwa ulimwengu mpya.

#### Kiitikizano:

- K. Natazama toka mbali, ninaona kufika uwezo wa Bwana, kama wingu linalofunika dunia; \* mmwendee mkaseme: Je, ni wewe tunayemgojea, Mfalme wa nyumba ya Israeli?  
 W. Ninyi nyote wakaaji wa dunia, wanadamu, maskini na tajiri pamoja,  
 K. mmwendee mkaseme: Je, ni wewe tunayemgojea, Mfalme wa nyumba ya Israeli?

## JUMATATU YA KWANZA YA MAJILIO

**SOMO LA KWANZA:** Isa 1,21-27; 2,1-5

#### Kiitikizano:

Mik 4,2; Yn 4,25

- K. Njoni, tuende juu mlimani kwa Bwana na nyumbani kwa Mungu wa Yakobo; naye atatufundisha njia zake, \* nasi tutakwenda katika mapito yake.  
 W. Yuaja Masiya (aitwaye Kristo): naye atakapokuja, yeye atatufunulia mambo yote;  
 K. nasi tutakwenda katika mapito yake.

*(Mtu aweza kuchagua kati ya masomo mawili yafuatayo)*

#### **SOMO LA PILI:**

Toka “Hotuba” ya Mt Bernardo, abate.

#### *Zawadi ya Majilio*

Ndugu, mwadhimishe ipasavyo, kwa bidii kuu ya kiroho, Majilio ya Bwana, mkifurahi kwa zawadi mnayofanywa na mkishukuru sana kwa upendo mnaonyeshwa.

Lakini msitafakari tu juu ya ujio wa kwanza wa Bwana, alipoingia ulimwenguni ili kutafuta na kuokoa kilichopotea, bali pia juu ya ule wa pili, atakaporudi ili kutuunganisha naye kwa daima.

Fanyeni lengo la taamuli matembezi maradufu ya Kristo, mkitafakari juu ya yale aliyotujalia katika ule wa kwanza na aliyotuahidi kwa ule wa pili.

“Wakati umefika”, ndugu, “wa hukumu kuanza katika nyumba ya Mungu”(I Pet 4,17). Lakini lipi litakuwa fungu la wale wanaokataa sasa hukumu hiyo? Anayeepa hukumu ya sasa ambamo mkuu wa ulimwengu huu afukuzwa nje, angoje, au, zaidi, aogope Hakimu wa baadaye ambaye atamfukuza nje pamoja na mkuu wake. Bali, ikiwa sisi twajiweka chini ya hakimu mnyofu, tuko salama, na “tunamtazamia Mwokozi Bwana Yesu Kristo, atakayeubadili mwili wetu wa unyonge, upate kufanana na mwili wake wa utukufu” (Flp 3,20b-21). “Ndipo wenye haki watang’aa kama jua katika ufalme wa Baba yao”(Mt 13,43).

“Bwana ataubadili” kwa ujio wake “mwili wetu wa unyonge, upate kufanana na mwili wake wa utukufu” ikiwa tu ataupata umefanywa upya na kulinganishwa moyo wetu na wake katika unyenyekevu. Kwa hiyo anena: “Mjifunze kwangu, kwa kuwa mimi ni mpole na mnyenyekevu wa moyo” (Mt 11,29). Angalia katika maneno haya aina mbili ya unyenyekevu, ule wa ufahamu na ule wa mapenzi. Ule wa mwisho waitwa hapa unyenyekevu wa moyo. Kwa ule wa kwanza twajua

ubatili wetu, kama tuaonavyo tokea mang'amuzi yetu sisi wenyewe na tokea udhaifu wetu. Kwa ule wa pili twakataa utukufu wa bandia wa ulimwengu. Sisi twajifunza unyenyekevu wa moyo toka yule ambaye “alijifanya kuwa hana utukufu, akatwaa namna ya mtumwa” (Flp 2,7), toka yule ambaye alipoombwa kufanywa mfalme, alitoroka; bali alipotafutwa ili kufunikwa na matusi na kuhukumiwa kwa fedheha na mateso ya msalaba, alijitoa kwa hiari yake mwenyewe.

*Au pia:*

Tokea “Nyaraka za kichungaji” za Mt. Karoli Borromeo, askofu.

### *Muda wa Majilio*

Tazameni, wana wapendwa, muda ule maarufu na rasmi hivi. “Muda”, kama anavyosema Roho Mtakatifu, “wa fadhili”. Muda wa wokovu, wa amani, wa upatanisho. Muda ambao, kama ulivyotamaniwa sana hivi na wale mababa wa kale na manabii watakatifu, kama mwishowe kwa furaha kuu ulivyoangaliwa na Simeoni mwenye haki, kama daima ulivyoadhimishwa rasmi na Kanisa takatifu. Hivyo wapaswa kutakatifuzwa nasi kikamilifu, kwa kumsifu na kumshukuru daima Baba wa milele, kwa sababu ya huruma yake isiyopimika katika fumbo la muda huu, yaani katika ujio wa Mwanawe wa pekee, ambaye kwa upendo usiopimika kwetu wadhambi, yeye alimtura ili kutuokoa toka utawala mkatili wa shetani, kutualika mbinguni, kutushirikisha siri za mbinguni, kutuonyesha ukweli, kutufundisha desturi, kupandisha ndani mwetu fadhila, kututajirisha na hazina za neema yake na kutufanya wanawe, warithi na wamiliki wa uzima wa milele.

Wakati Kanisa linapoadhimisha fumbo hili kila mwaka, latushauri kukumbuka daima upendo huo uliotendwa na Mungu rahimu; na pia latufundisha kwamba ujio wa Bwana haukuwa tu kwa wale waliokuwepo wakati ule wa kabla katika ulimwengu alipokuja yeye, ila fadhila yake yabaki daima kwa manufaa yetu sisi bado, ikiwa kwa njia ya imani takatifu na sakramenti za kimungu twataka kupokea neema aliyotuletea na kupanga maisha yetu chini ya utii wake. Lataka pia kwamba twafahamu ya kuwa kama yeye alivyokuja mara moja mwilini ulimwenguni, vile vile, ikiwa kwetu abaki, ni kwa kuja kila saa, kila dakika kuishi kiroho katika nafsi zetu kwa zawadi nyingi.

Kwa hiyo Kanisa, kama mama mtauwa na mwangalifu kwa wokovu wetu, wakati huu mtakatifu, latufundisha kwa tenzi, nyimbo na sauti zingine za Roho mtakatifu na ibada za kifumbo, ili tutambue fadhila kwa roho ya shukrani na tuipokee vizuri na tufanye kwa ujio wa Bwana mioyoni mwetu si maandalizi madogo kuliko tungelifanya angalifika yeye mwenyewe ulimwenguni wala madogo kuliko walivyofanya tayari Mapadre wa Agano la Kale, na ambayo kwa maneno na mifano yao walitufunza sisi bado kufanya”.

Kiitikizano:

Yoe 2,15; Isa 62,11; Yer 4,5

**K.** Pigeni tarumbeta katika mji wa Mungu, kusanyeni watu, liiteni kusanyiko rasmi na msem: \*

Tazama, anakuja Mungu, Mwokozi wetu.

**W.** Tangazeni, hubirini, pigeni kelele sana na kusema:

**K.** Tazama, anakuja Mungu, Mwokozi wetu.

## **JUMANNE YA KWANZA YA MAJILIO**

**SOMO LA KWANZA:** Isa 2,6-22; 4,2-6

Kiitikizano:

Isa 2,11; Mt 24,30

- K. Siku ile, macho ya wanadamu yaliyoinuka yatashushwa chini na kiburi cha wanadamu kitainamishwa. \* Bwana, yeye peke yake, atatukuzwa.
- W. Watamwona Mwana wa adamu akija juu ya mawingu ya mbinguni pamoja na utukufu na nguvu nyingi.
- K. Bwana, yeye peke yake, atatukuzwa.

#### SOMO LA PILI:

Toka “Hotuba” za mt. Gregori Nazianzeno, askofu.

#### *Ee badiliko la ajabu*

Neno lenyewe la Mungu aliye kabla ya nyakati, asiyeonekana, wala kufahamika, yule aliye nje ya viumbe, Asili aliye na chanzo cha asili, Mwanga unaotoka kwa mwanga, chemchemi ya uzima na ya kutokufa, dhihirisho la mfano wa Mungu, muhuri usiojua mabadiliko, mfano usiogeuka na halisi wa Mungu, yule aliye lengo la Baba na Neno lake, anakuja kusaidia sura yeke mwenyewe na anajifanya mtu kwa upendo wa mwanadamu. Achukua mwili ili kuokoa mwili na, kwa upendo wa roho yangu, akubali kujiunga na nafsi yenye akili ya kibinadamu. Hivyo amtakasa yule aliyejifanya sawa naye. Ndiyo sababu ya kwamba alikuwa mwanadamu katika yote kama sisi, isipokuwa katika dhambi. Alimchukua mimba Bikira aliyetakatifuwa tayari na Roho Mtakatifu rohoni na mwilini kwa heshima ya Mwanawe na utukufu wa ubikira.

Mungu, kwa maana fulani, akichukua ubinadamu, aliukamilisha alipokusanya katika nafsi yake mambo mawili yaliyotengana kati yao, yaani maumbile ya kibinadamu na ya kimungu. Haya yalitoa umungu na yale yaliyapokea.

Yule atoaye mali kwa wengine amekuwa maskini. Aliomba msaada wa maumbile yangu ya kibinadamu ili nitajirishwe na maumbile yake ya kimungu. Na yule aliye ukamilifu alijivua mpaka kujifanya hana kitu. Naam, alijinyima, hata ikiwa kwa muda mfupi, utukufu wake, ili mimi nishiriki ukamilifu wake.

Ee utajiri mkuu mno wa ukarimu wa kimungu!

Lakini, je, fumbo hili lamaanisha kwetu nini? Tazama: mimi niliipokea sura ya Mungu, lakini sikujua huihifadhi kamili. Basi, yeye alichukua hali yangu ya kibinadamu ili kuniokoa mimi, niliyefanywa kwa mfano wake na kwa kunipatia mimi, mwenye hali ya kufa, kutokufa kwake.

Ilifaa kweli kwamba maumbile ya kibinadamu yangetakatifuwa kwa maumbile ya kibinadamu yaliyochukuliwa na Mungu. Hivyo yeye, kwa nguvu yake, alishinda nguvu za kishetani, akaturudishia uhuru na kutupeleka kwa nyumba ya Baba kupitia Mwanawe. Alikuwa Kristo aliyetustahilisha mema hayo yote, akatenda yote kwa utukufu wa Baba.

Mchungaji mwema, aliyetoa uzima wake kwa kondoo zake, atafuta kondo aliyepotea kwenye milima na vilima ambamo juu yao dhabihu kwa sanamu zilitolewa. Akimpata, amweka juu ya mabega yale yale yatakayobeba mbao wa msalaba na kumrudisha kwenye uzima wa umilele.

Baada ya mwanga bila hakika wa Mtangulizi, yaja Nuru yenyewe, ambayo ni yote mwangaza. Baada ya sauti huja Neno, baada ya rafiki wa Bwana arusi, huja Bwana arusi mwenyewe.

Bwana anakuja baada ya yule aliyemtayarishia taifa teule na kuwaandaa watu kwa umwagikaji wa Roho Mtakatifu kwa njia ya takaso kwenye maji.

Mungu alijifanya mtu, akafa ili sisi tupokee uzima. Hivyo, tumefufuliwa pamoja naye, kwani pamoja tulikufa, tumetukuzwa kwa sababu pamoja naye tumefufuliwa.

#### Kiitikizano

Gal 4,4-5; Efe 2,4; Rum 8,3

- K. Ulipowadia utimilifu wa wakati, Mungu alimtuma Mwanawe aliyezaliwa na mwanamke, aliyezaliwa chini ya sheria, \* kusudi awakomboa hao waliokuwa chini ya sheria.

- W. Katika upendo wake mkuu, Mungu alimtuma Mwanawe mwenyewe aliyefanywa mtu, kwa mfano wetu wadhambi,  
K. kusudi awakomboe hao waliokuwa chini ya sheria

## JUMATANO YA KWANZA YA MAJILIO

**SOMO LA KWANZA:** Isa 5,1-7

Kiitikizano:

Zab 80,14.15.3.16.15

- K. Mzabibu wako umeharibika: tazama, ee Mungu, amsha uwezo wako, \* usikubali kife kilichopandwa na mkono wako.  
W. Mungu mwenyezi, utazame toka juu, ujilie mzabibu huu:  
K. usikubali kife kilichopandwa na mkono wako.

**SOMO LA PILI:**

Toka “Hotuba” za mt. Bernardo, abate.

*Neno wa Mungu atakuja kwetu*

Twajua majilio ya aina tatu ya Bwana. Ujio wa siri wawekwa kati ya yale mawili yaliyo dhahiri. Katika ule wa kwanza Neno ameonekana duniani, akaongea na watu, walipomwona na kumchukia, kama yeye mwenyewe alivyonena. Katika ule wa mwisho “wote wenye mwili watauona wokovu wa Mungu” (Lk 3,7) na watamtazama yeye waliyemchoma (Yn 19,37). Bali wa siri ni ule wa katikati, ambamo wateule tu watamwona ndani yao wenyewe na roho zao zitaokoka.

Katika ujio, basi, wa kwanza yeye alikuja katika udhaifu wa mwili, katika huu wa katikati anakuja katika uwezo wa Roho, katika ule wa mwisho atakuja kwenye adhama ya utukufu.

Hivyo ujio huu wa kati ni, kwa kusema hivi, njia inayounganisha ya kwanza na ya mwisho: katika ule wa kwanza Kristo alikuwa ukombozi wetu, kwenye ule atajidhihirisha kama uzima wetu; katika huu ni pumziko na faraja yetu.

Lakini, ili kwa wengine isije ikaonekana labda mambo tunayosema sasa juu ya ujio huu wa kati ni yaliyobuniwa, msikilize yeye: Mtu akinipenda -anena- atalishika neno langu: na Baba yangu atampenda; nasi tutakuja kwake (Yn 14,23). Bali, yamaanisha nini: Mtu akinipenda, atalishika neno langu? Nimesoma pengine: Amchaye Mungu, atatenda mema (YbS 15,1), lakini juu ya yule apendaye kinasemwa kitu zaidi: kwamba atalishika neno la Mungu. Wapi yafaa kulihifadhi? Bila shaka moyoni, kama Nabii asemavyo: “Moyoni mwangu nimeliweka neno lako, nisije nikakutenda dhambi” (Zab 119,11).

Kwa kuwa ni wabarikiwa wale wanaohifadhi neno la Mungu, wewe ulihifadhi kusudi lishuke kwenye kimo cha roho yako na lipenyeze huba na desturi zako. Jilishe na fadhila hii na roho yako itapata utamu na nguvu. Usisahau kujilisha mkate wako, ili moyo wako usije ukakauka na roho yako ilishwe na chakula chenye urojojo.

Ukihifadhi hivyo neno la Mungu, bila shaka wewe pia utahifadhiwa nalo. Atakuja kwako Mwana pamoja na Baba, atakuja Nabii mkuu atakayefanya upya Yerusalemu na atatengeneza yote upya. Ujio huu wake wa kati utafanya kwamba “kama tulivyoichukua sura yake yule wa udongo, kadhalika tutaichukua sura yake yeye aliye wa mbinguni” (I Kor 15,49). Kama Adamu wa kale alivyoenea kwa mtu kikamilifu akimshika kabisa, hivyo sasa amshike Kristo aliyemwumba kikamilifu, akamwokoza kikamilifu na kumtukuza kikamilifu.

Kiitikizano:

Zab 28,11; Isa 40,10

- K. Tazama, Bwana anakuja, akivaa utukufu na nguvu; atembelea taifa lake kwa amani, \* na kutoa uzima bila mwisho  
 W. Tazameni, Mungu wetu yuaja kwa uwezo,  
 K. na kutoa uzima bila mwisho.

**ALHAMISI YA KWANZA YA MAJILIO****SOMO LA KWANZA:** Isa 16,1-5; 17,4-8Kiitikizano:

Yer 33,15.16; Isa 16,5

- K. Nitamchipushia Daudi chipukizi la haki: naye atafanya hukumu na haki katika nchi \*  
 Watamwita: Bwana ni haki yetu.  
 W. Atasimamisha ufalme wake juu ya upendo na uaminifu, hakimu mnyofu, mtetezi wa maskini.  
 K. Watamwita: Bwana ni haki yetu.

**SOMO LA PILI:**

Toka “Maelezo juu ya Diatessaron” ya Mt. Efrem, shemasi.

*Kesheni: yeye atakuja tena*

Hakuna ajuaye ile saa, hata malaika, wala Mwana (Mt 24,36). Alisema hayo ili kuzuia kwamba wanafunzi wangemwuliza juu ya muda wa ujio wake. “Si kazi yenu”, alisema, “kujua wakati wala majira”(Mdo 1,7). Yeye alilificha jambo ili tukeshe na kila mmojawetu akumbuke kwamba tukio laweza kutukia kwenye nyakati zetu. Naam, ungefunuliwa muda wa ujio wake, kuja kwake kungebaki bila kivutio, wala dhahirisho lake lisingetarajiwa na mataifa na karne. Kwa hiyo alisema kwamba atakuja, ila hakutaja muda na hivyo katika vizazi na karne zote lahifadhiwa hai tumaini la ujio wake.

Ingawa Bwana alionyesha ishara za ujio wake, hata hivyo halieleweki hitimizo lake, kwa sababu kupitia mageuzi mengi, zilikuwepo na zipo hata sasa ishara katika utendaji. Ujio wake wa mwisho unafanana na ule wa kwanza. Kama walivyomgojea wenye haki na manabii, kwa sababu walifikiri kwamba atadhihirishwa kwenye nyakati zao, hivyo leo waumini watamani kumpokea, kila mmoja katika wakati wake, hasa kwa sababu hakuwaonyesha siku ya matembezi yake; na hayo, ili mtu ye yote asifikiri kwamba amelazimishwa kwenye muda au masharti yule aliye na utawala wa hiari wa miendo na nyakati. Hayo aliyopanga yeye mwenyewe, vipi yaliweza kufichwa kwake, ambaye alidhihirisha hata ishara za ujio wake?

Alisema, basi: “Sijui”, hasa kwa kuzuia kwamba wasimwulize tena na pia ili ziwe zenye nguvu ishara alizotaja. Alisisitiza zile ishara ili tangu mwanzo mataifa yote na nyakati zote zingekuwa na sababu ya kufikiri kwamba ujio wake ungetekelezwa kwenye nyakati zake.

Kesheni, kwa sababu mwili unapolala, maumbile ndani yetu yanaongoza na utendaji wetu haufuati mapenzi yetu, bali yatekelezwa kulingana na msukumo usioujua. Na wakati mzito, yaani uoga na fadhaa, zinatawala roho, anamiliki adui juu yake na afanya kwa njia yake yale asiyotaka yeye. Juu ya maumbile atawala nguvu katili na juu ya nafsi atawala adui.

Kwa hiyo kesho ambalo juu yake alinena Bwana wetu limeamriwa kwa hali zote mbili: kwa mwili ili usijiache kwa usingizi mzito; kwa roho, ili isiangukie uzingizi wa woga, kulingana na

yasemayo Maandiko: Kesheni, enyi wenye haki (rej I Kor 15,34), na: Nimeamka nikali pamoja nawe (Zab 139, 18), na pia: Msichoke, na kwa hiyo hatulegei katika huduma tuliyokabidhiwa (2 Kor 4,1).

Kiitikizano:

Isa 55,3-4; Mdo 28,28

- K. Nitafanya nanyi agano la milele, rehema za Daudi zilizo imara. Nimemweka kuwa shahidi kwa kabila za watu, \* kiongozi na jemadari kwa mataifa.
- W. Hata kwa wapagani Kristo wokovu wa Mungu amepolekwa, nao watampokea,
- K. kiongozi na jemadari kwa mataifa

## IJUMAA YA KWANZA YA MAJILIO

**SOMO LA KWANZA:** Isa 19,16-25

Kiitikizano:

Isa 19,21; Lk 13, 29

- K. Siku ile Wamisri watamjua Bwana, \* watamtumikia kwa dhabihu na matoleo.
- W. Nao watakuja watu toka mashariki na magharibi, na toka kaskazini na kusini, nao wataketi chakulani katika ufalme wa Mungu:
- K. watamtumikia kwa dhabihu na matoleo.

**SOMO LA PILI:**

Toka “Proslogion” ya mt. Anselmo, askofu.

### *Tamaa ya kumwona Mungu*

Inuka, mwanadamu maskini, toka mbali na kazi zako kwa muda mfupi, acha kidogo mawazo yako yenye fujo. Weka mbali wakati huu shughuli nzito na tia kando utendaji wako wenye kuchosha. Umtarajie Mungu kidogo na upumzike kwake.

Ingia ndani ya roho yako, fukuza yote, isipokuwa Mungu na yale yanayokusaidia kumtafuta, na, baada ya kufunga mlango, umtafute. Ee moyo wangu, sema sasa wewe mwenyewe, mwambie sasa Mungu: Natafuta uso wako. “Bwana, uso wako nautafuta” (Zab27,8).

Haya, basi, Bwana Mungu wangu, ufunze moyo wangu wapi na namna ya kukutafuta, wapi na namna ya kukupata. Bwana, ikiwa wewe hupo hapa, wapi nikutafute wewe usiyekuwepo? Tena,

ukiwepo kote, kwa nini sikuoni kamwe? Lakini wewe, bila shaka, waishi katika mwanga usiofikika. Na upo wapi mwanga usiofikika au vipi nitaukaribia? Nani atanipeleka, nani ataniongoza ili mimi niweze kukuona ndani mwake? Pia, kwa ishara gani, kwa sura gani nitakutafuta? Ee Bwana Mungu wangu, mimi sijakuona kamwe, siujui uso wako.

Atafanya kitu gani, ee Bwana uliye juu, mgeni huyu, aliye mbali hivi nawe, lakini aliye mali yako? Atafanya nini mtumishi wako aliyetewa na upendo kwako na aliyetupwa mbali na uso wako? Atamani kukuona na uso wako umekuwa kwake mbali mno. Atamani kukukaribia na makao yako hayafikiki. Ana shauku ya kukupata, wala hajui nyumba yako. Ajikaza kukutafuta, wala hajui uso wako.

Bwana, wewe ni Mungu wangu, wewe ni Bwanangu, wala mimi sijakuona. Uliniumba, ukanifanya upya, ukanipatia mema yangu yote, nami bado sijakujua. Nimeumbwa kwa kukuona na bado sijafanya yale ambayo kwayo nimeumbwa.



Lakini wewe, Bwana, mpaka lini utatusahau, mpaka lini utaondoa macho yako kutoka sisi? Lini utatuangalia na kutusikiliza? Lini utaangazia macho yetu na kutuonyesha uso wako? Lini utajirudisha kwetu?

Tazama, Bwana, utusikize, utuangazie, ujidhihirishe kwetu. Ujitoe upya kwetu ili tuwe salama: bila wewe twakaa vibaya hivi. Uurehemu uchovu wetu, jitihada zetu kwa ajili yako: bila wewe hatuna thamani kamwe.

Nifundishe kukutafuta na ujionyeshe ninapokutafuta: siwezi kukutafuta usiponifunza, wala kukupata usipojionyesha. Nami nikutafute nikikutamani na nikutamani nikikutafuta; kwamba nikupate nikikupenda na nikupende nikikupata.

#### Kiitikizano:

Zab 80,19.20; 106,4

**K.** Toka wewe, ee Bwana, hatutaondoka; utuhishe nasi tutaliitia jina lako. \* uangazishe uso wako nasi tutaokoka.

**W.** Ee Bwana, utukumbuke sisi, kwa upendo wa watu wako; utujilie kwa wokovu wako.

**K.** uangazishe uso wako nasi tutaokoka.

## **JUMAMOSI YA KWANZA YA MAJILIO**

**SOMO LA KWANZA:** Isa 21,6-12

#### Kiitikizano:

Ufu 18,2.4.5

**K.** Malaika alilia kwa sauti kuu: Umeanguka Babilonia mkuu! Kisha nikasikia sauti nyingine kutoka mbinguni: \* Tokeni Babilonia enyi watu wangu, msishiriki dhambi zake.

**W.** Dhambi zake zimefika hata mbinguni na Mungu amekumbuka maovu yake.

**K.** Tokeni Babilonia enyi watu wangu, msishiriki dhambi zake.

#### **SOMO LA PILI:**

Toka makala juu ya “Faida za uvumilivu” ya Mt. Sipriani, askofu na shahidi.

#### *Tusiyoona, twatarajia*

“Mwenye kuvumilia hata mwisho, ndiye atakayeokoka” (Mt 10,22; 24,13); hii ni amri ya wokovu ya Bwana na Mwalimu wetu. Na pia: “Ninyi mkikaa katika neno langu, mtakuwa kweli wanafunzi wangu; mtaifahamu kweli, nayo hiyo kweli itawaweka huru” (Yn 8,31-32).

Kwa hiyo, twahitaji kuwa na uvumilivu wa kudumu, ndugu wapendwa, ili, tukikubaliwa kwa tumaini la ukweli na la uhuru, tuweze kuzifikia kweli na uhuru. Tukio lenyewe la kuwa wakristo ni swala la imani na tumaini; ila, kusudi tumaini na imani ziweze kufaulu kuzaa, yahitajika uvumilivu.

Sisi hatuungalii utukufu wa sasa, bali ule ujao, kulingana na yale anayoonya mtume Paulo, akisema: “Tuliokolewa kwa taraja; lakini kitu kilichotarajiwa kikionekana, hakuna taraja tena. Kwa maana ni nani anayekitarajia kile akionacho? Bali tukikitarajia kitu tusichokiona, twakingojea kwa saburi” (Rum 8,24-25). Taraja na uvumilivu zinahitajika ili tutekeleze yale tuliyoanza kwa kuwepo na tuyafikie yale tunayotaraji na kuamini kwa sababu Mungu atufunulia.

Katika sehemu nyingine Mtume mwenyewe, akiongea na wenye haki na pia na wale ambao kwa matendo mema na wakitoa matunda kwa vipawa walivyopokea, wajipatia hazina kwa mbingu, awafundisha kuwa na uvumilivu, akisema: “Kwa hiyo, kadiri tupatavyo nafasi na tuwatendee watu

wote mema, na hasa jamaa ya waaminio. Tena tusichoke katika kutenda mema; maana tutavuna kwa wakati wake” (Gal 6,10.9).

Yeye awaonya wote wasiache kutenda kwa kukosa uvumilivu; mtu ye yote, akiondolewa kwa kushindwa na vishawishi, asiache katikati kwenye njia ya sifa na utukufu, na aangamize hivyo matendo yaliyotendeka kabla, kwa sababu hatekelezi yaliyoanzishwa tayari.

Mwishowe Mtume, akiongea juu ya upendo, anauunganisha na uvumilivu na saburi: “Upendo huvumilia”, asema, “hufadhili, hufadhili; upendo hauhusudu, hautakabari, haujivuni... hauhesabu mabaya. Huvumilia yote, huamini yote, hutumaini yote, hustahimili yote” (I Kor 13,4-5). Yeye atufanya kuona kwamba upendo waweza kudumu, kwa sababu ajua kuvumilia yote.

Na pengine: “Mkichukuliana katika upendo; na kujitahidi kuuhifadhi umoja wa Roho katika kifungo cha amani” (Efe 4,2b-3). Kwa hayo alitaka kuonyesha kwamba hatuwezi kuhifadhi wala umoja, wala amani ndugu wasipochukuliana kwa kuvumiliana na wasipohifadhi kifungo cha uelewano kwa masaa wa uvumilivu.

Kiitikizano:

Hab 2,3; Ebr 10, 37

**K.** Ataonekana Bwana, hatakanusha matarajio; \* mngojee, hakika atakuja, hatakawia.

**W.** Bado kitambo kidogo sana: yeye ajaye atakuja.

**K.** Mngojee, hakika atakuja, hatakawia.

## **JUMA LA PILI LA MAJILIO**

### **DOMINIKA YA PILI YA MAJILIO**

**SOMO LA KWANZA:** Isa 22,8-23

Kiitikizano:

Ufu 3,7.8

**K.** Haya ndiyo anenayo yeye aliye Mtakatifu, aliye wa Kweli, aliye na ufunguo wa Daudi: \* mbele yako nimefungua mlango, wala hapana awezaye kuufunga.

**W.** Umelitunza neno langu, wala hukulikana jina langu:

**K.** mbele yako nimefungua mlango, wala hapana awezaye kuufunga.

**SOMO LA PILI:**

Toka “Maelezo juu ya nabii Isaya” ya mt. Eusebio, askofu wa Cesarea.

*Sauti ya mtu aliaye nyikani*

Sauti ya mtu aliaye nyikani: “Itengenezeni njia ya Bwana, nyosheni jangwani njia kuu kwa Mungu wetu” (Isa 40,3).

Anena wazi kwamba mambo yaliyosumiliwa kwenye unabii, yaani, ujio wa utukufu wa Bwana na dhihirisho la wokovu wa Mungu kwa wote, yatatukia sio huko Yerusalemu, bali jangwani. Na hayo yalitukia kihistoria kama yalivyoandikwa wakati Yohana Mbatizaji alihubiri ujio wa wokovu wa Mungu kwenye jangwa la Yordani, ulipodhihirishwa wokovu wa Mungu. Naam, Kristo na utukufu wake alidhihirishwa wazi kwa wote wakati ambapo, baada ya ubatizo wake, mbingu zimefunguliwa na Roho Mtakatifu, akishuka kama hua, alikaa juu yake, ikasikika sauti ya Baba aliyetoa ushuhuda kwa Mwana: “Huyu ni Mwanangu, mpendwa wangu, ninayependezwa naye. msikieni yeye”(Mt 17,5).

Lakini hayo yote yanaeleweka kwa maana ya kimfano. Mungu alikuwa karibu kuja jangwani humu, bila njia na lisilifikika tangu daima, lililokuwa ubinadamu. Naam, watu walikuwa jangwa lililofungwa kabisa kwa kumjua Mungu na lenye ukuta kwa kila mwenye haki na nabii. Lakini sauti ile inaagiza kufungua njia mle kwa Neno wa Mungu; aamrisha kusawazisha mahali palipoharibika na penye vituko, ili, akija, aweze kuingia: itengenezeni njia ya Bwana (Mal 3,1).

Maandlizi kwa uinjilishaji wa dunia ni neema yenye kufariji. Hiyo yawapatia watu ujuzi wa wokovu wa Mungu.

“Panda juu ya mlima mrefu, wewe uuhubiriye Sion habari njema; paza sauti kwa nguvu, wewe uuhubiriye Yerusalemu habari njema” (Isa 40,9).

Kabla, imesemwa juu ya sauti iliyosikika jangwani, sasa kwa maneno haya, wadokezwa, kwa namna dhahiri, watangazaji wa karibu zaidi wa ujio wa Mungu na ujio wake mwenyewe. Naam, kabla husemwa juu ya unabii wa Yohana Mbatizaji na baadaye juu ya wainjilisti.

Lakini, upi Sion ambao maneno haya yataja? Bila shaka ule ambao kabla uliitwa Yerusalemu. Hata huo ulikuwa mlima, kama yanavyotaja Maandiko yasemapo: “Mlima Sion uliufanya maskani yako” (Zab 74,2); na Mtume: “Ninyi mmeufikilia mlima Sion” (Ebr 12,2). Lakini kwa maana ya juu, Sion unaofahamisha ujio wa Kristo, ni kwaya ya mitume, waliochaguliwa kati ya taifa la tohara.

Naam, ilikiwa huu ndio Sion na Yerusalemu uliochagua wokovu wa Mungu na, ukiwekwa juu ya mlima wa Mungu, umesimama juu ya Neno la pekee wa Baba.. Kwake anaamuru kupanda kwanza juu ya mlima mrefu na kutangaza, baadaye, wokovu wa Mungu.

Ni mfano wa nani yule aletaye habari njema, ila wa umati wa wainjilisti? Na yamaanisha nini kuinjilisha, ila kuwapelekea watu wote, na hasa miji ya Yuda, tangazo jema la ujio wa Kristo duniani?

#### Kiitikizano:

Mt 11,11.9

**K.** Alikuwa mtangulizi wa Bwana; juu yake Yesu alisema: katika wazao wa wanawake, \* hajaondokea mtu aliye mkuu kuliko Yohane Mbatizaji.

**W.** Yeye ni nabii na mkuu zaidi ya nabii:

**K.** hajaondokea mtu aliye mkuu kuliko Yohane Mbatizaji

## **JUMATATU YA PILI YA MAJILIO**

**SOMO LA KWANZA:** Isa 24,1-18

#### Kiitikizano:

Isa 24,14.15; Zab 96,1

**K.** Watainua sauti zao kwa nyimbo za sifa: \* katika mashariki na magharibi mtukuzeni Bwana.

**W.** Mwimbieni Bwana wimbo mpya; mwimbieni Bwana nchi yote;

**K.** katika mashariki na magharibi mtukuzeni Bwana.

#### **SOMO LA PILI:**

Toka makala “Kukwea kwenye mlima Karmeli” ya mt. Yohane wa Msalaba, mpresbiteri.

*Mungu alisema nasi kwa njia ya Mwana*

Sababu muhimu ya kuwa, katika Sheria ya kale iliruhusiwa kumwuliza Mungu na ilikuwa haki kwamba makuhani na manabii wangependa maono na ufunuo wa Mungu, ni kwa kuwa imani haijasimama na sheria ya kiinjiili haijawekwa bado. Ilihitajika, basi, kumwuliza Mungu na kwamba

Mungu angejibu kwa maneno, au kwa maono au ufunuo, kwa mifano na mithali au kwa njia nyingine za dhahirisho. Naam, yeye alijibu, alinena au alifunua mafumbo ya imani yetu, au kweli zilizohusu imani au kupeleka mle.

Lakini sasa ambamo imani yasimama katika Kristo na sheria ya kiinjili imewekwa katika muhula huu wa neema, haihitajiki tena kumwuliza Mungu, wala kwamba yeye aseme au ajibu kama wakati ule. Naam, akitujalia Mwanawe, aliye Neno lake la pekee na mkataa, alituambia yote kwa mara moja, wala hana zaidi la kufunulia.

Hii ndiyo maana halisi ya maneno ambamo Mt. Paulo ataka kupeleka Waebrania waache njia za kale za kuwasiliana pamoja na Mungu kulingana na sheria ya Musa, na kutazama Kristo tu: “Mungu ambaye alisema zamani na baba zetu kwa sehemu nyingi na kwa njia nyingi, mwisho wa siku hizi, amesema na sisi katika Mwana” (Ebr 1,1-2). Kwa maneno haya Mtume ataka kufahamisha kwamba Mungu amekuwa kwa namna fulani bubu, bila kuwa tena na la kusema, kwa sababu yale aliyonena siku moja kwa sehemu kupitia manabii, alisema sasa kikamilifu akitujalia yote katika Mwanawe.

Kwa hiyo yule angetaka kumwuliza Bwana na kumwomba maono au ufunuo, asingefanya tu kitu kijinga, bali pia angemkosea Mungu, kwa sababu haweki tu mtazamo wake juu ya Kristo na anatafuta mambo kadhaa na mapya. Naam, Mungu angeweza kumjibu: “Huyu ni Mwanangu, mpendwa wangu, ninayependezwa naye. Msikieni yeye” (Mt 17,5). Ikiwa nimekupatia yote katika Neno langu aliye Mwanangu wala sina kingine cha kufunulia, vipi naweza kukujibu au kukufunulia kitu kingine? Mtazame yeye peke yake na utapata zaidi ya yale unayotafuta au kutamani: katika yeye nilikuambia na kukufunulia yote. Tangu siku ambamo juu ya Tabor nilishuka kwa Roho yangu na kutangaza: “Huyu ni Mwanangu, mpendwa wangu, ninayependezwa naye. Msikieni yeye” (Mt 17,5), niliweka kikomo kwa njia zangu za kale za kufundisha na kujibu na nilimkabidhi vyote kwake. Msikieni yeye, kwa kuwa tangu sasa sina zaidi sababu za imani za kufunulia, wala kweli za kudhihirisha. Ikiwa nilinena kabla, ilikuwa tu kwa kuahidi Kristo na ikiwa watu waliniuliza, ilikuwa tu katika kutafuta na kumtarajia yeye, ambamo wangepata kila jema, kama yanavyoshuhudia sasa mafunzo yote ya wainjilisti na ya mitume.

#### Kiitikizano:

Mik 4,2; Yn 4, 25

**K.** Mataifa mengi watakuja na kusema: Njoni, tuende juu mlimani kwa Bwana, naye atatufundisha njia zake, \* nasi tutakwenda katika mapito yake.

**W.** Apaswa kuja Masiya, yaani, Kristo: naye atakapokuja atatufunulia yote;

**K.** nasi tutakwenda katika mapito yake.

## **JUMANNE YA PILI YA MAJILIO**

**SOMO LA KWANZA:** Isa 24, 19 – 25,5

#### Kiitikizano:

Isa 25, 1.4

**K.** Ee Bwana, wewe u Mungu wangu; nitakutukuza na kulihimidi jina lako: kwa kuwa umetenda mambo ya ajabu.

**W.** Umekuwa ngome ya maskini, ngome ya mhitaji katika dhiki yake:

**K.** kwa kuwa umetenda mambo ya ajabu.

**SOMO LA PILI:**

Toka Hati ya kidogmatiki “Lumen gentium” ya Mtaguso wa kiekumene Vatikano II juu ya Kanisa.

*Hali ya kieskatolojia ya Kanisa safiri*

Kanisa ambalo kwake sote twaitwa katika Kristo na ambamo kupitia neema ya Mungu twapata utakatifu, litakuwa na utimilifu wake tu katika utukufu wa mbinguni, wakati utakapokuja muda wa kufanywa upya vitu vyote na pamoja na watu wote hata viumbe vyote, vilivyounganishwa kabisa na mwanadamu na, kwa njia yake, vyafikia lengo lake, vitafanywa upya kabisa katika Kristo.

Naam, Kristo, akiinuliwa juu ya nchi, aliwavuta wote kwake; akifufuka toka wafu, alituma juu ya mitume Roho wake mwenye kuhisha na kwa njia yake aliunda mwilie, Kanisa, kama sakramenti ya wokovu kwa wote; akikaa kuume kwa Baba, afanya kazi daima ulimwenguni ili kuwaongoza watu kwa Kanisa na kwa njia yake, kuwaunganisha naye kwa undani zaidi na kuwashirikisha maisha yake matukufu, akiwalisha kwa Mwili na Damu yake.

Basi, matengenezo mapya tunayotarajia, yameanza tayari katika Kristo, yapelekwa mbele kwa kutuma Roho Mtakatifu na yaendelea kwa njia yake katika Kanisa, ambamo, kupitia imani, twafundishwa pia juu ya maana ya maisha yetu ya hapa, wakati tunapotekeleza, katika taraja ya mema yajayo, utume tuliokabidhiwa ulimwenguni na Baba na twatimiza wokovu wetu.

Kwa hiyo, kwetu umefika utimilifu wa nyakati na yamewekwa tayari matengenezo mapya ya vyote na, kwa namna fulani, yametangulizwa katika awamu hii: naam, Kanisa limepambwa tayari tangu sasa duniani na utakatifu halisi, hata ikiwa haujakomaa.

Hata hivyo, mpaka zitakapokuwa mbingu mpya na nchi mpya, ambamo haki itakuwa na makao ya kudumu, Kanisa safiri, katika sakramenti zake na miundo yake, iliyo ya nyakati hizi, labeba sura ya kupita ya ulimwengu huu na laishi kati ya viumbe vinavyolia na kuteseka mpaka sasa katika utungu, vikingojea ufunuo wa wana wa Mungu.

Kiitikizano

Flp 3, 20-21; Tit 2, 12-13

- K. Tunamtazamia Mwokozi, Bwana Yesu Kristo, \* atakayeubadili mwili wetu wa unyonge, upate kufanana na mwili wake wa utukufu.
- W. Twaishi kwa kiasi, haki na utauwa katika ulimwengu huu wa sasa, tukilitazamia tumaini lenye baraka na mafunuo ya utukufu wa Mungu wetu mkuu,
- K. atakayeubadili mwili wetu wa unyonge, upate kufanana na mwili wake wa utukufu

**JUMATANO YA PILI YA MAJILIO**

**SOMO LA KWANZA:** Isa 25,6 - 26,6

Kiitikizano:

Ufu 21, 3; Isa 25, 8

- K. Nikasikia sauti kubwa: Tazama, maskani ya Mungu ni pamoja na wanadamu. Atakaa pamoja nao, \* wao watakuwa watu wake naye atakuwa Mungu pamoja nao.
- W. Mungu ataangamiza mauti hata milele; atafuta machozi katika nyuso zote:
- K. wao watakuwa watu wake, naye atakuwa Mungu pamoja nao.

**SOMO LA PILI:**

Toka “Maelezo juu ya zaburi” ya mt. Agostino, askofu.

*Ahadi za Mungu zimetimizwa kwa njia ya Kristo Mwanawe*

Mungu aliweka muda kwa ahadi zake na muda kwa utekelezaji wake. Tangu manabii hadi Yohane Mbatizaji ulikuwa muda wa ahadi; toka Yohane Mbatizaji hadi mwisho wa nyakati ni muda wa utekelezaji wake.

Mungu ni mwaminifu aliyejifanya mdeni wetu, si kwa sababu alipokea cho chote kutoka kwetu, bali kwa sababu ametuahidi mambo kweli makubwa sana. Zilionekana kidogo ahadi: Yeye alitaka kujifunga na mkataba wa kimaandishi, kama akijilazimisha nasi kwa hawala ya ahadi zake, ili, alipoanza kulipa alichohadi, sisi tungeweza kutambua utaratibu wa malipo. Wakati wa manabii ulikuwa wa kutekeleza ahadi.

Mungu aliahidi wokovu wa milele na maisha yenye heri bila mwisho pamoja na malaika na urithi usioharibika, utukufu wa milele, utamu wa uso wake, makao matakatifu mbinguni na, baada ya ufufuko, mwisho wa hofu ya mauti. Hizo ndizo ahadi za mwisho ambazo mle nguvu yetu yote ya kiroho imeelekea: tutakapozipata, hatutatafuta wala kuuliza kitu zaidi.

Lakini katika kuahidi na kutangaza kabla, Mungu alitaka kuonyesha pia kwa njia gani mtu atazifikia hali za mwisho. Aliwahidi wanadamu umungu, kwa watu wenye hali ya kufa kutokufa, kwa wadhambi kuhesabiwa haki, kwa walidharauliwa kutakatifuzwa. Ilionekana kwa watu kitu kisichaaminika alichohadi Mungu: kwamba wao toka hali ya kuwa watu wanaokufa, ya uharibifu, ya umaskini, ya udhaifu, ya vumbi na majivu, kama walivyo, wangukuwa sawa na malaika wa Mungu. Na, ili watu waamini, licha ya mkataba wa kimaandishi, Mungu alitaka pia mpatanishi wa uaminifu wake. Na alitaka kwamba awepo si mkuu fulani, au malaika au malaika mkuu, bali Mwanawe wa pekee ili kuonyesha, kwa njia yake, kupitia barabara gani angetuongoza kwenye kile kikomo alichotuahidi. Lakini ilikuwa kidogo kwa Mungu kufanya Mwanawe awe yule aonyeshaye njia: alimfanya yeye mwenyewe njia ili utembe ukiongozwa naye katika njia yake mwenyewe.

Ilihitaika kutangaza kwa unabii kwamba Mwana wa pekee wa Mungu angekuja kati ya watu, angechukua maumbile ya kibinadamu na angekuwa hivyo mwanadamu, na angekufa, angefufuka na kupaa mbinguni na angekaa kuume kwa Baba; yeye angetimiza kati ya mataifa ahadi na, baada ya hayo, angetimiza pia ahadi ya kurudi ili kupata matunda ya yale aliyotoa, kutofautisha vikombe vya hasira tokea vikombe vya huruma, akiwapa waovu alichotishia, na wenye haki alichohadi.

Hayo yote yalihitajika kutangazwa kabla, kwa sababu, la sivyo, yeye angesababisha hofu. Na hivyo walimngojea kwa tumaini, kwa sababu alionekana tayari katika imani.

**Kiitikizano:**

Mik 7, 19; Mdo 10, 43

- K.** Atarejea Mungu wetu na kutuhurumia. \* Atakanyaga maovu yetu na atazitupa dhambi zetu zote katika vilindi vya bahari.
- W.** Huyu manabii wote wanamshuhudia: kila amwaminiye kwa jina lake atapata ondoleo la dhambi.
- K.** Atakanyaga maovu yetu na atazitupa dhambi zetu zote katika vilindi vya bahari.

## ALHAMISI YA PILI YA MAJILIO

**SOMO LA KWANZA:** Isa 26,7-21

Kiitikizano:

Isa 26, 19; Dan 12, 2

**K.** Amkeni, kaimbeni, ninyi mnaokaa mavumbini: \* umande wa Bwana ni umande wa nuru.

**W.** Wingi wa hao walalo mavumbini wataamka:

**K.** umande wa Bwana ni umande wa nuru.

**SOMO LA PILI:**

Toka “Hotuba” za Mt. Pero Krisologo, askofu.

*Upendo, hamu ya kumwona Mungu*

Mungu, alipoona ulimwengu kufadhaika na hofu, aliingia kati ili kuwaita kwa upendo, kuwaalika kwa neema, kuwafariji kwa upendo na kuwakumbatia kwa huba.

Aosha kwa gharika kuu nchi iliyozeeka katika uovu, amwita Nuhu baba wa ulimwengu uliofanywa upya na kumshauri kwa maneno ya upendo, amjalilia tumaini na urafiki wake, amwarifu kwa ukarimu juu ya wakati ule, amfariji kwa neema yake kwa wakati ujao. Yeye hatoi amri tu, bali atolea msaada wake na kuunganisha kazi yake na ile ya viumbe vilivyoundwa. Kwa mkataba wa upendo aondoa hofu iliyotia watu utumwani. Hivyo, Mungu na wanadamu, waliounganika katika upendo, wahifadhi pamoja waliyopata kwa tendo la pamoja.

Kwa hiyo amwita Abrahamu toka katikati ya wapagani, amwadhimu kwa jina jipya, amfanya kuwa baba wa imani, amsindikiza njiani, amlinda kati ya wageni, amtajirisha na mema, amheshimu kwa mafanikio, ambana kwa ahadi, amwondoa toka machukio, ambembeleza kwa ukarimu, amtukuza kwa mrithi asiyetarajiwa, ili, akijaa mema mengi hivi, akishindwa na utamu mwingi hivi wa upendo wa kimungu, ajifunze kumpenda Mungu, wala si kuwa na hofu naye, amtumikie kwa upendo, wala si kwa hofu. Kwa hiyo amfariji Yakobo katika ndoto alipotoroka, amchochea kwa pambano aliporudi, amkumbatia kwenye kumbatio la mpiganaji, ili ampende Baba ambaye naye alipambana, wala asiwe na hofu. Kwa hiyo amwita Musa kwa lugha ya babu, aongea naye kwa upendo wa kibaba, amwalika kuwa mkombozi wa taifa lake.

Kwa matukio tuliyokumbuka, mwali wa upendo wa kimungu uliwasha mioyo ya wanadamu na ulevi wote wa upendo wa Mungu ulienea kwenye hisia za mwanadamu. Wakijeruhiwa rohoni, wanadamu walianza kutaka kumwona Mungu kwa macho ya mwili. Lakini, ikiwa Mungu hawezi kukumbatiwa na ulimwengu wote, vipi aliweza kuangaliwa na mtazamo mwembamba wa macho ya kibinadamu? Twahitaji kujibu kwamba madai ya upendo hayaangalii yale yatakayokuwa, itakuwa nini, nini itawezekana. Upendo haukwami mbele ya kisichowezekana, haupungui mbele ya matatizo.

Upendo usipofikia unayemtamani, unamwua mpenzi; na kwa hiyo waenda pale unapovutiwa, si unapopaswa. Upendo wazalisha tamaa, wazidisha uchu na uchu watamani yaliyokataliwa. Na nini zaidi? Upendo hauwezi kuhangaika kuona unachopenda; kwa hiyo watakatifu wote walithamini kidoga sana walichopata, ikiwa hawakufikia kumwona Mungu. Kwa hiyo, upendo unaotamani kumwona Mungu, ingawa hauna utambuzi, unao bado moto wa utauwa. Kwa hiyo Musa aweza kusema: Ikiwa nimepata neema mbele zako, nionyeshe uso wako (Kut 33,13). Kwa hiyo pia mtunga zaburi anena: Unionyeshe uso wako (Zab 80,3). Wapagani wenyewe walichonga sanamu, ili kuweza, katika mapotovu yao, kuona kwa macho yale waliyoabudu.

Kiitikizano:

Isa 66, 13; I Fal 11, 36; Isa 66, 14; 46, 13

- K.** Kama mama anavyomfariki mwana, ndivyo nitawafariji mimi, asema Bwana; toka Yerusalemu, mji ninaopendezwa nao, utafika kwenu msaada.\* Mtaona na moyo wenu utafurahi.
- W.** Katika Sion nitatoa wokovu, katika Yerusalemu utukufu wangu.
- K.** Mtaona na moyo wenu utafurahi.

**IJUMAA YA PILI YA MAJILIO****SOMO LA KWANZA:** Isa 27,1-13Kiitikizano:

Mt 24, 31; Isa 27, 13

- K.** Bwana atatuma malaika zake pamoja na, kwa sauti kuu ya parapanda watawakusanya wateule wake wote \* toka pepo nne, toka mwisho huu wa mbingu mpaka mwisho huu.
- W.** Watakuja, nao watamsujudu Bwana katika mlima mtakatifu huko Yerusalemu,
- K.** toka pepo nne, toka mwisho huu wa mbingu mpaka mwisho huu.

**SOMO LA PILI:**

Toka makala “Dhidi ya uzushi” ya mt. Ireneo, askofu.

*Adamu na Kristo; Hawa na Maria*

Bwana alikubali hali ya kibinadamu, akajidhihirisha kwa ulimwengu uliokuwa wake. Maumbile ya kibinadamu yalibeba Neno wa Mungu, lakini alikuwa Neno wa Mungu aliyehifadhi maumbile ya kibinadamu. Katika Kristo ulikuwa ule ubinadamu ulioasi karibu na mti wa paradisi, lakini pia katika yeye ubinadamu ule ule, kwa utii uliotimizwa juu ya mti wa msalaba, uliharibu uasi wa kale. Wakati ule ule aliharibu ushawishi ambao kwao alishawishiwa vibaya Hawa, bikira aliyepangwa kwa mtu wa kwanza. Lakini hayo yote yalikuwa kwa lengo la ujumbe ule wa baraka aliopeleka malaika kwa Maria, bikira aliyetiishwa kwa mtu. Naam, wakati Hawa alipopotoshwa na ujumbe wa shetani, aliasi neno la Mungu, akajigenisha na Mungu, Maria, akiongozwa na ujumbe wa malaika, alitii neno la Mungu, akastahili kubeba Mungu tumboni mwake.

Yule, basi, alikubali kudanganywa, akaasi, huyo akakubali kushauriwa, akatii. Hivyo, bikira Maria aliweza kuwa wakili wa bikira Hawa.

Kristo alikamilisha yote ndani mwake na hivyo yote yalikuwa na yeye kama kichwa. Alianza vita dhidi ya adui wetu, akamshinda yule ambaye, mwanzo, kupitia Adamu, alitufanya sote mateka wake. Alikanyaga kichwa cha nyoka kulingana na neno la Mungu lililotajwa katika Mwanzo: Nitaweka uadui kati yako na huyo mwanamke, na kati ya uzao wako na uzao wake: huo utakuponda kichwa, na wewe utamponda kisigino (Mwa 3,15).

Kwa maneno nayo, hutangazwa kabla kwamba yule atakayezaliwa toka bikira, kama Adamu mpya, angekanyaga kichwa cha nyoka. Huyu ndiye mzao yule wa Adamu, ambaye juu yake anena Mtume katika waraka wake kwa Wagalatia: Sheria ya matendo iliingizwa hata aje ulimwenguni mzao aliyepewa ile ahadi (Gal 3,19).

Wazi zaidi aonyesha jambo hili katika waraka ule ule, ambapo anena: “Ulipo wadia utimilifu wa wakati, Mungu alituma Mwanawe, ambaye amezaliwa na mwanamke”(Gal 4,4). Naam, adui asingeshindwa kulingana na haki, mshindi asingekuwa mtu aliyezaliwa na mwanamke, kwa sababu, tangu mwanzo wa historia, shetani alimtawala mtu kupitia mwanamke, akimpinga kwa nguvu yake.



Kwa hiyo atangazwa Mwana wa mtu, yeye anayejumlisha ndani mwake mtu wa asili, ambamo toka kwake anakuja mwanamke wa kwanza na, kupitia huyo, watu wote. Wanadamu waliangukia mautini kwa sababu ya mtu aliyeshindwa. Sasa alipanda upya kwa uzima, kwa sababu ya mtu mshindi.

Kiitikizano:

Lk 1, 26. 27. 30. 31. 32

- K. Malaika Gabrieli alitumwa na Mungu kwa mwanamwali Maria, mke wa Yosefu. Kwake, aliyefadhaika kwa fumbo la nuru, yeye alitoa tangazo: Usiogope, Maria ulipata neema kwa Mungu. Mwana utakayemchukua mimba \* ataitwa Mwana wa Aliye juu.
- W. Bwana Mungu atampa kiti cha enzi cha Daudi, baba yake, ataimiliki nyumba ya Yakobo hata milele;
- K. ataitwa Mwana wa Aliye juu.

## JUMAMOSI YA PILI YA MAJILIO

**SOMO LA KWANZA:** Isa 29,1-8

Kiitikizano:

Isa 54, 4; 29, 6.7

- K. Usiogope, Yerusalemu: maana hutatahayarika, \* atakapokuja kukutembelea Bwana Mungu wa majeshi.
- W. Watatoweka kama ndoto ya usiku mataifa yote waliokupiga.,
- K. atakapokuja kukutembelea Bwana Mungu wa majeshi.

**SOMO LA PILI:**

Toka “Hotuba” za Mbarikiwa Isaka wa Stela, abate.

### *Maria na Kanisa*

Mwana wa Mungu ni mzaliwa wa kwanza kati ya ndugu wengi; akiwa wa pekee kwa maumbile, kupitia neema amewaunganisha wengi, ili wawe naye kitu kimoja. Naam, “wote waliompokea, aliwapa uwezo wa kufanyika watoto wa Mungu” (Yn 1,12). Akiwa, basi, mwana wa mtu, aliwafanya wengi kuwa wana wa Mungu, na ikiwa amejiunganisha na wengi, yeye aliye pekee katika upendo na uwezo wake; na wao pia wakiwa wengi kwa uzazi wa kimwili, wako mmoja tu pamoja naye kwa uzazi wa kimungu.

Kristo ni mmoja, kwa hiyo Kichwa na Mwili wafanya kitu kimoja. Kristo ni mmoja kwa sababu ni mwana wa Mungu mmoja huko mbinguni na wa mama mmoja duniani.

Wanao wana wengi na pamoja mwana mmoja. Kichwa na viungo ni pamoja mwana mmoja kwa wana wengi, hivyo Maria na Kanisa ni mama mmoja kwa wengi, bikira mmoja kwa wengi. Wote wawili mama, wote wawili bikira, wote wawili wachukua mimba kwa Roho Mtakatifu bila tamaa, wote wawili wamtotea Baba watoto bila dhambi. Maria bila dhambi yo yote aliuzalia mwili Kichwa, Kanisa katika ondoleo la dhambi zote alimpatia Kichwa mwili.

Wote wawili ni mama wa Kristo, bali hakuna anayezaa jumla yote bila mwingine.

Kwa hiyo, kwa haki, katika Maandiko yaliyoongozwa na Mungu yaliyosemwa kwa jumla juu ya bikira mama Kanisa, yafahamika binafsi juu ya bikira mama Maria; na yale yanayosemwa kwa namna ya pekee juu ya bikira mama Maria, yasemwa pia kwa jumla juu ya bikira mama Kanisa; na yanayosemwa juu ya mmojawao wawili, yaweza kuhusishwa vile vile juu ya mmoja au mwingine.

Hata nafsi mmoja mwumini aweza kuangaliwa kama Mke wa Neno wa Mungu, mama, binti na wa dada wa Kristo, bikira na mwenye kuzaa. Kwa hiyo, yasemwa kwa jumla juu ya Kanisa, kwa namna ya pekee kwa Maria, kwa namna ya binafsi kwa roho mwumini, juu ya Hekima yenyewe ya Mungu aliye Neno wa Baba: kati ya hao wote nilitafuta mahali pa kupumzikia na katika urithi wa Bwana nilikaa (YbS 24,12). Urithi wa Bwana kwa jumla ni Kanisa, kwa namna maalum Maria, kwa namna ya pekee kila roho mwumini. Kwenye tabernakulo ya tumbo la Maria Kristo alikaa miezi tisa, katika tabernakulo ya imani ya Kanisa mpaka mwisho wa dunia, katika ufahamu na katika upendo wa roho mwumini kwa milele.

Kiitikizano:

Law 26, 11-12; 2 Kor 6, 16

- K. Nitaiweka Maskani yangu kati yenu, wala sitawachukia: nami nitakwenda kati yenu, \* nitakuwa Mungu wenu, nanyi mtakuwa watu wangu
- W. Ninyi ni hekalu la Mungu aliye hai, asema Bwana;
- K. nitakuwa Mungu wenu, nanyi mtakuwa watu wangu.

## **JUMA LA TATU LA MAJILIO**

### **DOMINIKA YA TATU YA MAJILIO**

**SOMO LA KWANZA:** Isa 29,13-24

Kiitikizano:

Isa 29, 18.19; Mt 11, 4.5

- K. Katika siku hiyo viziwi watasikia maneno ya hicho chuo; wakikombolewa toka giza, macho ya vipofu yataona; \* maskini watafurahi katika Mtakatifu wa Israeli.
- W. Nendeni mkamweleze Yohane mnayoyasikia na kuyaona: vipofu waona, viwete wanakwenda, viziwi wanasikia, na maskini wanahubiriwa habari njema;
- K. maskini watafurahi katika Mtakatifu wa Israeli.

**SOMO LA PILI:**

Toka “Hotuba” za mt. Agustino, askofu.

*Yohana ni sauti, Kristo ndiye Neno*

Yohane ni sauti. Bali juu ya Bwana: “Hapo mwanzo kulikuwako Neno”(Yn 1,1). Yohane alikuwa sauti ipitayo, Kristo ni Neno la milele aliyekuwa hapo mwanzo.

Ikiwa kwa sauti waondoa neno, yabaki nini? Pasipokuwepo na maana ya kueleweka, yanayobaki ni kelele tu. Sauti bila neno yagonga sikio, bali haijengi moyo.

Hapo twaona yatendeka nini kwenye uwanda wa mawasiliano ya fikira. Ninapofikiria ninachopaswa kusema, moyoni lasitawi neno mara. Nikitaka kusema nawe, natafuta kwa njia gani naweza kuingiza ndani yako lile neno lililomo ndani mwangu. Nalipatia mlilo na hivi, kupitia sauti, nasema nawe. Mlilo wa sauti wakupeleka yaliyomo ya kimawazo ya neno na, baada ya kukufunulia maana yake, hutoweka. Lakini neno lililopelekwa kwako na mlilo, limo tayari moyoni mwako, bila, hata hivyo, kuwa mbali na wangu.

Je, hufikiri kwamba, basi, sauti yenyewe iliyokupelekea neno, yakuambia: “Yeye hana budi kuzidi, bali mimi kupungua”? (Yn 3,30). Mlilo wa sauti imefanywa kusikika kwa kuhudumia akili

na baadaye imeenda ikisema: “Hii furaha yangu imetimia”(Yn 3,30). Tushikilie vizuri neno, tusipoteze neno lililozaliwa moyoni.

Wataka kuhakikisha jinsi sauti inavyopita na umungu wa Neno wabaki? Wapi upo sasa ubatizo wa Yohane? Aliutoa, kisha akaenda zake. Lakini ubatizo wa Yesu waendelea kutolewa. Sote twamwamini Kristo, twatarajia wokovu katika Kristo: hayo ndiyo yanayomaanisha sauti.

Na, kwa kuwa ni vigumu kutofautisha neno toka sauti, Yohane mwenyewe alifikiriwa kuwa Kristo. Sauti ilifikiriwa Neno; bali, sauti ilijitambua hivyo, ili kutoleta hasara kwa Neno. Mimi si, alisema, Kristo, wala Eliya, wala nabii. Alijibiwa: Basi, hapo wewe ni nani? Mimi ni, alisema, sauti ya yule aliaye jangwani: Tengenezeni njia ya Bwana (Yn 1,20-23). Sauti ya yule aliaye jangwani, sauti ya yule avunjaye ukimya.

Itengeneze njia yamaanisha: Mimi nasikika ili kumwingiza yeye moyoni, ila yeye hakubali kuja ninapotaka kumwingiza, msipomwandalia njia.

Yamaanisha nini: Kuandaa njia, isipokuwa: mwombe kama ipasavyo? Yamaanisha nini: Kutayarisha njia, isipokuwa muwe wanyenyekevu wa moyo? Chukueni mfano wa Yohane Mbatizaji ambaye, akifikiriwa kuwa Kristo, anena kwamba yeye si yule ambaye wengine wamfikiria kuwepo. Ajikinga vizuri asitumie kosa la wengine kwa malengo ya kujithibitisha mwenyewe. Na hata, angesema kwamba yeye alikuwa Kristo, angeliamaniwa kwa urahisi, kwa sababu watu walimwamini hivyo hata kabla hajanena. Hakusema hayo, akitambua tu aliyekuwepo. Alionyesha wazi tofauti zilizokuwepo. Alibaki katika unyenyekevu. Aliona vizuri wapi ulikuwepo wokovu. Alifahamu kwamba hakuwa ila taa ndogo, akaogopa kuzimwa na upepo wa kiburi.

#### Kiitikizano:

Yn 3, 30; 1, 27; Mk 1, 8

- K.** Yeye hana budi kuzidi, bali mimi kupungua; yeye anakuja nyuma yangu na alikuwa kabla yangu; \* ambaye sistahili kuilegeza gidamu ya kiatu chake.
- W.** Mimi naliwabatiza kwa maji; yeye atawabatiza kwa Roho Mtakatifu.
- K.** Ambaye sistahili kuilegeza gidamu ya kiatu chake.

## **JUMATATU YA TATU YA MAJILIO**

**SOMO LA KWANZA:** Isa 30,18-26

#### Kiitikizano:

Isa 30, 26.18; Zab 26, 14

- K.** Siku ile Bwana atafunga mapigo ya watu wake, Mungu wa haki ataponya pigo la jeraha yao: \* heri wote wamngoja!
- W.** Umngoje Bwana, uwe hodari, upige moyo konde:
- K.** heri wote wamngoja!

**SOMO LA PILI:**

Tokea makala “Taamuli ya Mungu” ya Yulielmo, abate wa Mt. Thierry.

*Bwana ametupenda yeye kwanza*

Wewe peke yako ni Bwana: utawala wako juu yetu ni wokovu wetu na kukutumikia kunamaanisha kwetu kuokolewa nawe.

Na upi wokovu wako, ee Bwana, ambamo zimo wokovu na baraka juu ya taifa lako, isipokuwa kupata toka kwako kukupenda na kupendwa nawe? Kwa hiyo, Bwana, ulitaka kwamba mwana wa kulia kwako na mtu uliyemfanya kwako mwenye nguvu, aitwe Yesu, yaani Mwokozi, kwani “yeye ndiye atakayewaokoa watu wake na dhambi zao” (Mt 1,21) “wala hakuna wokovu katika mwingine awaye yote”(Mdo 4,12). Yeye ametufundisha kumpenda, alipotupenda yeye kwanza mpaka kifo cha msalaba, akituchochea kwa upendo na huba kumpenda yeye, aliyetupenda kwanza mpaka mwisho.

Hasa hivi: yeye alitupenda kwanza, ili tukupende wewe; si kwamba ulihitaji upendo wetu, bali kwa sababu hatukuweza kuwa yale ambayo kwayo sisi tuliumbwa isipokuwa tukikupenda.

Kwa hiyo “alisema zamani na baba zetu katika manabii kwa sehemu nyingi na kwa njia nyingi, mwisho wa siku hizi amesema na sisi katika Mwana”(Ebr 1,1), Neno lako, “ambaye mbingu zilifanyika, na jeshi lake lote kwa pumzi ya kinywa chake” (Zab 33,6). Kusema kwako kupitia Mwana kulikuwa tu kutia chini ya jua, yaani kudhihirisha wazi, jinsi ulivyotupenda wewe usiyemwachilia Mwana wako, bali uliyemtoa kwa ajili yetu sisi sote, na yeye pia alitupenda, akajitoa mwenyewe kwa ajili yetu (Rum 8,32.37).

Hili ndilo Neno lako kwetu, Bwana, ndilo Neno lenye nguvu, ambalo wakati kimya nzito, yaani, upotovu mkuu, ulifunika vyote, toka kiti cha enzi cha kifalme, limejitupa kama mpinzani wa makosa, mwanzilishi mpole wa upendo.

Na aliyotenda, aliyonena duniani, hadi matukano, mate na makofi, mpaka msalaba na kaburi yalikuwa tu kusema kwako kwetu kupitia Mwana: chocheo la upendo wako kwa upendo wetu kwa ajili yako. Naam, wewe ulijua, ewe Mungu mwumba wa roho, kwamba upendo huo haukuweza kulazimishwa juu ya nafsi za wanadamu, bali ilihitajika kuuchochea tu. Na ulijua pia kwamba palipo lazima, hakuna uhuru tena, wala hamna hata haki.

Ulitaka, basi, kwamba tukupende sisi ambao hatukuweza hata kuokolewa kwa haki, tusingekupenda, wala tusingeweza kukupenda, tusingekuwa na kipawa toka kwako. Kweli, Bwana, kama asemavyo Mtume juu ya upendo wako nasi pia tumeshasema, wewe ulitupenda kwanza na kwanza unawapenda wale wote wakupendao.

Bali sisi twakupenda kwa huba ya upendo uliotujalia wewe. Upendo wako ni wema wako mwenyewe, ewe uliye mwema sana na mwema mno; ndiye Roho Mtakatifu atokaye kwa Baba na Mwana, yule ambaye tangu mwanzo wa uumbaji alitulia juu ya maji, yaani juu ya mawazo ya kigeugeu ya wanadamu, akijitoa kwa wote, na kuvuta vyote kwake, akiongoza, akisaidia, akipeleka mbali yanayodhuru, akijalia yanayofaa, akiunganisha Mungu nasi, na sisi kwa Mungu.

Kiitikizano:

Isa 54, 10

- K. Wema wangu hautaondoka kwako, wala agano langu la amani halitaondolewa.\* Wanao wote watakuwa wanafunzi wa Bwana: usitawi wao utakuwa mkubwa.
- W. Mimi ndiye Bwana, Mungu wako: nakufundisha kwa wema wako, nakuongoza kwenye njia ya kupitia.
- K. Wanao wote watakuwa wanafunzi wa Bwana: usitawi wao utakuwa mkubwa.

## JUMANNE YA TATU YA MAJILIO

**SOMO LA KWANZA:** Isa 30,27-33; 31,4-9

Kiitikizano:

Isa 31, 4.5; 30, 29

- K.** Bwana wa majeshi atashuka juu ya mlima Sion: \* kama ndege wanavyolinda wadogo zao, hivyo Bwana ataulinda Yerusalemu.  
**W.** Imbieni wimbo wenu kama kwenye siku ya sherehe, mtakuwa na furaha ya moyo  
**K.** kama ndege wanavyolinda wadogo zao, hivyo Bwana ataulinda Yerusalemu.

**SOMO LA PILI:**

Toka “Kumfuasa Kristo”.

*Mtu mnyenyekevu na mpole*

Msijali sana ikiwa mtu yupo kwa ajili yako au kinyume chako, bali ushughulikie kwamba Mungu awe pamoja nawe katika vyote ufanyavyo.

Uwe na dhamira njema na Mungu atakulinda vema. Hakuna ubaya wa kibinadamu utakaoweza kumdhuru yule ambaye Mungu ataka kumsaidia.

Ukijua kunyamaza na kuvumulia, utaonja bila shaka msaada wa Mungu.

Yeye ajua vema muda na namna ya kukuokoa na kwa hiyo wapaswa kukubali mapenzi yake.

Ni juu ya Mungu kumsaidia na kuokoa katika kila hali ngumu.

Mara nyingi yasaidia sana ili kuhifadhi vema unyenyekevu, kwamba wengine wajue makosa yetu na kuyakanya.

Ikiwa mmoja ajinyenyekeza kwa makosa yake, awatuliza wengine kwa urahisi na kuwaridisha wale wanaompinga.

Mungu amlinda na kumwokoa mnyenyekevu, ampenda na kumfariji; yeye amwinamia mnyenyekevu na kumpatia neema tele na baada ya kumshusha amwinua kwenye utukufu.

Yeye amfunulia mnyenyekevu siri zake na kwa upole amvuta na kumwalika kwake.

Mnyenyekevu apatapo pigo, abaki vema katika amani, kwa sababu asimama katika Mungu, wala si katika ulimwengu.

Usifikiri kwamba umefanya maendeleo yo yote usipojihesabu mdogo kuliko wote.

Hifadhi kwanza katika amani wewe mwenyewe na hivyo utaweza kuwaletea wengine amani. Mtu aletaye amani anafaa zaidi kuliko mwenye elimu.

Mtu wa mivuto ya dhambi apeleka kwenye uovu hata wema na aamini ubaya kwa urahisi.

Mtu mwema na mtulivu ageuza yote kwa wema.

Aliye kweli katika amani hatuhumu mtu ye yote; bali aliye bila heri na utulivu asumbuliwa na tuhuma nyingi: wala yeye hayumo katika amani, wala haachi wengine katika amani.

Mara nyingi anena yasiyopaswa na aacha yaliyomfaa kufanya. Yeye ashughulikia yale ambayo wengine wapaswa kufanya na anasahau yale yaliyo wajibu wake.

Uwe basi mwenye bidii kwanza pamoja nawe mwenyewe na hivyo utaweza kuwa na bidii pia pamoja na jirani yako.

Wewe wajua vema kusamehe na kupaka rangi matendo yako, bali hutaki kukubali sababu za kuomba radhi za wengine.

Ingekuwa ya haki zaidi kwamba wewe ungejishitaki mwenyewe na kumsamehe nduguyo.

Ukitaka kuvumiliwa, uwavumilie wewe pia wengine.

Kiitikizano:

Zab 25, 9-10; Zek 7, 9

- K. Bwana awaongoza wanyenyekevu kwa haki, awafundisha maskini njia zake. \* Njia zote za Mungu ni fadhili na kweli, kwao walishikao agano lake na shuhuda zake.
- W. Fanyeni hukumu za kweli, kila mtu na amwonee ndugu yake rehema na huruma.
- K. Njia zote za Mungu ni fadhili na kweli, kwao walishikao agano lake na huduma zake.

**JUMATANO YA TATU YA MAJILIO****SOMO LA KWANZA:** Isa 31,1-3; 32,1-8Kiitikizano:

Isa 32, 3.4; Yer 23, 5

- K. Hayatapofushwa tena macho ya yule aonaye na masikio yao wasikiao yatasikia; \* moyo wa wapumbavu utajifunza hekima.
- W. Nitamchipushia Daudi chipukizi la haki: yeye atamiliki na kuwa na maarifa;
- K. moyo wa wapumbavu utajifunza hekima.

**SOMO LA PILI:**

Tokea makala "Dhidi ya uzushi" ya Mt. Ireneo, askofu.

*Kwenye ujio wa Kristo, Mungu ataonekana na watu*

Mmoja ni Bwana aliye katika Neno na katika Hekima aliumba, akapanga vyote.

Huyu ndiye Neno wa Mungu, Bwana wetu Yesu Kristo, ambaye kwenye utimilifu wa nyakati alijifanya mtu kati ya watu ili kuunganisha mwisho na mwanzo wake, yaani mtu pamoja na Mungu.

Ndiyo sababu ya kwamba manabii, wakijaliwa karama yao na Neno mwenyewe, walitangaza kabla umwilisho wa yule atakayefanya ushirika kamili kati ya Mungu na mwanadamu kulingana na mpango wa milele wa Baba. Tangu mwanzo wa historia Neno alitangaza kwamba watu watamwona Mungu na kwamba Mungu angeishi pamoja nao ulimwenguni, na angesema nao na angekuwa karibu na mtu ili kumwoko, ili kukubali kufikishwa naye, ili kumkomboa toka mikononi mwa wadhalimu wao (Lk 1,71), yaani, toka roho za uharibifu na dhambi. Mungu angefanya kwamba sisi tungeweza kumtumikia kwa utakatifu na haki siku zetu zote (Lk 1,74-75). Hivyo mwanadamu, akiunganishwa na Roho wa Mugu, angeingia katika utukufu wa Baba.

Manabii walitangaza kabla kwamba Mungu angeonekana na watu, kulingana na maneno ya Bwana: "Heri wenye moyo safi, maana hao watamwona Mungu" (Mt 5,8). Bila shaka katika ukweli wa ukuu wake na utukufu wake usiosemeka hakuna atakayeweza kumwona Mungu na kuishi (Kut 33,20). Naam, Baba ni yule asiyefikika. Ila katika upendo wake, katika wema na uwezo wake alikubali kuwajalia wale wampendao fadhila na kuweza kumwona. Na ni hasa hayo waliyotangaza manabii, kwa kuwa "yasiyowezezana kwa wanadamu yawezekana kwa Mungu" (Lk 18,27). Naam, mwanadamu kwa nguvu zake tu hawezi kumwona Mungu. Lakini, Mungu akitaka hayo, katika undani wa mapenzi yake, akubali kutazamwa na yule atakaye, anapotaka na anavyotaka.

Mungu anao uwezo juu ya wote na juu ya vyote. Kwa muda alikubali kufikiwa katika ono la kinabii, kupitia Roho wake, akubali kuonekana sasa kwa njia ya Mwanawe, akitoa nafasi ya kupokelewa kama wana. Ataonekana, mwishowe, katika utimilifu wa ubaba wake. Naam, Roho awatayarisha watu katika Mwana. Mwana awaongoza kwa Baba. Baba atoa hali ya kutoharibika na uzima wa milele zitokazo kwenye ono la Mungu kwa wale wamwona. Kama wale waonao mwanga wamo nuruni na washiriki katika ung'aro wake na wapata mwangaza wake, vivyo hivyo

wale wanaomwona Mungu, wamo katika Mungu na wapokea mwangaza wake. Mwangaza wa Mungu watoa uzima: waupokea wale wanaomwona Mungu.

**Kiitikizano:**

Kum 18, 18; Lk 20, 13; Yn 6, 14

**K.** Nitawaondokeshea nabii watu wangu, nami nitatia maneno yangu kinywani mwake, \* na atawatangazia wote amri zangu.

**W.** Nitamtuma mwanangu, mpendwa wangu: huyu ni nabii yule ajaye ulimwenguni,

**K.** na atawatangazia wote amri zangu.

## ALHAMISI YA TATU YA MAJILIO

**SOMO LA KWANZA:** Isa 32,15 – 33,6

**Kiitikizano:**

Isa 32, 18.17; Yn 14, 27

**K.** Watu wangu watakaa katika kao la amani, na katika maskani zilizo salama: \* na kazi ya haki itakuwa amani.

**W.** Amani yangu nawapa: msifadhaike mioyoni mwenu, wala msiwe na woga:

**K.** na kazi ya haki itakuwa amani.

**SOMO LA PILI:**

Toka Hati ya kidogmatiki “Dei Verbum” ya Mtaguso wa Kiekumene Vatikano II juu ya Ufunuo wa Mungu.

### *Kristo akamilisha ufunuo*

Mungu, akiumba na kuhifadhi kwa njia ya Neno wake vitu vyote, awatolea watu katika viumbe ushuhuda wa kudumu juu yake na pia, akitaka kufungua njia ya wokovu wa mbinguni, tangu mwanzo alijifunua mwenyewe kwa wazazi wa kwanza.

Baada ya anguko lao la kwanza, aliwainua tena kwa tumaini la wokovu, akawashughulikia sana wanadamu, ili kuwatolea uzima wa milele wale wote ambao, kwa udumivu wa matendo mema, watafuta wokovu.

Kwa wakati wake alimwita Abrahamu, ili kumfanya taifa kubwa, ambalo, baada ya mababu, alifundisha kupitia Musa na manabii kumtambua kama Mungu wa pekee hai na wa kweli, Baba mwangalifu na Hakimu mwenye haki, na kumngojea Mwokozi aliyeahidiwa, akitayarisha hivi kwa karne kupitia njia ya Injili. Lakini Mungu, baada ya kusema “kwa sehemu nyingi na kwa njia nyingi katika manabii, mwisho wa siku hizi amesema na sisi katika Mwana” (Ebr 1,1-2). Naam, alituma Mwanawe, yaani Neno wa milele, anayewaangazia watu wote ili akae kati ya wanadamu, na kuwafunulia siri za Mungu.

Yesu Kristo, basi, Neno aliyefanyika mwili, aliyetumwa kama mtu kati ya wanadamu, “anena maneno ya Mungu” (Yn 3,34) na kutimiza matendo ya wokovu aliyokabidhiwa na Baba. Kwa hiyo yeye, ambaye mtu akimwona amemwona Baba, kwa uwepo na dhihirisho lake lote la kwake mwenyewe, kwa maneno na kwa matendo, kwa ishara na maajabu, lakini hasa kwa kifo na ufufuko wake mtukufu toka wafu, mwishowe kwa kutuma Roho Mtakatifu, ateleza ufunuo na kuuthibitisha kwa ushuhuda wa kimungu, kwamba Mungu yu pamoja nasi, ili kutuokoa toka giza la dhambi na mauti na kutufufua kwa uzima wa milele.

Uchumi wa kikristo, basi, kwakuwa ni agano jipya na la kudumu, hautapita kamwe tena, wala hamna haja ya kungojea ufunuo mwingine wo wote, kabla ya dhihirisho tukufu la Bwana wetu Yesu Kristo.

Kiitikizano:

Isa 30, 20-21; Kum 18, 15

**K.** Macho yako yatamwona mwalimu wako, \* masikio yako yatasikia neno: Njia ni hii, ifuateni”.

**W.** Bwana, Mungu wako, atakuondoshea nabii miongoni mwa ndugu zako, mwa watu wako;

**K.** masikio yako yatasikia neno: “Njia ni hii, ifuateni”.

## IJUMAA YA TATU YA MAJILIO

**SOMO LA KWANZA:** Isa 33,7-24

Kiitikizano:

Isa 33, 22; Zab 96, 1

**K.** Bwana ni sheria yetu, mfalme na hakimumu wetu: \* yeye anakuja na kutuokoa.

**W.** Bwana ametamalaki, nchi na ishangilie, visiwa vingi na vifurahi:

**K.** yeye anakuja na kutuokoa.

**SOMO LA PILI:**

Tokea “Maelezo” ya Mt. Augustino, askofu.

### *Haja yako ndiyo sala yako*

Ilinifanya kulia milio ya moyo wangu (Zab 36,9). Upo mlio wa siri wa moyo usiojulikana na mtu ye yote. Bali ikiwa dhiki ya haja yashika moyo kiasi kwamba mateso ya ndani yadhihirishwa na kusikiwa, hapo twaulizwa ipi sababu yake. Asikilizaye anena ndani mwake: Labda alia kwa sababu hiyo, labda imemtukia hayo mengine. Lakini nani aweza kuelewa hayo isipokuwa yule ambaye kwa macho yake, kwa masikio yake mlio hutolewa? Milio wanayosikia wanadamu mtu akilia, ni, hasa, milio ya mwili, lakini hausikiki mlio wa moyo. Nani, basi, alielewa kwa sababu gani alilia? Aongezea: Haja zangu zote ziko mbele yako (Zab 37,10). Si mbele ya watu wasioweza kusikia moyo, bali mbele yako ipo kila haja yangu. Haja yako ikiwepo mbele yake, Baba aonaye sirini, ataisikiliza.

Haja yako ndiyo sala yako: ikiendelea haja yako, ya kuendelea pia ni sala yako. Naam, Mtume hasemi kwa bahati: “Ombeni bila kukoma” (I The 5,17). Je, yaeleweka labda kwamba yatubidi kupiga magoti daima au kulala kufufufudi, au kuinua mikono juu ili kutii amri ya kusali bila kukoma? Tukielewa hivyo kusali, naamini kwamba hatuwezi kufanya hivi bila kukoma. Lakini ipo sala nyingine, ile ya ndani iliyo bila kukoma na ni haja. Cho chote ufanyacho, ukitamani ile sabato (iliyo pumziko katika Mungu), usiache kamwe kusali. Haja yako ni ya kuendelea, ya kuendelea ndiyo sauti yako. Utanyamaza ukiacha kupenda. Walinyamaza wale ambao imeambiwa juu yao: “Kwa sababu ya kuongezeka maasi, upendo wa wengi utapoa” (Mt 24,12). Baridi ya upendo ni ukimya wa moyo, moto wa upendo ni mlio wa moyo. Upendo ukibaki hai daima, wewe walia daima; ukilia daima, watamani daima; ukitamani, wazo lako limeelekea kwenye amani.

“Haja zangu zote ziko mbele yako” (Zab 37,10). Haja ikiwepo mbele yake, vipi yawezekana kwamba usiwepo mbele yake mlio ambao ni sauti ya haja. Kwa hiyo yeye aendelea: “Kuugua kwangu hakukusitirika kwako” (Zab 37,10), bali imesitirika kwa watu wengi. Hivyo mtumishi mnyenyekevu wa Mungu aonekana kunena: “kuugua kwangu hakukusitirika kwako”; lakini hapo yaonekana pia kwamba yeye acheka: je, labda haja ile imekufa moyoni mwake? Haja ikiwepo, mlio upo pia: hayo hayafiki daima kwenye masikio ya watu, bali haikomi kufika masikioni mwa Mungu.



Kiitikizano:

Mt. Agustino, Maelezo kwa Zab 86,1

- K.** Twatembea katika Kristo, wahiji ulimwenguni; na tunapoelekea kwenye kikomo, wimbo waamsha haja yake. \* Aliye na haja, hata akinyamaza kwa kinywa, aimba moyoni.
- W.** Asiyee na haja, alie atakacho, ila ni bubu kwa Mungu;
- K.** Aliye na haja, hata akinyamaza kwa kinywa, aimba moyoni.

**JUMAMOSI YA TATU YA MAJILIO****Siku hiyo husemwa yote kulingana na siku ifaayo, kuanzia 17 Disemba****17 DISEMBA****SOMO LA KWANZA :** Isa 45,1-13Kiitikizano:

Isa 45, 8; rej 16, 1

- K.** Dondokeni, enyi mbingu toka juu, mawingu na yamwage Mwenye haki; \* nchi na ifunuke, nayo itoe Mwokozi.
- W.** Peleka, Bwana Mwanakondoo, Mtawala wa dunia; aje toka jangwani, mpaka mlima wa Sion.
- K.** nchi na ifunuke, nayo itoe Mwokozi.

**SOMO LA PILI:**

Toka “Nyaraka” za mt. Leo Mkuu, papa.

*Sakramenti ya upatanisho wetu*

Haisaidii kitu kusema kwamba Bwana wetu ni mwana wa Bikira Maria mtukufu, mtu kweli na mkamilifu, usipomwamini kuwa mtu wa ukoo ule ambao husemwa juu yake katika Injili. Mathayo aandika:

“Kitabu cha ukoo wa Yesu Kristo, mwana wa Daudi, mwana wa Abrahamu (Mt 1,1). Wafuata utaratibu wa ukoo wa kibinadamu pamoja na vizazi vyote mpaka Yosefu, aliyemwoa Mama wa Bwana. Ila Luka, akielekea nyuma kwenye mfululizo wa ukoo, amtaja kichwa mwenyewe wa ukoo wa kibinadamu ili kuonyesha kwamba Adamu wa kwanza na wa mwisho ni wa umbile lile lile.

Hakika uwezo wa Mwana wa Mungu, ili kuwafundisha na kuwahesabia haki wanadamu ungeweza kujidhihirisha kama alivyofanya kwa mababu na manabii, chini ya sura ya mwanadamu, kama wakati alipokabili pambano dhidi ya Yakobo, au alizungumza, akakubali ukaribisho wa mgeni, au akala chakula kilichotolewa kwake. Lakini mifano ile ilikuwa tu ishara za mtu huyu ambaye, kama zilivyotangaza dalili za kifumbo, angalichukua umbile halisi la ukoo wa mababu waliomtangulia.

Naam, hakuna mfano ulioweza kutekeleza sakramenti ya upatanisho wetu, ulioandaliwa tangu milele yote, kwa kuwa Roho Mtakatifu hajashuka bado juu ya Bikira, wala uwezo wa Aliye juu haujamfunika bado kwa kivuli chake. Hekima haijajenga nyumba yake bila doa tumboni mwa Maria. Neno hajachukua mwili bado. Mwumba wa nyakati hajazaliwa bado kwenye nyakati, akiunganisha ndani mwake katika nafsi moja umbile la Mungu na umbile la mtumishi. Yule ambaye kupitia kwake vyote vimeumbwa, alipaswa mwenyewe kuzaliwa kati ya viumbe vingine vyote.

Ikiwa mtu huyu mpya, aliyefanywa kwa mfano wa mwili ulio wa dhambi (Rum 8,3), asingechukua utu wetu wa kale, naye aliye wa umbile moja na Baba asingekubali kuwa wa umbile moja na Mama na ikiwa yeye aliye tu huru toka dhambi, asingeunganisha kwake umbile letu la kibinadamu, umbile lote la kibinadamu lingebaki kifungani chini ya nira ya shetani. Sisi tusingeweza kushiriki kwenye ushindi wake mtukufu, ushindi ungepatikana nje ya umbile letu.

Pamoja na kushiriki kwa ajabu umbile letu, iling'aa kwetu sakramenti ya kuzaliwa upya, ili, kwa sababu ya Roho huyo huyo ambaye toka kwake ameshikwa mimba na kuzaliwa Kristo, sisi pia, tuliozaliwa toka tamaa ya mwili, tuzaliwe upya kwa uzazi wa kiroho. Kwa hiyo mwiinjilisti anena juu ya waumini: “Waliozaliwa, si kwa damu, wala si kwa mapenzi ya mwili, wala si kwa mapenzi ya mtu, bali kwa Mungu” (Yn 1,13).

#### Kiitikizano:

Isa 11, 10; Lk 1, 32

- K. Tazama, chipukizi la Yesse lasimama kwa wokovu wa watu; mataifa watamtafuta; \* jina lake litakuwa tukufu.
- W. Bwana Mungu atampa kiti cha enzi cha Daudi baba yake; na ataimiliki nyumba ya Yakobo hata milele;
- K. jina lake litakuwa tukufu.

## **JUMA LA NNE LA MAJILIO**

### **18 DESEMBA**

**SOMO LA KWANZA:** Isa 46, 1-13

#### Kiitikizano:

Isa 46, 12-13

- K. Nisikilizeni, enyo mlio na moyo mshupavu, mlio mbali na haki. \* Mimi nitatoa wokovu kwa Israeli katika Sion.
- W. Mimi nitaleta karibu haki yangu, haitakuwa mbali, na wokovu wangu hautakawia.
- K. Mimi nitatoa wokovu kwa Israeli katika Sion.

#### **SOMO LA PILI:**

Toka “Waraka kwa Diogneto”.

#### *Mungu alifunua upendo wake kupitia Mwana*

Hakuna mtu kweli aliyemwona Mungu kamwe wala kumjulisha, bali yeye mwenyewe alijifunua. Na amejifunua katika imani, ambayo kwake tu imejaliwa kumwona Mungu. Naam Mungu, Bwana na Mwumba wa vyote, aliyeanzisha vyote, akapanga vyote kulingana na utaratibu fulani, sio tu kwamba awapenda watu, bali ni pia mkarimu. Naye alikuwa daima hivi, alivyo bado na ndivyo atakavyokuwa: mwenye kupenda, mwema, mkarimu, mwaminifu; yeye peke yake ni mwema kweli. Na, kwa kuwa aliunda moyoni mpango mkuu na usiosemeke, aujalia Mwanawe tu.

Kwa muda wote ambamo aliweka na kuhifadhi katika fumbo mpango wake wa hekima, ilionekana kwamba alitusahau na kutotufikiria; bali, wakati ambapo kupitia Mwanawe mpendwa alifunua na kujulisha yale yaliyoandaliwa tangu mwanzo, alitutolea yote pamoja: kufurahia mema yake, kuyatazama na kuyafahamu. Nani kati yetu angetarajia fadhila hizo zote?

Baada ya kupanga yote ndani yake pamoja na Mwana, aliruhusu kwamba sisi, mpaka muda uliotabiriwa, tungebaki chini ya mawazo ya misukumo mibaya na tungepelekwa nje ya njia nyofu

na tamaa na anasa, tukifuata matakwa yetu. Bila shaka yeye hakufurahia dhambi zetu, bali alizivumilia; wala hakuweza kuidhinisha muda ule wa upotovu, bali aliandaa muda huu wa haki, ili, tukijitambua wazi wakati ule watu wasiostahili uzima kwa sababu ya matendo yetu, tungepata kuwa wastahilio kwa huruma yake na ili kwamba, baada ya kuonyesha kutoweza kwetu kuingia kwa nguvu zetu katika ufalme wake, tungalifaulu kwa uwezo wake.

Wakati ambapo uonevu wetu ulifika kwenye upeo na ilikuwa wazi kwamba ilibaki, kama thawabu, adhabu tu na kifo, na ulifika muda uliopangwa na Mungu ili kufunua upendo na uwezo wake (ee wema na upendo mkuu wa Mungu!), yeye hakutuchukia, wala kutukataa, wala kufanya fitina. Bali alivumilia kwa subira. Katika huruma yake alichukua juu yake dhambi zetu. Alitoa kwa hiari Mwanawe kama bei ya ukombozi wetu: mtakatifu kwa wabaya, yule bila hatia kwa waovu, asiye haribika kwa waharibikao, asiye kufa kwa wanaokufa. Kitu gani kingeweza kufuta makosa yetu, isipokuwa haki yake? Vipi tungeweza sisi tuliopotoka na wabaya kupata haki upya isipokuwa katika Mwana wa pekee wa Mungu?

Ee badiliko tamu, ee uumbaji usiosemeke, ee utajiri usiotarajiwa wa fadhila: uonevu wa wengi ulisamehewa kwa ajili ya mwenye haki mmoja na haki na mmoja iliondoa uovu wa wengi!

#### Kiitikizano:

Mdo 4, 12; Isa 9, 6

- K. Hakuna wokovu katika ulimwengu na katika mwingine awaye yote; \* hapana jina jingine chini ya mbingu tunaloweza kuokolewa kwalo.
- W. Jina lake ni: Mshauri wa ajabu, Mungu mwenye nguvu, Baba wa ulimwengu ujao, Mfalme wa amani;
- K. hapana jina jingine chini ya mbingu tunaloweza kuokolewa kwalo.

## 19 DISEMBA

**SOMO LA KWANZA:** Isa 47,1.3b-15

#### Kiitikizano:

Isa 49,13; 47,4

- K. Imbeni, enyi mbingu, ufurahi, ee nchi; pazeni sauti ya kuimba, enyi milima: \* Bwana awafariji watu wake.
- W. Mkombozi wetu ni Bwana wa majeshi, Mtakatifu wa Israeli:
- K. Bwana awafariji watu wake.

#### **SOMO LA PILI:**

Tokea “Makala dhidi ya uzushi” ya Mt. Ireneo, askofu.

#### *Umwilisho uliotukomboa*

Mungu na kazi zote za Mungu ni utukufu wa mwanadamu; na mtu ni makao zinamokusanywa hekima zote na uwezo wa Mungu. Kama daktari aonyesha ufundi wake katika wagonjwa, vile vile Mungu ajidhihirisha mwenyewe katika wanadamu. Kwa hiyo Paulo anena: Mungu amewafunga wote katika kuasi, ili awarehemu wote (Rum 11,32). Hasemi juu ya mamlaka za kiroho, bali juu ya mtu aliyejiweka mbele ya Mungu katika hali ya kuasi, akapoteza hali ya kutokufa. Lakini mara akapewa huruma ya Mungu kwa mastahili na maombezi ya Mwanawe. Akapata hivi heshima ya mwana wa kupokelewa.

Ikiwa mtu atapokea bila kiburi batili, utukufu halisi utokanao na yale yaliyoumbwa kwa yule aliyeyaumba, yaani, Mungu mwenyezi, mwumba wa vyote vilivyopo, na ikiwa atabaki katika kumpenda yeye kwa utii wa heshima na shukrani ya kudumu, atapokea bado utukufu mkuu zaidi na atasonga mbele daima katika njia hii, mpaka atakapokuwa kama yule aliyekufa kwa kumwoko.

Mwana mwenyewe wa Mungu alishuka katika “mfano wa mwili ulio wa dhambi”(Rum 8,3) ili kuhukumu dhambi, na, baada ya kuihukumu, kuifukuza kabisa kutoka wanadamu. Akaita mtu ili afanane naye mwenyewe, akamfanya mfuasi wa Mungu, akamweka kwenye njia iliyoonyeshwa na Baba ili aweze kumwona Mungu, akampa Baba kama zawadi.

Neno wa Mungu aliweka makao yake kati ya watu, akajifanya Mwanadamu ili kumzoeza mtu kumfahamu Mungu na kumzoeza Mungu kuweka makao yake katika mwanadamu, kulingana na mapenzi ya Baba. Kwa hiyo Mungu mwenyewe alitupa kama “ishara” ya wokovu wetu yule ambaye, akizaliwa toka Bikira, ni Emmanueli: kwa kuwa Bwana mwenyewe alikuwa yule aliyeokoa wale ambao kwa sababu yao wenyewe hawakuwa na uwezo wa wokovu.

Kwa hiyo Paulo, akionyesha udhaifu wa msingi wa mwanadamu, anena: “Najua ya kuwa ndani yangu, yaani, ndani ya mwili wangu, halikai neno jema” (Rum 7,18), kwa sababu wema wa wokovu wetu hautoki kwetu, bali toka kwa Mungu. Na bado Paulo asema kwa sauti: “Ole wangu maskini mimi! Nani ataniokoa na mwili huu wa mauti?” (Rum 7,24). Hapo amtambulisha mkombozi: Upendo wa bure wa Bwana wetu Yesu Kristo (Rum 7,25).

Isaya mwenyewe alitabiri hayo: Itieni nguvu mikono iliyo dhaifu, yafanyeni imara magoti yaliyolegea, jipeni moyo walio na moyo wa hofu, farijeni, msio gope; tazama, Mungu wetu atenda haki, atatoa thawabu. Yeye mwenyewe atakuja na kutuokoa sisi (Isa 35,4).

Hayo yaonyesha kwamba si kutoka kwetu, bali kutoka Mungu, atusaidiaye, kwamba tunao wokovu.

#### Kiitikizano:

Yer 31, 10; 4, 5

**K.** Lisikilizeni neno la Bwana, enyi mataifa; litangazeni mpaka miisho ya nchi; mkawaambie visiwa vya mbali: \* Yuaja Mungu wetu.

**W.** Hubirini ulimwenguni tangazo:

**K.** Yuaja Mungu wetu.

## 20 DISEMBA

**SOMO LA KWANZA:** Isa 48,1-11

#### Kiitikizano:

Isa 48, 10-11; 54, 8

**K.** Nimekusafisha katika tanuru ya mateso. Kwa ajili yangu, kwa ajili ya nafsi yangu mimi natenda:  
\* wala sitampa mwingine utukufu wangu.

**W.** Kwa gadhabu nalikuficha uso wangu dakika moja; lakini kwa fadhili za milele nilikurehemu:

**K.** wala sitampa mwingine utukufu wangu

**SOMO LA PILI:**

Toka “Homilia juu ya Bikira Maria” ya Mt. Bernardo, abate.

*Ulimwengu wote wangojea jibu la Maria*

Je, umesikia, Bikira, kwamba utapata mimba na utamzaa mwana; umesikia kwamba hayo yatatukia si kwa kazi ya mwanadamu, bali kwa tendo la Roho Mtakatifu. Malaika angojea jibu: apaswa kurudi kwa Mungu aliyemtuma. Twangojea, ee Bikira, neno la huruma hata sisi, sisi tunaodhulumiwa vibaya na hati ya hukumu..

Tazama kwamba imetolewa bei ya wokovu wetu: ukikubali tutakombolewa mara. Sisi sote tumeumbwa na Neno la milele wa Mungu, bali sasa tumetiwa chini ya mauti: kwa jibu lako fupi, twapaswa kufanywa upya na kuhuishwa tena.

Akuomba kwa machozi, ee Bikira mtauwa, Adamu mkimbizi toka paradisi pamoja na ukoo wake mnyonge; wakuomba pia Abrahamu na Daudi; wakusihi kwa dhati mababa watakatifu walio mababa yako, ambao waliishi pia katika eneo la giza la mauti. Ulimwengu wote umo katika taraja, wakiwa kifudufudi kwenye magoti yako: tokea kinywani mwako yategemea faraja ya wanyonge, ukombozi wa wahukumiwa, wokovu wa watu wote, wa ukoo wote wa wanadamu.

Ee Bikira, jibu haraka. Umwitikie malaika kwa bidii, au, zaidi, Bwana kupitia malaika. Jibu neno lako, ukampokee Neno: sema neno lako la kibinadamu, ukachukue mimba ya Neno la Mungu, utamke neno lipitalo, ukapokee Neno la milele.

Kwa nini unachelewa? Kwa nini kuogopa? Uiamini kazi ya Bwana, uitolee ukubaliano wako, ukaipokee. Katika unyenyekevu wako uchukue ujasiri, katika kicho chako, jipe moyo. Kwa njia yo yote wapaswa sasa, katika urahisi wako wa kibikira, kusahau upole; ila katika jambo hili tu, ee Bikira mpole, wapaswa kutoogopa ujasiri. Kwa kuwa, ikiwa katika kimya wakubaliwa unyenyekevu, sasa yahitajika, hasa, utauwa katika neno. Fungua, ee Bikira mtukufu, moyo kwa imani, midomo kwa kukubali, tumbo kwa Mwumba. Tazama yule ambaye tamaa ya watu wote imeelekea kwake, apiga hodi mlangoni. Isitukie kwamba wakati ambapo wasikia mashaka, yeye apite mbele, nawe kwenye maumivu uhitaji kuanza upya kutafuta yule umpendaye. Inuka, kimbia, fungua! Inuka kwa imani, kimbia kwa utauwa, fungua kwa kukubali kwako.

“Tazama”, anena, “mimi ni mjakazi wa Bwana; na iwe kwangu kama ulivyosema” (Lk 1,38).

**Kiitikizano:**

Lk 1, 31.42

**K.** Pokea neno, Bikira Maria, tangazo la malaika wa Bwana: Utachukua mimba tumboni mwako ya mtu-Mungu. \* Watasema juu yako: Mbarikiwa katika wanawake!

**W.** Utamzaa mtoto mwanamume, nawe utakuwa mama bikira daima.

**K.** Watasema juu yako: Mbarikiwa katika wanawake!

**21 DISEMBA**

**SOMO LA KWANZA:** Isa 48,12-21; 49,9b-13

**Kiitikizano:**

Isa 49, 13; Zab 71, 7

**K.** Imbeni, enyi mbingu; ufurahi, ee nchi; enyi milima, pazeni sauti ya kuimba: \* yuaja Bwana na kuwafariji watu wake.

**W.** Katika siku zake haki itasitawi na amani itakuwa nyingi:

**K.** yuaja Bwana na kuwafariji watu wake.

**SOMO LA PILI:**

Tokea “Maelezo juu ya Mt. Luka” ya mt. Ambrosio, askofu.

*Maria anamtembelea Elisabeti*

Malaika, aliyetangaza fumbo, alitaka kuhakikisha ukweli kwa uthibitisho, akamjulisha bikira Maria umama wa mwanamke mzee na tasa, ili kuonyesha hivi kwamba yawezekana yote Mungu atakayo. Mara baada ya kusikiliza hayo Maria alienda mbio kwenye mlima, si kwa sababu hakuamini unabii au tangazo au alisikia shaka juu ya jaribio, bali kwa sababu alifurahia ahadi, akataka kutekeleza kwa utauwa utumishi, kwa msukumo uliotoka kwenye furaha ya ndani. Wapi hapo, akijaa Mungu, aliweza kuharakisha kuenda isipokuwa kuelekea juu? Neema ya Roho Mtakatifu hairuhusu kuchelewa.

Mara moja manufaa ya ujio wa Maria na ya uwepo wa Bwana zinasikika. Naam, mara, baada ya Elisabeti kusikia amkio la Maria, kitoto kichanga kikaruka ndani ya tumbo lake, naye akajazwa na Roho Mtakatifu (Lk 1,41). Mtu apaswa kuwa na uangalifu kwa uteuzi wa maneno na maana yake. Elisabeti alisikia kwanza sauti, lakini Yohane alionja kabla neema; yeye alisikia kulingana na utaratibu wa maumbile, Yohane kulingana na fumbo; Elisabeti alisikia ujio wa Maria, yeye wa Bwana; mjamzito ujio wa mjamzito, mtoto ujio wa mtoto. Wao wanena juu ya neema walizopata, watoto, tumboni mwa mama zao watekeleza neema na fumbo la huruma kwa manufaa ya mama wenyewe: na hao, kwa sababu ya mwujiza maradufu, watabiri chini ya mwongozo wa wana wanaobeba.

Juu ya mtoto yanenwa kwamba alifurahi, juu ya mama kwamba alijazwa na Roho Mtakatifu. Hakuwa wa kwanza kujazwa na Roho mama, bali mwana, akijaa Roho Mtakatifu, kujaza pia mama.

Alifurahi Yohane, ikafurahi pia roho ya Maria. Lakini wakati juu ya Elisabeti yanenwa kwamba alijazwa na Roho Mtakatifu, Yohane alipofurahi, juu ya Maria aliyejaa tayari Roho Mtakatifu, yanenwa kwamba roho yake ilifurahi. Yule asiyeleweka, alitenda kwa njia isiyeleweka katika mama. Mmoja, Elisabeti, alijazwa na Roho Mtakatifu, baada ya kupata mimba, bali Maria kabla ya kupata mimba.

Heri –alinena- wewe uliyesadiki (Lk 1,45). Bali wenye heri ninyi mlisikia na kuamini: kila roho aaminiye apata mimba na kuzaa Neno wa Mungu na kutambua matendo yake.

Iwe katika kila mmoja roho ya Maria ili kumtukuza Bwana; iwe katika kila mmoja nafsi ya Maria ili kumfurahia Mungu. Ikiwa, kulingana na mwili, mama wa Kristo ni mmoja tu, kulingana na imani, Kristo ni tunda la wote, kwa kuwa kila roho apokea Neno wa Mungu, mradi bila doa na desturi mbaya, ihifadhi usafi kwa soni bila ila. Kila roho atakayeweza kubaki hivyo, amtukuza Bwana, kama alivyoitukuza Bwana nafsi ya Maria na roho yake ilimfurahia Mungu mwokozi.

Kama mlivyoweza kusoma pengine: Mtukuzeni Bwana pamoja nami (Zab 33,4), Bwana anatukuzwa si kwa sababu neno la kibinadamu laweza kuongezea ukuu wa Bwana kitu, bali kwa sababu yeye anatukuzwa katika sisi. Kristo ni mfano wa Mungu: kwa hiyo, roho atendaye matendo ya haki na utauwa, aitukuza sura ya Mungu, aliyumbwa kwa mfano wake, na, anapomtukuza, ashiriki kwa namna fulani kwenye ukuu wake na kuinuka.

Kiitikizano:

Lk 1, 45-46; Zab 66, 16

**K.** Nawe heri uliyesadiki: ndani yako yatatimizwa maneno ya Bwana. Na Maria alisema: \* Roho yangu yamtukuza Bwana.

**W.** Njoni, sikieni, nami nitasimulia aliyonitendea Mungu.

**K.** Roho yangu yamtukuza Bwana.

## 22 DISEMBA

**SOMO LA KWANZA:** Isa 49,14 – 50,1

Kiitikizano:

Isa 49, 15; Zab 26, 10

- K.** Je, mwanamke aweza kumsahau mtoto wake, hata asimhurumie mwana wa tumbo lake? \* Hata ikiwa mwanamke angesahau, mimi sitakusahau kamwe, asema Bwana.
- W.** Baba yangu na mama yangu wameniacha, bali Bwana amenikaribisha kwake.
- K.** Hata ikiwa mwanamke angesahau, mimi sitakusahau kamwe, asema Bwana.

**SOMO LA PILI:**

Toka “Maelezo juu ya mt. Luka” ya Mt. Beda Mbarikiwa, mpresbiteri.

### *Magnificat*

Maria asema: Moyo wangu wamtukuza Bwana na roho yangu imemfurahia Mungu, Mwokozi wangu (Lk 1,46). Anena: Bwana ameniinua kwa zawadi kubwa na isiyosikika hivi hata haisimuliki kwa lugha yo yote: ni vigumu kwa moyo kuifahamu kwa undani. Nainua, basi, tenzi ya shukrani kwa nguvu zote za roho yangu, na kujitoa, na yale yote ninayoishi, ninasikia na kufahamu, kwa taamuli ya ukuu usiopimika wa Mungu, kwani roho yangu yaufurahia umungu wa milele wa yule Yesu mwenyewe, yaani wa Mwokozi, ambaye toka kwake nafsi yangu imepata mimba ya muda.

Kwa kuwa Mwenye nguvu amenitendea makuu, na jina lake ni takatifu (Lk 1,49). Fikiria mwanzo wa tenzi iliponenwa: “Moyo wangu wamtukuza Bwana”. Kweli roho ile tu ambaye Bwana amekubali kuifanyia makuu yaweza kumtukuza kwa sifa istahiliyo na kuwashauri wale wote washirikio ahadi ile ile na mpango ule ule wa wokovu: Mtukuzeni Bwana pamoja nami, na tuliadhimisha jina lake pamoja (Zab 34,3). Atakayesahau, kwa yale awezayo, kumtukuza Bwana aliyemjua na kuadhimisha jina lake “ataitwa mdogo kabisa katika ufalme wa mbinguni” (Mt 5,19).

Pia jina lake laitwa takatifu kwa sababu kwa ukuu wa uwezo wake wa pekee lapita kila kiumbe, tena lazidi sana yale yote aliyounda.

“Amemsaidia Israeli, mtumishi wake, ili kukumbuka rehema zake” (Lk 1,54). Atamka vizuri Israeli mtumishi wa Bwana, yaani, mtiifu na mnyenyekevu, kwa kuwa amepokelewa naye ili kuokoka, kulingana na yale anenayo Hosea: Israeli ni mtumishi wangu, nami nilimpenda (Hos 11, 1). Yaani, yule anayekataa kunyenyekea hawezi kuokolewa, wala kusema pamoja na nabii: “Tazama, Mungu ndiye anayenisaidia; Bwana ndiye anayenitegemeza nafsi yangu” (Zab 54,4) na: yeyote ajinyenyekeshaye kama mtoto, atakuwa mkuu katika ufalme wa mbinguni (Mt 18,4).

“Kama alivyowaambia baba zetu, Abrahamu na uzao wake hata milele” (Lk 1,55). Yafahamika uzao wa kiroho wa Abrahamu, si wa kimwili; yaani, waliomo sio tu waliozaliwa kufuatana na mwili, bali waliofuata nyayo za imani yake, iwe katika tohara, au katika kutotahiriwa. Hata yeye aliamini alipokuwa hajatahiriwa bado, akahesabiwa haki. Ujio wa Mwokozi uliahidiwa kwa Abrahamu na uzao wake, yaani, kwa wana wa ahadi, walioambiwa: “Na kama ninyi ni wa Kristo, basi, mmekuwa uzao wa Abrahamu, na warithi sawasawa na ahadi” (Gal 3,29).

Ni ya kusisitiza kwamba mama, yule wa Bwana na yule wa Yohane, wabashiri kuzaliwa kwa wanao: na hayo ni sawa kwani kama dhambi ilivyoanza na mwanamke, vile vile toka wanawake zinaanza fadhila, na kama dunia ilipata mauti kwa kudanganywa kwa mwanamke, vivyo hivyo toka wanawake wawili wanaotabiri kwa pamoja, uzima urudishwe.

Kiitikizano:

Lk 1, 48-50

K. Vizazi vyote wataniita mbarikiwa: Mwenye nguvu amenitendea makuu: \* Jina lake ni takatifu.

W. Toka vizazi hata vizazi rehema zake kwa hao wanaomcha:

K. Jina lake ni takatifu.

## 23 DISEMBA

**SOMO LA KWANZA:** Isa 51,1-11

Kiitikizano:

Isa 51, 4; 35, 10

K. Nisikilizeni mimi, enyi watu wangu; nisikieni taifa langu: \* Mwenye haki yu sasa karibu, yuaja Mwokozi.

W. Watarudi waliokombolewa na Bwana, watafika Sion wakiimba

K. Mwenye haki yu sasa karibu, yuaja Mwokozi.

**SOMO LA PILI :**

Tokea “Makala dhidi ya Noeto” ya Mt. Hipolito, mpresbiteri.

### *Ufunuo wa Mungu asiyeonekana*

Ndugu, Mungu ni mmoja tu, yule tusiyemjua sisi kwa njia nyingine isipokuwa ile ya Maandiko Matakatiifu.

Sisi twapaswa, basi, kujua yote ambayo Maandiko ya Mungu yatutangazia na kufahamu yote yanayotufundisha. Twapaswa kumwamini Baba, kama yeye ataka sisi tumwamini, kumtukuza Mwana atakavyo tumtukuze, kumpokea Roho Mtakatifu anavyotamani sisi tumpokee.

Tujaribu kufikia kufahamu mambo ya Mungu si kulingana na akili yetu, na bila kulazimisha vipawa vya Mungu, bali kwa njia aliyotaka yeye mwenyewe kujifunua katika Maandiko Matakatiifu.

Mungu alikuwepo ndani yake, peke yake kabisa. Hakuna kilichoshiriki kamwe umilele wake. Hapo aliamua kuumba ulimwengu. Kama alivyofikiri na kutaka na kama alivyoieleza kwa neno lake, ndivyo alivyoumba. Hivyo, ulimwengu ulianza kuwepo kama alivyotaka. Na kama alivyopanga, ndivyo alivyotekeleza. Basi, Mungu alikuwepo katika upekee wake, wala hakuna kitu kilichokuwa na umilele pamoja naye. Hakuna kilichokuwepo isipokuwa Mungu. Yeye alikuwa peke yake, lakini mkamilifu katika vyote. Ndani yake zilikuwepo akili, hekima, uwezo na shauri. Yote yalikuwa ndani yake, naye alikuwa yote. Alipotaka na kwa kipimo alichotaka, yeye, katika muda uliopangwa naye, alitufunulia Neno lake ambaye kwa njia yake aliumba vitu vyote.

Kwa kuwa Mungu alikuwa ndani yake na Neno lake, nalo lilikuwa lisilofikika kwa vitu vilivyoumbwa, alilifanya lenye kufikika. Akitamka neno la kwanza, na, akizaa mwanga toka mwanga, alijulisha kwa maumbile yote kama Bwana Fikira yake mwenyewe, akafanya aonekane yule ambaye yeye tu alijua na kuona ndani yake mwenyewe na kabla alikuwa hajaonekana kabisa kwa ulimwengu uliyoumbwa. Alimfunua ili ulimwengu umwone na hivi uweze kukombolewa.

Hii ndiyo Hekima ambayo, akija ulimwenguni, alijifunua kama Mwana wa Mungu. Yote yaliumbwa kwa njia yake, ila yeye ndiye wa pekee ajaye toka kwa Baba.

Huyu ndiye aliyetoa sheria na manabii, akawafanya kunena katika Roho Mtakatifu, ili wakipokea mwongozo toka uwezo wa Baba, wangetangaza nia na mpango wa Baba.

Hivyo, basi, amefunuliwa Neno la Mungu, asemavyo mbarikiwa Yohane, anayerudia kwa ufupi yaliyonenwa na manabii, yakionyesha kwamba huyu ndiye Neno ambamo yote yaliumbwa.



Asema Yohane: “Hapo mwanzo kulikuwako Neno, naye Neno alikuwa kwa Mungu, naye Neno alikuwa Mungu. Vyote vilifanyika kwa huyu, wala pasipo yeye hakikufanyika cho chote”(Yn 1,1.3).

Mbele zaidi anena: Kwa yeye ulimwengu ulipata kuwako, wala ulimwengu haukumtambua. Alikuwa kwake, wala walio wake hawakumpokea (Yn 1,10-11).

Kiitikizano:

Isa 9, 6.7; Yn 1, 4

**K.** Kwa ajili yetu mtoto atazaliwa, na ataitwa Mungu mwenye nguvu; \* atatawala juu ya kiti cha enzi cha Daudi, baba yake, na atabeba ishara za uwezo.

**W.** Ndani yake ulikuwemo uzima, nao uzima ulikuwa nuru ya watu.

**K.** Atatawala juu ya kiti cha enzi cha Daudi, baba yake, na atabeba ishara za uwezo.

## 24 DISEMBA

**SOMO LA KWANZA :** Isa 51,17 – 52,2.7-10

Kiitikizano:

Kut 19, 10.11; Kum 7,15; Dan 9, 24

**K.** Jitakaseni, watu wa Mungu: kesho atakuja Bwana; \* naye atawaondolea kila ugonjwa.

**W.** Makosa yatakomesha na atatawala juu yetu Mwokozi wa ulimwengu:

**K.** naye atawaondolea kila ugonjwa.

**SOMO LA PILI:**

Toka “Hotuba” za Mt. Agustino, Askofu.

*Ukweli umechipuka toka nchi na haki imetokea toka mbinguni*

Amka, ee mwanadamu: kwa ajili yako Mungu amejifanya mtu. “Amka, wewe usenziaye, ufufuke katika wafu, na Kristo atakuangaza” (Efe 5,14). Kwako, nasema, Mungu amejifanya mtu.

Ungekuwa mfu kwa daima, asingezaliwa yeye katika muda. Hangekomboa maumbile yako toka dhambi, asingechukua maumbile yenye kufanana na yale ya dhambi. Unyonge wa kudumu ungekushika, isingetolewa huruma hiyo. Hungepata tena uzima, asingejikuta yeye na mauti yako mwenyewe. Ungeshindwa asingekusaidia. Ungeangamizwa, asingekuja.

Tujitayarishe kuadhimisha kwa shangwe ujio wa wokovu wetu, wa ukombozi wetu; kuadhimisha sherehe ambamo sikukuu ya milele imekuja toka sikukuu yake ya milele katika siku yetu ya muda mfupi hivi. Yeye amekuwa kwetu haki, utakatifu na ukombozi ili, kama ilivyoandikwa, yeye aonaye fahari na aone fahari katika Bwana (I Kor 1,30-31).

Kweli imechipuka toka nchi (Zab 85,11): toka Bikira amezaliwa Kristo aliyesema: Mimi ni kweli (Yn 14,6). Na haki imechungulia toka mbinguni (Zab 84,12). Mtu amwaminiye Kristo, aliyezaliwa kwa ajili yetu, hapokei wokovu toka yeye mwenyewe, bali toka kwa Mungu. Kweli imechipuka toka nchi, kwa sababu “Neno alifanyika mwili”(Yn 1,14). Na haki imechungulia toka mbinguni, kwa kuwa “kila kutoa kuliko kwema na kila kitolewacho kilicho kamili, hutoka juu”(Yak 1,17). Kweli imechipuka toka nchi: mwili wa Maria. Na haki imechungulia toka mbinguni, kwani mtu hawezi kupokea kitu toka kwake, asipojaliwa toka mbinguni (Yn 3,27).

“Tukisha kuhesabiwa haki, tunayo amani kwa Mungu” (Rum 5,1) kwa sababu haki na amani zimebusiana (Zab 85,10) kupitia Bwana wetu Yesu Kristo, kwa kuwa kweli imechipuka toka nchi (Zab 85,11). Kupitia kwake tunayo njia kwa neema hiyo ambamo tunajikuta na ambayo juu yake twafurahi katika tumaini la utukufu wa Mungu (Rum 5,2). Hasemi la utukufu wetu, bali la utukufu

wa Mungu, kwa sababu haki haitoki kwetu, bali imechungulia toka mbinguni. Kwa hiyo yule aonaye fahari na aone fahari katika Bwana, wala si katika yeye mwenyewe.

Naam, toka mbinguni, kwa kuzaliwa kwa Bwana toka Bikira, imesikika tenzi ya malaika: Atukuzwe Mungu juu mbinguni na amani duniani kwa watu wa mapenzi mema (Lk 2,14). Vipi amani ingekuja kwenye nchi, isipokuwa kwa sababu kweli imechipuka toka nchi, yaani Kristo amezaliwa toka mwili? Yeye ni amani yetu, yeye ambaye toka mataifa mawili alifanya kuwa moja (Efe 2,14), ili tuwe watu wa mapenzi mema, tukiungana vizuri kwa kifungo kitamu cha umoja.

Tufurahie, basi, neema hiyo, ili utukufu wetu uwe ushuhuda wa dhamira yetu njema. Hatuoni fahari juu yetu wenyewe, bali katika Bwana. Imeambiwa: “U utukufu wangu na mwinua kichwa changu” (Zab 3,4): Na ipi neema kubwa zaidi iliweza kung’aa mbele yetu? Akiwa Mwana wa pekee, Mungu amemfanya mwanadamu, na hivyo alimfanya mwanadamu kuwa mwana wa Mungu. Tafuta mastahili, sababu, haki ya hayo yote na uone ikiwa wapata kitu kingine isipokuwa neema.

#### Kiitikizano:

Isa 11, 1. 5. 2

- K.** Litatoka chipukizi katika shina la Yesse, tawi litatoka katika mizizi yake: haki itakuwa mshipi wa viuno vyake, \* uaminifu ni mshipi wa kujifungia.
- W.** Roho ya Bwana atakaa juu yake, roho ya hekima na ufahamu, roho ya shauri na uweza;
- K.** uaminifu ni mshipi wa kujifungia.

## KIPINDI CHA NOELI

### DISEMBA 25

#### *Sherehe ya Kuzaliwa Kwa Bwana Wetu Yesu Kristo*

**SOMO LA KWANZA:** Isa 11,1-10

Kiitikizano:

Lk 2,14

- K.** Leo Mfalme wa mbinguni amezaliwa kwa ajili yetu toka kwa bikira ili kuongoza mtu aliyepotea kwenye ufalme wa mbinguni: \* Afurahi umati wa malaika, kwa kuwa umedhihirishwa kwa watu wokovu wa milele.
- W.** Atukuzwe Mungu juu mbinguni na amani duniani kwa watu anaowaridhia.
- K.** Afurahi umati wa malaika, kwa kuwa umedhihirishwa kwa watu wokovu wa milele.

**SOMO LA PILI:**

Toka “Hotuba” ya mt. Leo Mkuu, papa.

*Tambua, ee mkristo, adhama yako*

Wapendwa, Mwokozi wetu amezaliwa leo: na tufurahi! Hamna nafasi kwa huzuni kwenye siku unamozaliwa uzima, uzima unaoangamiza hofu ya mauti na kutoa furaha ya ahadi za mbinguni. Hamna aliyefukuzwa kutoka heri hiyo: sababu ya furaha ni kwa wote, kwani Bwana wetu, mshindi wa dhambi na mauti, kwa kuwa hajampata mtu kamwe bila kosa, amekuja kuwakomboa wote. Afurahi mtakatifu, kwani aikaribia thawabu; ashangilie mdhambi, kwani kwake umetolewa msamaha; ajipe moyo mpagani, kwa kuwa aitwa kwenye uzima.

Naam, Mwana wa Mungu, ukifika utimilifu wa nyakati ulioandaliwa na mpango usiojulikana wa Mungu, akikata kupatanisha naye maumbile ya kibinadamu, ameyachukua mwenyewe kwa njia kwamba shetani, mleta mauti, angeshindwa kwa maumbile yale yale ambayo yeye kabla aliyafanya kuwa mtumwa. Hivyo, kwenye kuzaliwa kwa Bwana malaika waimba kwa shangwe: “Atukuzwe Mungu juu mbinguni, na amani duniani kwa watu anaowapenda” (Lk 2,14). Wao waona kwamba Yerusalemu wa mbinguni umeundwa toka mataifa yote ya dunia. Juu ya kazi hii isiyosemeka ya upendo wa Mungu, ambayo malaika katika ukuu wao waifurahia hivi, kiasi gani wanadamu hawapaswi kufurahia katika umaskini wao! Enyi wapendwa, tumshukuru Mungu Baba, kwa njia ya Mwanawe katika Roho Mtakatifu, kwa sababu katika huruma isiyopimika ambayo kwayo alitupenda, alituhurumia, na, tulipokuwa wafu kwa sababu ya dhambi zetu, alituhuisha pamoja na Kristo (Efe 2,5) ili tuwe ndani yake kiumbe kipya, kazi mpya ya mikono yake.

Tuache, basi, “mtu wa kale pamoja na mwenendo wa kabla” (Efe 4,22) na, kwa kuwa twashiriki kwenye ukoo wa Kristo, tukatae kazi za mwili. Tambua, ee mkristo, adhama yako na, baada ya kushirikiswa katika maumbile ya Kristo, usikubali kurudia kwenye upotovu wa kale kwa mwenendo usiofaa. Kumbuka kwamba yeye ni kichwa chako, nawe ni kiungo cha Mwili gani. Kumbuka kwamba, baada ya kung’olewa toka mawezo ya giza, umepelekwa kwenye nuru ya Ufalme wa Mungu. Kwa sakramenti ya ubatizo umekuwa hekalu la Roho Mtakatifu! Usifukuze mgeni mheshimiwa hivi kwa mwenendo mbaya, wala usijitie tena chini ya utumwa wa shetani. Kumbuka kwamba bei iliyolipwa kwa ukombozi wako ni damu ya Kristo.

Kiitikizano:

K. Leo amani halisi yashuka toka mbinguni kwa ajili yetu; \* leo duniani kote mbingu zinadondosha utamu.

W. Yang'aa kwetu siku ya ukombozi mpya, siku iliyoandaliwa tokea karne, furaha bila mwisho.

K. Leo duniani kote mbingu zinadondosha utamu.

**DOMINIKA KATIKA OKTAVA YA NOELI***Sikukuu Ya Familia Takatifu*

**SOMO LA KWANZA:** Efe 5,21 – 6,4

Kiitikizano:

Efe 6,1-2; Lk 2,51

K. Enyi watoto, watiini wazazi wenu katika Bwana; \* Waheshimu baba na mama, maana hii ndiyo haki.

W. Yesu akashuka Nazareti pamoja na Maria na Yosefu, naye alikuwa akiwatii.

K. Waheshimu baba na mama, maana hii ndiyo haki.

**SOMO LA PILI:**

Tokea “Hotuba” za Paulo VI, papa.

*Mfano wa Nazareti*

Nyumba ya Nazareti ni shule ambamo mtu anafundishwa kufahamu maisha ya Yesu, yaani, shule ya Injili. Humu twajifunza kufuata, kusikiliza, kutafakari na kuingia kwenye maana ya ndani na ya kifumbo nyenyekevu, rahisi na zuri hivi ya dhihirisho hili la Mwana wa Mungu. Labda pia twajifunza, karibu bila kutambua, kumwiga.

Humo twajifunza njia itakayoturuhusu kujua Kristo ni nani. Humo twavumbua haja ya kuelewa mazingira ya kukaa kwake kati yetu: yaani, mahali, muda, desturi, lugha, ibada takatifu; naam, yote aliyohitaji Yesu ili kujifunua kwa ulimwengu.

Humo yote yana sauti, yote yana maana. Humo, kwenye shule hii twafahamu vema kwa nini twahitaji nidhamu ya kiroho, tukitaka kufuata mafunzo ya Injili na kuwa wanafunzi wa Kristo. Jinsi tungependa kugeuka kuwa watoto na kujitia kwenye shule hii nyenyekevu na ya juu ya Nazareti! Kwa hamu gani twatamani kuanza upya, karibu na Maria, kujifunza elimu ya kweli ya uzima na hekima ya juu ya kweli za Mungu! Lakini sisi tu wapita njia na twahitaji kuacha tamaa ya kuendelea kujua nyumbani humu malezi yasiyomalizika kwenye ufahamu wa Injili. Hata hivyo, hatutaacha mahali hapa bila kuvuna, kama kwa siri, maneno machache ya nyumba ya Nazareti.

Kwanza, yatufunza ukimya. Laiti ingezaliwa ndani yetu heshima kwa kimya, mazingira mazuri na ya lazima kwa roho: wakati ambapo tunaposumbuliwa na kelele nyingi hivi, na sauti kali za maisha ya nyakati zetu. Ee kimya ya Nazareti, tufundishe kuwa imara katika mawazo mema, yanayoelekea maisha ya ndani, tayari kusikiliza mwogozo wa siri wa Mungu na mashauri ya walimu halisi. Tufundishe jinsi zilivyo muhimu kazi ya maandalizi, masomo, taamuli, maisha ya ndani, sala ambayo Mungu tu aona sirini.

Hapa twafahamu namna ya kuishi katika familia. Nazareti itukumbushe familia ni nini, kitu gani ni ushirika wa upendo, uzuri wake rahisi, hali yake wakfu; ituonyeshe jinsi yalivyo matamu na ya lazima malezi katika familia, yatufunze kazi yake katika utaratibu wa kijamii. Mwishowe,

tujifunze funzo la kazi. Ee makao ya Nazareti, nyumba ya mwana wa seremala! Hapa twataka kufahamu na kuadhimisha sheria, bila shaka ngumu, ila ya kukomboa, ya uchovu wa binadamu; hapa kuheshimu adhama ya kazi ili ijulikane na wote; kukumbuka chini ya dari hii kwamba kazi hawezi kuwa lengo kwa yenyewe, bali kwamba yapokea uhuru na ukuu wake, sio tu kutoka thamani yake ya kiuchumi, bali pia kutoka yale yanayoelekea kwenye kikomo chake cha heshima; mwishowe, hapa twataka kuwaamkia wafanyakazi wa dunia yote na kuwaonyesha mfano mkuu, ndugu yao ya kimungu, nabii wa mambo yote ya haki yanayowahusu, yaani, Kristo Bwana wetu.

Kiitikizano:

II Kor 13,11; Efe 5,19; Kol 2,23

**K.** Furahini, tafuteni yaliyo makamilifu, mfarijike, nieni mamoja, mkae katika amani, \* mwimbieni na kumshangilia Mungu kwa moyo wote.

**W.** Lo lote mfanyalo, lifanyeni kwa moyo, kama kwa Bwana, wala si kwa wanadamu.

**K.** Mwimbieni na kumshangilia Mungu kwa moyo wote.

## DISEMBA 26

### *Sikukuu ya Mt. Stefano*

**SOMO LA KWANZA:** Mdo 6,8 – 7,2. 44-59

Kiitikizano:

**K.** Stefano, mtumishi wa Mungu, aliyepigwa mawe na Wayahudi, aliona mbingu wazi, akaingia: \* mbarikiwa mtu ambaye kwake mbingu yafunuliwa.

**W.** Aliangamizwa na dhoruba ya mawe, lakini toka mbingu iling'aa kwake utukufu wa Mungu:

**K.** mbarikiwa mtu ambaye kwake mbingu yafunuliwa.

**SOMO LA PILI:**

Toka “Hotuba” ya mt. Fulgensio wa Ruspe, askofu.

### *Silaha za upendo*

Jana tuliadhimisha kuzaliwa kwa muda kwa Mfalme wetu wa milele, leo twasherekea mateso yenye kushinda ya askari.

Naam, jana mfalme wetu, akivaa mwili wetu na akitoka kwenye tumbo la Bikira, alikubali kutembelea ulimwengu; leo askari akitoka kwenye hema la mwili, ameingia mshindi mbinguni.

Mfalme wetu, Aliye juu, alikuja kwa ajili yetu mnyenyekevu, ila hakuweza kuja mikono mitupu; kweli, alileta zawadi kuu kwa askari zake, ambayo kwayo sio tu aliwatajirisha kwa wingi, bali wakati ule ule aliwaimarisha, ili wapambane na nguvu ya ushindi. Alileta zawadi ya upendo unaoongoza watu kwenye ushirika pamoja na Mungu.

Aliyoleta, aliyagawa, bila upungufu; akatajirisha kiajabu unyonge wa waumini wake, naye akabaki amejaa hazina zisizomalizika.

Upendo, basi, uliofanya Kristo kushuka toka mbingu hadi nchi, umemwinua Stefano toka nchi hadi mbingu. Upendo uliokuwa kwanza katika Mfalme, uling'aa baadaye katika askari.

Stefano, basi, ili kustahili taji, linalomaanisha jina lake, alikuwa na upendo kama silaha na kwa hiyo alishinda po pote. Kwa njia ya upendo hakuwaacha Wayahudi waliokasirika dhidi yake; kwa upendo kwa jirani aliwaombea waliompiga mawe. Kwa upendo aliwashinda waliokosea ili wajirudi; kwa upendo aliwaombea wauaji ili wasiadhibiwe.

Akiimarishwa na nguvu ya upendo alimshinda Saulo aliyemkasirikia vikali, akastahili kuwa na mwenzi mbinguni yule aliyekuwa kwake mdhalimu duniani. Upendo ule ule mtakatifu na bila kuchoka ulitaka kushinda kwa sala wale ambao hakuweza kuwaongoa kwa maneno.

Na, tazama, kwamba sasa Paulo ni mwenye heri pamoja na Stefano, pamoja na Stefano afurahia utukufu wa Kristo, pamoja na Stefano ahangilia, pamoja na Stefano atawala. Ambapo Stefano, aliyeuwawa na mawe ya Paulo, alimtangulia, Paulo alimfuata kwa sala ya Stefano.

Jinsi ulivyo kweli uzima ule, ndugu, ambapo Paulo haaibiki kwa kumwua Stefano, bali Stefano afurahia kuwa pamoja na Paulo kwa kuwa upendo washangilia katika wote wawili. Ndiyo, upendo wa Stefano ulishinda ubaya wa Wayahudi, upendo wa Paulo ulifunika uwingi wa dhambi, kwa upendo wa wote wawili walistahili kumiliki pamoja ufalme wa mbinguni.

Upendo, basi, ni chemchemi na asili ya mema yote, ulinzi bora, njia ipelekayo mbinguni. Yule atembeaye katika upendo hawezi kukosa, wala kuwa na hofu. Upendo huongoza, hulinda, hufikisha kwenye kikomo.

Kwa hiyo, ndugu, kwa kuwa Kristo ametupatia ngazi ya upendo, ambayo kupitia kwake kila mkristo aweza kufikia mbinguni, mhifadhi kwa bidii upendo kamili, mshuhudiane ninyi kwa ninyi, na mkue daima ndani mwake.

#### Kiitikizano:

**K.** Jana Bwana Yesu amezaliwa katika ulimwengu huu, ili Stefano azaliwe kwa uzima wa mbinguni; alikuja duniani, \* ili Stefano aingie pamoja naye kwenye utukufu.

**W.** Bwana wetu, akivaa mwili wa kibinadamu, alitoka tumboni mwa Bikira, akaja ulimwenguni,

**K.** Ili Stefano aingie pamoja naye kwenye utukufu.

## **DISEMBA 27**

### *Sikukuu ya Mt. Yohane*

**SOMO LA KWANZA:** I Yoh 1,1 – 2,3

#### Kiitikizano:

I Yoh 1,2,4; Yn 20,31

**K.** Twawatangazia ninyi uzima wa milele, uliokuwa kwa Baba, ukadhihirika kwetu: haya twayawaandikia ili muwe na furaha, \* na furaha yenu itimizwe.

**W.** Hayo yote yameandikwa ili muamini kwamba Yesu ni Kristo, Mwana wa Mungu; na kwa kuamini muwe na uzima kwa jina lake,

**K.** na furaha yenu itimizwe.

#### **SOMO LA PILI:**

Toka “Makala juu ya Waraka wa kwanza wa Yohane” ya mt. Agustino, askofu.

### *Uzima umedhihirika mwilini*

“Lile lililokuwa tangu mwanzo, tulilolisikia, tuliloliona kwa macho yetu na mikono yetu ikalipapasa, kwa habari ya Neno la uzima” (I Yoh 1,1). Ni nani amgusaye kwa mikono Neno, isipokuwa kwa sababu “Neno alifanyika mwili, akakaa kwetu” (Yn 1,14)?

Neno aliyefanyika mwili, ili kuguswa kwa mikono, alianza kuwa mwili toka Biikira Maria; ila hakuanza pale kuwa Neno, kwa sababu imenenwa: “Lile lililokuwa tangu mwanzo”. Mwaona ikiwa waraka wa Yohane haithibitishi Injili yake, ambapo mmesikia sasa: “Hapo mwanzo kulikuwako Neno, naye Neno alikuwako kwa Mungu” (Yn 1,1).

Labda mtu fulani aelewa maneno “Neno la uzima” kama yamgemhusu Kristo, ila si kwa mwili wa Kristo uliguswa kwa mikono. Lakini angalieni yanayofuata: “na uzima ulidhihirika” (I Yoh 1,2). Ni Kristo, basi, Neno la uzima.

Na ulidhihirika vipi? Ulikuwapo tangu mwanzo, ila haujadhihirika kwa watu; ulidhihirika kwa malaika na ulikuwa kama chakula chao. Lakini Maandiko yasema nini? “Mwanadamu alikula chakula cha malaika” (Zab 78,25).

Basi, uzima wenyewe ulidhihirika mwilini; ulidhihirika ili jambo linaloweza kuonekana tu na moyo, lipate pia kuonekana machoni na kuponya mioyo. Naam, kwa moyo tu, laweza kuonekana Neno, bali nyama yaweza kuonwa pia na macho ya mwili. Ilitukia, basi, hali ili kuona Neno: Neno limefanyika mwili ili tuweze kuuona na yangeponywa ndani yetu yanayotuwezesha kuliona Neno.

Alisema: “Sisi twashuhudia na kuwatangazia uzima wa milele, uliokuwa kwa Baba, ukadhihirika kwetu” (I Yoh 1,2), yaani, ulidhihirika kati yetu; kwa kunena wazi zaidi, ulionyeshwa kwetu.

“Hilo tuliloliona na kulisikia, twawahubiri na ninyi” (I Yoh 1,3). Waelewe vema upendo wenu: “Hilo tuliloliona na kulisikia, twawahubiri na ninyi”. Wao walimwona Bwana mwenyewe mwilini, wakasikia toka kinywa cha Bwana, wakayatangaza kwetu. Kwa hiyo, hata na sisi tulisikia, ila hatukuona.

Je, hatukubahatika kuliko wale walioona na kusikia? Na vipi, basi, aongeza: “ili nanyi mpate kushirikiana nasi” (I Yoh 1,3)? Wao waliona, sisi la, na, hata hivyo, tupo kwenye ushirika, kwa sababu tunayo imani moja.

“Ushirika wetu ni pamoja na Baba na pamoja na Mwana wake Yesu Kristo. Na haya twayaandika, ili furaha yetu itimizwe” (I Yoh 1,3-4). Ataja utimilifu wa furaha katika ushirika ule ule, kwenye upendo ule ule, katika umoja ule ule.

#### Kiitikizano:

- K. Tazama Yohane ambaye wakati wa karamu aliegemeza kichwa kifuani mwa Bwana: \* mtume mbarikiwa, kwake limefunuliwa fumbo la Mungu.
- W. Toka moyo wenyewe wa Kristo alichota maji hai ya injili:
- K. mtume mbarikiwa, kwake limefunuliwa fumbo la Mungu.

## DISEMBA 28

### *Sikukuu ya Watoto Wafiadini*

**SOMO LA KWANZA:** Kut 1,8-16. 22

#### Kiitikizano:

Isa 65,19; Ufu 21,4.5

- K. Furaha kwa watu wangu: \* sauti ya kulia na ya kuomboleza haitasikika tena.
- W. Mauti haitakuwapo tena, wala maombolezo, wala kilio, wala maumivu: nayafanya yote mapya.
- K. Sauti ya kulia na ya kuomboleza haitasikika tena.

**SOMO LA PILI:**

Toka “Hotuba” ya mt. Quodvultdeus, askofu.

*Hawaneni bado na tayari wamwungama Kristo*

Mfalme mkuu azaliwa mtoto mchanga. Mamajusi wanakuja toka mbali, wakiongozwa na nyota na waufikia Betlehemu, ili kuabudu yule alalaye bado horini, bali atawala mbingu na nchi. Mamajusi walipomtangazia Herode kwamba Mfalme amezaliwa, alifadhaika na, ili kutopoteza ufalme wake, atafuta kumwua, ila angemwamini angekuwa salama katika maisha haya na kutawala milele katika mengine.

Je, waogopa nini, ewe Herode, sasa ambamo umesikia kwamba Mfalme amezaliwa? Kristo hakuja kukuangusha, bali kwa kumshinda shetani. Wewe hayo huyaelewi, kwa hiyo wafadhaika na kukasirika; ila, kwa kumwondoa yule unayemtafuta tu, umekuwa mkatili ukiwafisha watoto wengi.

Huyajali malalamiko ya akina mama; wala hugeuzwi na kilio cha akina baba kwenye mazishi ya wanao, wala na kiyowe na kulia kwa watoto. Hofu uliyo nayo moyoni yakusukuma kuwaua watoto na utafutapo kuuuza uzima wenyewe, wafikiri kuishi muda mrefu, ukifaulu kutekeleza unachotamani. Lakini yeye, chemchemi ya neema, mdogo na mkubwa wakati ule ule, anayelala horini, anatisha kiti chako cha enzi; anakutumia wewe usiyejua makusudi yake nakuziokoa roho katika utumwa wa shetani. Anawapokea wana wa adui na kuwafanya wana wa kupokelewa.

Watoto, bila kujua, wamfia Kristo; wazazi wanawalilia mashahidi wanaokufa. Kristo awafanya mashahidi wake wale wasiosema bado. Yule aliyekuja kutawala, atawala hivyo. Mkombozi aanza kuokoa na Mwokozi ajalia tayari wokovu wake.

Lakini wewe, Herode, hujui hayo, wafadhaika na kufanya ukatili; na unapomghadhabikia huyo mtoto, bila kujua, tayari unampa heshima.

Ee kipawa kikubwa cha neema! Watoto walikuwa na mastahili gani wajaliwe kushinda hivi vitukufu? Hawasemi bado na wamshuhudia Kristo tayari! Hawawezi bado kukabili pambano, kwani wanashindwa kutumia viungo, na, hata hivyo, wabeba kama washindi mtende wa ushindi.

Kiitikizano:

- K. Walimwabudu Yeye anayeishi milele na milele, \* wakaweka taji zao chini mbele ya kiti cha enzi cha Bwana.
- W. Wakakiangukia kiti cha enzi kifudifudi, wakamtukuza Yeye anayeishi milele na milele,
- K. wakaweka taji zao chini mbele ya kiti cha enzi cha Bwana.

**DISEMBA 29***Siku ya Tano Katika Oktava ya Noeli*

**SOMO LA KWANZA:** Kol 1,1-14

Kiitikizano:

Kol 1,12-13; Yak 1,17

- K. Tumshukuru Baba kwa furaha: alituokoa katika nguvu za giza, \* akatuingiza katika ufalme wa Mwana wa pendo lake.
- W. Kila kutoa kuliko kwema na kila kitolewacho kilicho kamili, hutoka juu, hushuka kwa Baba wa mianga:
- K. akatuingiza katika ufalme wa Mwana wa pendo lake.



**SOMO LA PILI:**

Tokea “Hotuba” za Mt. Bernardo, abate.

*Katika utimilifu wa nyakati ulikuwa ukamilifu wa umungu*

Zimedhihirishwa wema na wokovu wa Mungu Mwokozi wetu (Tit 2,11). Tumshukuru Mungu anayetufurahisha na faraja kubwa hivi katika hija hii yetu ya wageni, katika huu unyonge wetu. Kabla ya ubinadamu kuonekana, wema ulikuwa umefichwa: ha hata hivyo ulikuwa kabla, kwani huruma ya Mungu ni ya tangu milele. Lakini vipi mtu aliweza kujua kwamba ilikuwa kubwa hivi? Ilihidiwa, lakini mtu hakuweza kuionja, na hivyo wengi kawakuiamini. Mara nyingi na kwa njia nyingi, Mungu alinena katika manabii (Ebr 1,1). Mimi –alisema- nayajua mawazo ya amani, wala si ya mabaya (Yer 29,11). Lakini, je, mtu alijibu nini, akisikia mateso na bila kutambua amani? Mpaka lini mwanena: Amani, amani, wala amani haipo? Kwa hiyo watangazaji wa amani walilia kwa uchungu (Isa 33,7) wakisema: Bwana, ni nani aliyesadiki tangazo letu? (Isa 53,1).

Lakini sasa walau watu waamini baada ya kuona, kwani shuhuda za Mungu ni amini sana (Zab 93,5). Ili asibaki amefichwa hata kwa jicho chafu, Yeye ameweka katika jua makao yake (Zab 19,6).

Tazama amani: siyo iliyoahidiwa, bali iliyopelekwa; siyo iliyohamishwa, bali iliyotolewa; siyo iliyotabiriwa, bali iliyopo. Mungu Baba alituma duniani gunia, kwa kusema hivi, ikijaa huruma yake; gunia iliyochanika vipande vipande wakati wa mateso, ili ingetoka mle bei iliyoingiza ndani mwake ukombozi wetu; naam, gunia ndogo, lakini iliyojaa, ikiwa tumepewa Mtoto (Isa 9,5), ambamo “katika yeye unakaa utimilifu wote wa Mungu” (Kol 2,9). Ulipojia utimilifu wa nyakati, ulifika pia utimilifu wa umungu.

Alifika Mungu mwilini ili kujifunua pia kwa watu walio wa mwili na ili utambuliwe wema wake uliojidhihirisha katika wanadamu. Alipojidhihirisha Mungu katika mtu, hawezi kufichwa wema wake. Uthibitisho gani bora zaidi wa wema wake uliweza kutoa, isipokuwa akichukua mwili wangu? Hasa wangu, wala si mwili uliokuwa nao Adamu kabla ya kosa.

Hakuna kinachoonyesha zaidi huruma yake kama kuchukua yeye unyonge wetu wenyewe. Bwana, mtu ni kitu gani hata umkumbuke na mwanadamu hata umwangelie? (Zab 8,4; Ebr 2,6). Toka hayo mtu ajue jinsi Mungu anavyomshughulikia na afikiria na kusikia nini juu yake. Usiulize, ee mwanadamu, wewe unateseka nini, bali yeye ameteseka vipi. Toka yale aliyofanyia kwa ajili yako, tambua thamani yako kwake, na utaelewa wema wake kupitia ubinadamu wake. Kama alivyojifanya mdogo akichukua mwili, hivyo alivyojionyesha mkuu katika wema; na kwangu ni mpendwa zaidi kwa kiasi alivyojinyenyekeza zaidi kwa ajili yangu. Zimedhihirishwa – anena Mtume - wema na fadhila za Mungu Mwokozi wetu (Tit 3,4). Naam, mkuu ni wema wa Mungu na kweli ametoa uthibitisho mkuu wa wema akiunganisha umungu pamoja na ubinadamu.

**Kiitikizano:**

Efe 1,5; Rum 8,29

**K.** Mungu alituchagua ili tufanywe wanawe kwa njia ya Yesu Kristo: huu ndio uradhi wa mapenzi yake, \* kwa sifa na utukufu wa neema yake.

**W.** Yeye alitujua tangu asili, akatuchagua tuwe na mfano wa Mwanawe;

**K.** Kwa sifa na utukufu wa neema yake.

## DISEMBA 30

### *Siku ya Sita Katika Oktava ya Noeli*

**SOMO LA KWANZA:** Kol 1,15 –2,3

Kiitikizano:

Kol 1,18.17

**K.** Kristo ni kichwa cha mwili, yaani, cha Kanisa, mzaliwa wa kwanza katika wafu; \* yeye ni mtangulizi katika vyote.

**W.** Yeye amekuwa kabla ya vitu vyote na vyote hushikana katika yeye:

**K.** yeye ni mtangulizi katika vyote.

**SOMO LA PILI:**

Toka “Makala kwa kupinga uzushi” ya Mt. Hipolito, mpresbiteri.

*Neno aliye fanyika mwili atugeuzaa kuwa sawa na Mungu*

Sisi twasadiki Neno wa Mungu. Tusitegemee maneno bila maana, wala kukubali kupelekwa na misukumo ya ghafla na bila mpango au kuhadhaika na mivuto ya hotuba zilizopangwa vizuri, bali twaamini neno na uwezo wa Mungu.

Mambo haya Mungu aliyapanga katika Neno lake. Neno aliyatamka katika maneno ili kumwondoa mtu kwayo kwenye kutotii kwake. Yeye hakumtawala afanyavyo mkuu kwa watumwa wake, bali alimwalika kwa uamuzi wa hiari na wa kuwajibika.

Baba alituma duniani Neno hili lake katika wakati wa mwisho kwa sababu hakutaka kwamba anene kupitia manabii, wala kwamba litangazwe kwa njia ya giza na ya fumbo, kupitia vidokezo fulani, bali alitaka kwamba lionekane katika nafsi. Hivyo dunia, kwa kulitazama, ingeweza kupata wokovu. Dunia ingekuwa nalo machoni pake, isingesikia tena usumbufu na hofu, kama walipojikuta mbele ya picha ya kimungu iliyoonyeshwa na manabii, wala isingesikia kupotea wakati lilipodhihirishwa au kuonyeshwa na mawezo ya malaika. Tangu sasa, ingeona kwamba alikuwepo mbele ya Mungu asemaye.

Sisi twajua kwamba Neno alichukua mwili wenye kufa toka Bikira, akabadili mtu wa kale katika upya wa uumbaji mpya. Sisi twajua kwamba yeye alijifanya sawa nasi. Naam, asingekuwa wa umbile letu, bure angetupa kama sheria kuwa wafuasi wake, yeye akiwa mwalimu. Ikiwa yeye kama mwanadamu ni wa umbile tofauti, kwa nini aniamuru mimi niliyezaliwa katika udhaifu kufanana naye? Na vipi angeweza kuwa huyo mwema na mwenye haki?

Kweli, ili asihesabiwe tofauti nasi, yeye amevumilia uchovu, alitaka njaa, hakukataa kiu, akakubali kulala ili kupumzika, hakupinga mateso, alikubali kifo, akajifunua katika ufufuko. Kwa njia hizo, alitoa umbile lake mwenyewe la mwanadamu, ili usikate tamaa katika mateso, bali, ukijitambua mtu, ungojee hata kwa ajili yako yale aliyomtolea Baba.

Utakapomjua Mungu kweli, utakuwa, pamoja na nafsi, na mwili usiokufa na usioharibika; utapata ufalme wa mbinguni, kwa kuwa katika maisha ya ulimwengu huu umetambua mfalme na Bwana wa mbingu. Wewe utaishi katika urafiki pamoja na Mungu, utakuwa mrithi pamoja na Kristo, si mtumwa tena wa tamaa zako, wa mivuto kwa dhambi, wala wa mateso na mabaya ya kimwili, kwa sababu umegeuka kuwa mungu. Naam, mateso uliyopaswa kuvumilia kwa kuwa ulikuwa mwanadamu, Mungu alikupatia kwa sababu ulikuwa mwanadamu. Lakini Mungu aliahidi pia kukujalia fadhila zake mwenyewe baada ya kutakatifuza na kufanywa kuwa asiyekufa.

Kristo, Mungu aliye juu ya vyote, yeye aliyeamua kufuta dhambi ya watu, alifanya upya mtu wa kale, akamwita sura yake mwenyewe tangu mwanzo. Tazama jinsi alivyoonyesha upendo uliokuwa nao kwa ajili yako. Ukijifanya mtiifu kwa amri zake takatifu, na kuwa mwema kama yeye

aliye mwema, utafanana naye na kutoka kwake utapokea utukufu. Mungu hapunguzi vipawa vyake yeye ambaye, kwa utukufu wake, amekufanya kuwa mungu.

Kiitikizano:

Yn 1, 14; Bar 3, 38

- K.** Naye Neno alifanyika mwili, akakaa kwetu,: nasi tukauona utukufu wake, utukufu kama wa Mwana pekee atokaye kwa Baba,\* amejaa neema na kweli.  
**W.** Ameonekana duniani, akakaa kwetu,  
**K.** amejaa neema na kweli.

## DISEMBA 31

**SOMO LA KWANZA:** Kol 2,4-15

Kiitikizano:

Kol 2, 9. 10. 12

- K.** Katika Kristo unakaa utimilifu wote wa Mungu, kwa jinsi ya kimwili: yeye ni Bwana wa enzi yote na mamlaka; \* ninyi mmetimilika katika yeye.  
**W.** Mmezikwa pamoja naye katika ubatizo, na katika huo mmefufuliwa pamoja naye, kwa kuziamini nguvu za Mungu,  
**K.** ninyi mmetimilika katika yeye.

**SOMO LA PILI :**

Tokea “Hotuba” za Mt. Leo Mkuu, papa.

*Kuzaliwa kwa Bwana ni kuzaliwa kwa amani*

Utoto, ambao Mwana wa Mungu hakufikiri kutostahili adhama yake, ulipata maendeleo kwa kukua kwa umri katika utimilifu timamu wa mtu. Naam, baada ya kutekelezwa ushindi wa mateso na ufufuko, ni cha kale kujifanya kwake mdogo kwa ajili yetu: hata hivyo, sikukuu ya leo yafanya upya kwetu asili takatifu za Yesu, aliyezaliwa toka Bikira Maria. Na tunapoadhimisha katika kusujudu kuzaliwa kwa Mwokozi wetu, twajipata kuadhimisha mwanzo wetu: kuzaliwa kwa Kristo kwaonyesha mwanzo wa taifa la kikristo; kuzaliwa kwa Kichwa ni kuzaliwa kwa Mwili.

Ingawa wana wote wa Kanisa wapokea wito kila mmoja kwenye wakati wake na wamegawanyika kwenye mwendo wa muda, pia wote pamoja, wakizaliwa kwenye chemchemi ya ubatizo, wamezaliwa pamoja na Kristo katika noeli hii, pia kama pamoja na Krsito wamesulibiwa katika mateso, wamefufuka katika ufufuko, wamewekwa kuume kwa Baba katika kupaa.

Kila mwumini ambaye po pote ulimwenguni amezaliwa upya katika Kristo, amevunja vifungo na dhambi ya asili na amekuwa mtu mpya kwa kuzaliwa mara ya pili. Tangu hapo si tena wa ukoo wa baba kulingana na mwili, bali wa ukoo wa Mwokozi aliyejifanya mwana wa mtu, ili sisi tuweze kupata kuwa wana wa Mungu. Yeye asingeshuka kwetu katika kutelemka kwake alipozaliwa, hakuna kwa mastahili yake aliyekuwa angeweza kupanda kwake.

Ukuu wenyewe wa kipawa wadai toka kwetu upendo unaostahili uangavu wake. Mtume mbarikiwa atufundisha: Sisi hatukupokea roho ya ulimwengu, bali Roho atokaye kwa Mungu ili kujua yote aliyotujalia Mungu (I Kor 2,12). Namna moja tu ya kumheshimu ipasavyo ni kumtolea kipawa chenyewe kilichopokelewa toka kwake.

Sasa, ili kuiheshimu sikukuu hii, je, twaweza kupata nini ya kufaa zaidi, kati ya vipawa vyote vya Mungu, isipokuwa amani, ili amani iliyotangazwa mara ya kwanza na wimbo wa malaika kwenye kuzaliwa kwa Bwana? Amani yaza wana wa Mungu, yalisha upendo, yaunda ushirika;

hiyo ni pumziko la watakatifu, makao ya umilele. Kazi na fadhila yake maalum ni kuunganisha na Mungu wale anaowatenga toka ulimwengu wa uovu.

Basi, wale ambao wamezaliwa si kwa damu, wala si kwa mapenzi ya mtu, bali kwa Mungu (Yn 1,13), wamtotee Baba mioyo yao ya wana ikiunganika katika amani. Viungo vyote vya familia ya kupokelewa na Mungu wakutane katika Kristo, mzaliwa wa kwanza wa maumbile mapya, aliyekuja kufanya si mapenzi yake, bali yale ya yule aliyemtuma. Naam, Baba, katika wema wake aliwapokea kama warithi wake sio wale waliojisikia wametengwa na magomvi na kutoweza kuelewana, bali wale walioishi na kupenda mwungano wao wa kindugu. Naam, wale walioumbwa kulingana na mfano mmoja, wapaswa kuwa na usawa ule ule wa kiroho. Kuzaliwa kwa Bwana ni kuzaliwa kwa amani. Mtume anena: Yeye ni amani yetu, yeye aliyefanya toka mataifa mawili kuwa moja (Efe 2,14), ili awe myahudi au mpagani “kwa yeye tuweze kumkaribia Baba katika Roho mmoja” (Efe 2,18).

#### Kiitikizano:

Efe 2,13-14.17

- K. Ninyi mliokuwa mbali hapo kwanza, mmekuwa karibu kwa damu yake Kristo. Yeye ndiye amani yetu, ambaye \* alitufanya sisi tuliokuwa wawili kuwa mmoja.
- W. Yeye alikuja kuhubiri amani: kwenu ninyi mliokuwa mbali, na amani kwao wale waliokuwa karibu;
- K. alitufanya sisi tuliokuwa wawili kuwa mmoja.

## **JANUARI 1**

### **OKTAVA YA NOELI**

#### *Sherehe Ya Maria, Mama Wa Mungu*

**SOMO LA KWANZA :** Ebr 2,9-17

#### Kiitikizano:

Lk 1,28

- K. Mbarikiwa, ee Bikira Maria: umebeba Mwumba wa dunia. \* Umempa maisha yule aliyekuumba, nawe ni bikira milele.
- W. Salamu, uliyepewa neema, Bwana yu pamoja nawe.
- K. Umempa maisha yule aliyekuumba, nawe ni bikira milele.

#### **SOMO LA PILI:**

Toka “Nyaraka” za mt. Agustino, askofu.

#### *Neno limechukua toka Maria maumbile ya kibinadamu*

Neno wa Mungu, anenavyo Mtume, “atwaa asili ya mzao wa Abrahamu. Hivyo ilimpasa kufananishwa na ndugu zake katika yote”(Ebr 2,16.17) na kuchukua mwili unaofanana na wetu. Kwa hiyo Maria alikuwa na uwepo wake ulimwenguni, ili toka kwake Krsito angechukua mwili huu na kuutolea, kwa kuwa ni wake, kwa ajili yetu.

Kwa hiyo Maandiko yasemapo juu ya kuzaliwa kwake Kristo anena: “akamvika nguo za kitoto”(Lk 2,7). Hivyo limetamkwa barikiwa tumbo alimopata maziwa. Mama alipozaa Mwokozi yeye ametolewa dhabihu.

Gabrieli alimtolea tangazo Maria kwa uangalifu na upole. Ila hakumwambia tu kuhusu yule atakayezaliwa ndani mwako, ili asingefikiri ulikuwa mwili mgeni, bali: toka kwako (Lk 1,35), ili ijulikane kwamba yule aliyemtolea kwa ulimwengu alikuwa na asili toka kwake, hasa.

Neno, baada ya kuchukua ndani mwake yaliyokuwa yetu, aliyatolea kama dhabihu, akayaharibu kwa kifo. Baadaye, alituvika na hali yake, kulingana na anenayo Mutme: sharti mwili huu uharibikao uvae kutokuharibika, nao huu wa kufa uvae kutokufa (I Kor 15,53).

Hata hivyo, hayo yote si hakika hadithi, kama wengine wasemavyo. Mbali nasi fikira ya namna hii. Mwokozi wetu alikuwa mtu kweli na toka hayo huja wokovu kwa wanadamu wote. Kwa vyo vyote wokovu wetu hawezi kutamkwa wa bandia. Yeye aliokoa mtu wote, mwili na roho. Wokovu umetekelezwa katika Neno mwenyewe.

Kweli ya kibinadamu yalikuwa maumbile yaliyozaliwa toka Maria, kulingana na Maandiko, na kweli, yaani, wa kibinadamu ulikuwa mwili wa Bwana; kweli, kwa sababu umefanana kabisa na wetu; naam, Maria ni dada yetu kwa kuwa sote tunayo asili katika Abrahamu.

Yale tunayosoma katika Yohane “Neno alifanyika mwili” (Yn 1,14) yana maana hii, kwa kuwa hufasiriwa kama maneno mengine yanayofanana nayo.

Imeandikwa katika Paulo: Kristo alijifanya laana kwa ajili yetu (Gal 3,13). Mtu katika mwungano huu wa ndani wa Neno alipata utajiri mkuu: toka hali ya kufa amepata kuwa na ya kutokufa; wakati alikuwa ameunganika na maisha ya kimwili amepata kuwa mshiriki wa Roho; hata akiwa ameumbwa toka ardhi, ameingia katika ufalme wa mbinguni.

Ingawa Neno alichukua mwili wa kufa toka Maria, Utatu umebaki ndani mwake ulivyo, bila kupungua au kuongezeka. Umebaki ukamilifu timamu: Utatu na umungu wa pekee. Hivyo katika Kanisa hutangazwa Mungu mmoja katika Baba na katika Neno.

#### Kiitikizano:

- K. Vipi kuimbia sifa zakom ee Bikira Maria mtakatifu? \* Yule ambaye mbingu haziwezi kuingiza, wewe umempeleka tumboni.
- W. Mbarikiwa wewe kati ya wanawake, na mbarikiwa mzao wa tumbo lako.
- K. Yule ambaye mbingu haziwezi kumuingiza, wewe umempeleka tumboni.

## **NOELI. KUANZIA JANUARI 2 HADI EPIFANIA**

### **JANUARI 2**

**SOMO LA KWANZA:** Kol 2,16 – 3,4

#### Kiitikizano:

Kol 3,1-2; Lk 12,34

- K. Mkiwa mmefufuliwa pamoja na Kristo, yatafuteni yaliyo juu, Kristo aliko, ameketi kuume kwa Mungu; \* yafikirini yaliyo juu, siyo yaliyo katika nchi.
- W. Kwa kuwa hazina yeni ilipo, ndipo itakapokuwepo na mioyo yenu.
- K. yafikirini yaliyo juu, siyo yaliyo katika nchi.

**SOMO LA PILI:**

Toka makala “Juu ya Roho Mtakatifu” ya Mt. Basilio, askofu.

*Bwana ahuisha mwili katika Roho*

Yule asiyeishi tena kufuatana na mwili, bali aongozwa na Roho wa Mungu, kwa kuwa achukua jina la mwana wa Mungu na amekuwa kama sura ya Mwana pekee, aitwa wa kiroho.

Kama kwenye jicho lenye afya upo uwezekano wa kuona, hivyo katika roho aliye na usafi huu, ipo nguvu tendaji ya Roho. Kama wazo la akili yetu sasa labaki bila kudhihirika katika undani wa moyo, sasa ladhihirika kwa neno, hivyo Roho Mtakatifu, sasa ashuhudia ndani kwa roho yetu na alia mioyoni mwetu: “Abba, Baba” (Gal 4,6), sasa anena kupitia sisi, yanenavyo Maandiko: “Si ninyi msemao, bali ni Roho wa Baba yenu asemaye ndani yenu” (Mt 10,20). Pia, Roho akiwagawia wote karama zake ni Wote anayepatikana katika sehemu zote. Naam, sote tu viungo mmoja wa wengine, na tunazo karama tofauti kulingana na neema ya Mungu tuliyopewa sisi. Kwa hiyo “jicho haliwezi kuuambia mkono, “Sina haja nawe”, wala tena kichwa hakiwezi kuiambia miguu, “Sina haja na ninyi”” (I Kor 12,21). Viungo vyote pamoja hukamillisha mwili wa Kristo katika umoja wa Roho na kulingana na karama vimekuwa, kama inavyohitajika, vya manufaa kimoja kwa vingine.

Naam, Mungu alipanga viungo mwilini, kila kimoja chao kulingana na mapenzi yake. Sehemu, basi, zimejaa kujaliana, kulingana na ushirika wa kiroho wa upendo. Kwa hiyo “kiungo kimoja kikiumia, viungo vyote huumia nacho; na kiungo kimoja kikitukuzwa, viungo vyote hufurahi pamoja nacho” (I Kor 12,26). Na kama sehemu zimo katika yote, hivyo sisi tu kila mmoja katika Roho, kwa sababu sote katika mwili mmoja tumebatizwa katika Roho mmoja.

Kama Baba anavyoonekana katika Mwana, hivyo Mwana adhihirishwa katika Roho. Kwa hiyo, ibada katika Roho yaonyesha utendaji wa nafsi yetu, unaotendeka katika nuru kamili. Twayasikia kwenye maneno yaliyotamkwa kwa Msamaria. Naam, huyo, kulingana na nadharia ya uongo ya taifa lake, alifikiri kwamba ilimbidi mtu kuabudu katika mahali fulani, bali Bwana, akimgeuza mawazo, alimwambia: “Twapaswa kuabudu katika Roho na Kweli”(Yn 4,23), akijiita wazi yeye mwenyewe “Kweli”.

Basi, katika namna tunavyoelewa ibada katika Mwana, kama ibada katika mfano wa yule aliye Mungu na Baba, hivyo twapaswa kufahamu ibada katika Roho, kama ibada ya yule anayedhihirisha ndani yake mwenyewe utu kabisa wa Mungu Bwana.

Kwa haki, basi, katika Roho anayetuangazia twaona mwangavu wa utukufu wa Mungu. Kupitia chapa twafikia muhuri na pia yule ambaye zake ni chapa na muhuri na ambaye kwake mambo yote mawili ni hali moja.

**Kiitikizano:**

I Kor 2, 12. 10; Efe 3, 5

- K.** Hatukuipokea roho ya dunia, bali roho atokaye kwa Mungu, ili kuyajua yote tuliyokirimiwa na Mungu: \* Roho huchunguza yote, hata mafumbo ya Mungu.
- W.** Siri hiyo hawakujulishwa wanadamu katika vizazi vingine, kama walivyofunuliwa mitume wake watakatifu na manabii zamani hizi katika Roho.
- K.** Roho huchunguza yote, hata mafumbo ya Mungu.

## JANUARI 3

**SOMO LA KWANZA:** Kol 3,5-16

Kiitikizano:

Gal 3,27-28

- K.** Ninyi nyote mlibatizwa katika Kristo mmemvaa Kristo: \* sisi sote tumekuwa mmoja, katika Kristo Yesu Bwana wetu.
- W.** Hapana Myahudi, wala Myunani; hapana mtumwa wala huru; hapana mtu mume wala mtu mke.
- K.** sisi sote tumekuwa mmoja, katika Kristo Yesu Bwana wetu.

**SOMO LA PILI**

Toka “Makala juu ya Yohane” ya Mt. Agustino, askofu.

### *Amri mbili za upendo*

Amekuja Bwana, mwalimu wa upendo, akijaa yeye mwenyewe upendo, “kulitekeleza neno lake juu ya nchi” (Rum 9,28), kama ilivyotabiriwa juu yake na alionyesha kwamba Sheria na Manabii husimama juu ya amri mbili za upendo. Tukumbuke pamoja, ndugu, amri hizo mbili ni zipi. Zinapaswa kujulikana vizuri, wala si kuzikumbuka wakati tunapozitamka: haziwezi kufutwa kamwe toka mioyo yenu. Daima na kila dakika kumbukeni kwamba twapaswa kumpenda Mungu na jirani: “Mungu kwa moyo wote, kwa roho yote, kwa akili yote”; na “jirani kama nafsi yako” (Mt 22,37.39). Hayo mwapaswa daima kuyatafakari, kuyazingatia na kukumbuka, kutekeleza na kutenda. Upendo wa Mungu ni ya kwanza kama amri, bali upendo kwa jirani ni ya kwanza kama utekelezaji. Yule anayekupatia amri ya upendo katika maagizo haya mawili, hakufundishi kwanza upendo kwa jirani, baadaye upendo kwa Mungu, bali kinyume.

Lakini, kwa kuwa humwoni Mungu bado, ukimpenda nduguyo wajipatia haki ya kumwona; ukimpenda jirani unataka jicho ili kuweza kumwona Mungu, kama anenavyo wazi Yohane: “Usipompenda ndugu yako ambaye wamwona, vipi utaweza kumpenda Mungu ambaye humwoni?” (I Yoh 4,20). Ungesikia kushauriwa kumpenda Mungu, ungaliniambia: “Nionyeshe yule ambaye nampasa kumpenda”, mimi ningeweza kukujibu pamoja na Yohane: “Hakuna mtu aliyemwona Mungu wakati wo wote” (Yn 1,18). Lakini, ili usijione umetengwa kabisa na uwezekano wa kumwona Mungu, Yohane mwenyewe anena: “Mungu ni upendo, naye akaaye katika pendo, hukaa ndani ya Mungu” (I Yoh 4,16). Wewe, basi, umpende jirani na ukitazama ndani yako upendo hu wazaliwa wapi, utaona kwa kadiri iwezekanavyo, Mungu.

Uanze kwanza kumpenda adui. “Uwagawie wenye njaa chakula chako na kuwaleta maskini waliotupwa nje nyumbani mwako, umwonapo mtu aliye uchi umvike nguo, wala usijifiche na mtu mwenye damu moja nawe” (Isa 58,7). Ukifanya hayo, utapata nini? “Ndipo nuru yako itakapopambazuka kama asubuhi” (Isa 58,8). Mwanga wako ni Mungu wako, yeye ni kwako mwanga wa asubuhi kwa sababu atakuja baada ya usiku wa ulimwengu huu: yeye hatoki, wala kutua, anang’aa daima.

Ukimpenda jirani na kumshughulikia, wewe watembea. Na wapi yakuongoza njia, isipokuwa kwa Bwana, kwa yule ambaye twapaswa kumpenda kwa moyo wote, kwa roho yote, kwa akili yote? Kwa Bwana hatujamfikia bado, lakini jirani tunaye daima pamoja nasi. Umsaidie jirani ambaye watembea pamoja naye, ili kumfikia yule ambaye wataka kubaki naye.

Kiitikizano:

I Yoh 4,10-11. 16

- K.** Mungu alitupenda kwanza, akamtuma Mwanawe kuwa kipatanisho kwa dhambi zetu. Ikiwa Mungu alitupenda sisi hivi, \* imetupasa na sisi kupendana.
- W.** Nasi tumelifahamu na kuliadini pendo alilo nalo Mungu kwetu sisi:
- K.** imetupasa na sisi kupendana.

## JANUARI 4

**SOMO LA KWANZA:** Kol 3,17 – 4,1

Kiitikizano:

Kol 3,17

**K.** Kila mfanyalo, kwa neno au kwa tendo, \* fanyeni yote katika jina la Bwana Yesu.

**W.** Mkimshukuru Mungu Baba kwa yeye:

**K.** fanyeni yote katika jina la Bwana Yesu.

**SOMO LA PILI:**

Toka “Sura 500” za mt. Massimo Mwangama.

*Fumbo daima jipya*

Neno wa Mungu amechukuliwa mimba mara moja kwa zote. Sasa, kwa wema wake kwa mwanadamu, atamani sana kuzaliwa kulingana na roho katika wale wanaotaka na amekuwa mtoto anayekua kwa kukua kwa fadhili zao. Ajidhihirisha kwa kiasi kile anachojua yule ampokeaye. Hapunguzi mtazamo mkuu mno wa ukuu wake kwa wivu au kijicho, bali aonja, karibu kuupima, uwezo wa wale wanatamani kumwona. Hivyo Neno wa Mungu, hata akijidhihirisha kwa kiasi cha wale wanaomshiriki, hata hivyo abaki asiyetambulika kwa wote, kwa sababu ya ukuu wa fumbo. Kwa hiyo, Mtume wa Mungu, akitafakari kwa hekima uzito wa fumbo, anena: “Yesu Kristo ni yeye yule, jana na leo na hata milele” (Ebr 13,8), akitaka kusema hivi kwamba fumbo ni daima jipya, wala hazeeki kamwe kwa ufahamu wa akili yo yote ya kibinadamu.

Kristo Mungu azaliwa na kufanywa mwanadamu, akichukua mwili mwenye roho yenye akili, yeye aliyevijalia vitu kutoka kwenye ubatili. Toka mashariki nyota inayong’aa mchana yaongoza

mamajusi kuelekea mahali ambapo Neno limechukua mwili, ili kudhihirisha kwamba Neno lililokuwemo katika Sheria na Manabii linapita kila ujuzi wa hisia na lawaongoza watu kwenye hali ya juu ya ufahamu.

Naam, neno la sheria na manabii, kama nyota, likieleweka vema, lawaongoza kumtambua Neno lililochukua mwili wale ambao, kwa neema, waliitwa kulingana na mapenzi ya Mungu.

Mungu ajifanya mwanadamu kamili, bila kugeuza kitu cha maumbile ya kibinadamu, isipokuwa dhambi, ambayo, kwa mengine, si yake. Ajifanya mtu ili kuchochea joka la jehnum lenye hamu na pupa ya kumeza nyara yake, yaani ubinadamu wa Kristo. Na Kristo ampa mwili kama chakula. Bali ule mwili ulipaswa kugeuka kuwa sumu kwa shetani. Mwili uliangamiza kabisa joka kwa uwezo wa umungu uliojificha ndani mwake. Ila kwa maumbile ya kibinadamu ungekuwa dawa, kwani ungempeleka kwenye neema asili kwa nguvu ya umungu uliokuwemo ndani mwake.

Kama joka, akiingiza sumu yake kwenye mti wa ujuzi, alivyowaangamiza wanadamu, akiwaonjesha, hivyo yule yule, akitaka kumeza mwili wa Bwana, aliangamizwa na kuondolewa utawala kwa uwezo wa umungu uliokuwemo ndani mwake.

Lakini fumbo kuu la umwilisho wa kimungu labaki daima fumbo. Naam, vipi aweza Neno ambaye kwa nafsi yake yumo hasa mwilini, kuwepo wakati ule ule kama nafsi wote katika Baba? Hivyo vipi Neno lenyewe, Mungu kabisa kwa maumbile, kupata kuwa mwanadamu kwa maumbile? Na hayo bila kuacha kamwe wala maumbile ya kimungu, ambayo kwayo si Mungu, wala yetu ambayo kwayo amepata kuwa mwanadamu?

Imani tu yafikia mafumbo hayo, hiyo ambayo ni utu na msingi wa mambo yale yanayozidi kila fahamu ya akili ya kibinadamu.



Kiitikizano

Yn 1,14.1

- K. Neno alifanyika mwili, akakaa kwetu: \* nasi tukauona utukufu wake, utukufu kama kwa Mwana pekee atokaye kwa Baba, amejaa neema na kweli.
- W. Hapo mwanzo kulikuwako Neno, naye Neno alikuwako kwa Mungu, naye Neno alikuwa Mungu:
- K. nasi tukauona utukufu wake, utukufu kama kwa Mwana pekee atokaye kwa Baba, amejaa neema na kweli.

**JANUARI 5**

SOMO LA KWANZA: Kol 4,2-18

Kiitikizano:

Kol 4,3; Zab 51,17

- K. Tuombeane, ili Mungu atufungulie mlango wa neno, \* ili kuitangaza siri ya Kristo.
- W. Ee Bwana uifumbue midomo yetu, na kinywa chetu kitazinena sifa zako,
- K. ili kuitangaza siri ya Kristo.

**SOMO LA PILI:**

Toka “Hotuba” za mt. Augustino, askofu.

*Tutashibishwa na kumwona Neno*

Nani ataweza kuzijua siri zote za hekima na ujuzi anazozifunga Kristo ndani mwake, na zilizofichika katika umaskini wa mwilie? “Kwa ajili yetu yeye, aliyekuwa tajiri, alijifanya maskini, ili tupate kuwa matajiri kwa umaskini wake” (2 Kor 8,9). Akichukua hali ya kufa ya mwanadamu na akipata kifo nafsini mwake, yeye alijionyesha katika umaskini wa hali ya kibinadamu: hakupoteza utajiri wake kama zingenyanganywa toka kwake, bali aliahidi ufunuo wake siku za usoni. Utajiri mkuu gani anaoweka kwa yule amchaye na kuwapatia kabisa wale wanaomtumaini!

Fahamu zetu sasa ni za sehemu na zisizokamilika, hadi yasije yaliyo makamilifu na timilifu. Lakini, ili kutuwezesha hayo, yeye aliye sawa na Baba katika umbu la Mungu, na sawa nasi katika umbu la mtumishi, atugeuza tufanane na Mungu. Akipata kuwa mwanadamu, yeye mwana wa pekee wa Mungu, awafanya wana wa Mugnu wanadamu wengi. Baada ya kutulisha sisi watumishi kupitia umbu linaloonekana la mtumishi, atufanya huru, wawezao kutazama umbu la Mungu.

Naam, “sisi tu wana wa Mungu, wala haijadhihirika bado tutakavyokuwa; lakini twajua ya kuwa atakapodhihirishwa, tutafanana naye, kwa maana tutamwona kama alivyo” (I Yoh 3,2). Lakini ni nini zile hazina za hekima na sayansi, nini zile tajiri za kimungu, isipokuwa jambo kuu liwezalo kuturidhisha kabisa? Ni nini ule uwingi wa utamu isipokuwa yale yawezayo kutushibisha?

Basi: “Utuonyeshe Baba, yatutosha” (Yn 14,8). Na katika zaburi sauti inayotufasiria au kunena kwa niaba yetu, yasema ikimwelekea yeye: “Nitashibishwa kwa kuonekana utukufu wako” (Zab 17,15). Yeye na Baba ni kitu kimoja na amwonaye yeye amwona pia Baba. “Bwana wa majeshi, Yeye ndiye Mfalme wa utukufu” (Zab 24,10). Akifanya kumgeukie, atatuonyesha uso wake, nasi tutaokoka; hapo tutashibishwa na yatatutosha.

Lakini, mpaka hayo yatakapotukia, nasi hatujaonyeshwa yale yatakayoturidhisha, hadi tutakapokunywa kwenye ile chemchemi ya uzima itakayotushibisha, wakati tunapotembea katika imani, wasafiri mbali naye na tunayo njaa na kiu ya haki na twatamani kwa hamu kubwa uzuri wa

Kristo utakaofunuliwa katika umbu la Mungu, twaadhimisha kwa utauwa kuzaliwa kwa Kristo aliyeonekana katika umbo la mtumishi.

Tusipoweza bado kumtazama, kwani ametoka kwa Baba, kabla ya pambazuko, tumwadhimishe kwa sababu katika usiku amezaliwa toka Bikira. Tusipomwelewa sasa, kwa sababu jina lake labaki mbele ya jua, tutambue makao yake yaliyowekwa katika jua. Tusipomwona bado Mwana wa pekee anayebaki katika Baba, tumkumbuke “bwana arusi akitoka chumbani mwake” (Zab 19,5). Ikiwa hatujaandaliwa kwenye karamu ya Baba yetu, tutambue hori la Bwana wetu Yesu Kristo.

I Yoh 1,2; 5,20

#### Kiitikizano:

**K.** Uzima ulidhihirika, nasi tumeuona; twawatangazia uzima wa milele, \* uliokuwa kwa Baba.

**W.** Nasi twajua kwamba Mwana wa Mungu amekwisha kuja, naye ametupa akili ili kumjua Mungu wa kweli. Nasi tumo ndani ya Mungu wa kweli na katika Mwanawe Yesu Kristo,

**K.** aliyekuwa kwa Baba.

## **JANUARI 6 (AU DOMINIKA KATI YA JANUARI 2 NA 8)**

### *Sherehe ya Epifania Au Tokeo La Bwana*

**SOMO LA KWANZA:** Isa 60, 1-22

Isa 60, 1. 3

#### Kiitikizano:

**K.** Ondoka, uangaze, ee Yerusalemu, kwa kuwa nuru yako imekuja: \* na utukufu wa Bwana utaonekana juu yako.

**W.** Na mataifa wataijilia nuru yako, na wafalme kuuja mwanga wa kuzuka kwako:

**K.** na utukufu wa Bwana utaonekana juu yako.

#### **SOMO LA PILI:**

Toka “Hotuba” za Mt. Leo Mkuu, papa.

### *Bwana ameonyesha wokovu wake ulimwenguni kote*

Uangalifu mfadhili wa Mungu, akiamua kusaidia kwenye nyakati za mwisho ulimwengu ulioelekea kwenye uharibifu, aliamua kwamba wokovu wa watu wote utekelezwa katika Kristo.

Hapo awali umeahidiwa kwa Abrahamu ukoo bila hesabu utakaozaliwa si kulingana na mwili, bali toka uzazi wa imani: huo umelinganishwa na uwingi wa nyota ili baba wa watu wote atarajie sio ukoo wa duniani, bali wa mbinguni.

Uingie, basi, katika familia ya mababu umati mkuu wa watu, na wana wa ahadi wapokee baraka kama ukoo wa Abrahamu, wakati kwa huo wanaukataa wana wa damu yake. Mataifa yote, waliowakilishwa na mamajusi watatu, wamwabudu Mwumba wa vyote na Mungu ajulikane sio tu katika Uyahudi, bali duniani kote, ili “katika Israeli jina lake ni kuu” (Zab 76,2)

Wana wapendwa, tukifundishwa hivyo na mafumbo haya ya neema ya Mungu, tuadhimishe katika furaha ya roho siku ya kuzaliwa kwetu na mwanzo wa wito kwa imani wa watu wote. Tumshukuru Mungu rahimu ambaye, kama anavyosema Mtume, “alitustahilisha kupokea sehemu ya urithi wa watakatifu katika nuru; naye alituokoa katika nguvu za giza, akatuhamisha katika ufalme wa Mwana wa pendo lake” (Kol 1,12-13). Aliyatangaza hayo Isaya: “Watu wa Mataifa waliokwenda katika giza, waliona nuru kuu na juu ya wale waliokaa katika nchi ya uvuli, nuru

imewaangaza” (Isa 9,1-2). Juu yao bado Isaya amwambia Bwana: “Mataifa wasiokujua watakuita na watu wasiokufahamu watakukimbilia” (Isa 55,5).

“Abrahamu aliiona siku hii, akafurahi” (Yn 8,56). Alifurahi alipojua kwamba wana wa imani yake wangebarikiwa katika ukoo wake, yaani katika Kristo, na alipoona kwamba kwa imani yake angepata kuwa baba wa mataifa yote. Alimpa Mungu utukufu, akiamini kabisa kwamba yote aliyoahidi Bwana, angeyatekeleza (Rum 4,20-21). Daudi aliambia siku hiyo akisema: “Mataifa yote uliowafanya watakuja, watakusujudia Wewe, Bwana, watalitukuza jina lako” (Zab 86,9); na pia: “Bwana ameufunua wokovu wake, machoni pa mataifa ameidhihirisha haki yake” (Zab 98,2).

Hayo yote, twajua, yametekelezwa wakati ambapo mamajusi watatu, walioitwa toka nchi zao za mbali, waliongozwa na nyota kujua na kusujudu mfalme wa mbingu na nchi. Nyota hiyo yatushauri kuiga utumishi aliofanya yeye, kwa maana kwamba twapaswa kufuata, kwa nguvu zetu zote, neema inayowaalika wote kwa Kristo. Katika jitihada hii, wapendwa wangu, mwapaswa wote kusaidiana. Hivyo mtang’aa kama wana wa nuru katika ufalme wa Mungu, ambamo zinaongoza imani halisi na matendo mema. Kwa Bwana wetu Yesu Kristo ambaye pamoja na Mungu Baba na Roho Mtakatifu anaishi na kutawala kwa karne na karne milele. Amen.

#### Kiitikizano:

- K. Katika siku hii ya mwanga alionekana Mwokozi wa dunia, aliyetangzwa na manabii na kushuhudiwa na malaika. \* Mamajusi waona nyota yake na, wakijaa furaha, wabeba zawadi.
- W. Siku takatifu yang’aa kwa ajili yetu: njoni mataifa, mwabudu Bwana.
- K. Mamajusi waona nyota yake na, wakijaa furaha, wabeba zawadi.

## **NOELI. BAADA YA EPIFANIA**

### **JANUARI 7 (AU JUMATATU BAADA YA EPIFANIA)**

**SOMO LA KWANZA:** Isa 61, 1-11

Isa 61, 1; Yn 8, 42

#### Kiitikizano:

- K. Roho ya Bwana i juu yangu: amenitia mafuta, amenituma ili niwapelekee maskini habari njema, na kuwaganga majeraha ya mioyo iliyovunjika, \* kuwatangazia watumwa uhuru na ukombozi kwa wafungwa.
- W. Nimetoka kwa Mungu na nimekuja ulimwenguni; sikuja kwa nafsi yangu, bali yeye ndiye aliyenituma.
- K. kuwatangazia watumwa uhuru, ukombozi kwa wafungwa.

#### **SOMO LA PILI:**

Toka “Hotuba”za mt. Petro Krisologo, askofu.

*Yule aliyetaka kuzaliwa kwa ajili yetu, hakutaka kusahaulika nasi*

Ingawa katika fumbo lenyewe la Umwilisho wa Bwana ishara za umungu wake zimekuwa daima dhahiri, hata hivyo sikukuu ya leo yatuonyesha na kutufunulia kwa njia nyingi kwamba Mungu alionekana katika mwili wa kibinadamu, ili maumbile yetu yenye kufa, yaliyofunikwa daima na giza, yasipoteze kwa kutojua yale yaliyostahili kupokea na kumiliki kwa neema.

Naam, yule aliyetaka kuzaliwa kwa ajili yetu, hakutaka kusahaulika nasi; na kwa hiyo ajidhihirisha kwa namna hii, ili fumbo hili kuu la utauwa lisipate kuwa nafasi ya udanganyifu.

Leo mamajusi wanaomtafuta mwenye kung'aa kati ya nyota, wampata anayelialia kwenye mahdi. Leo mamajusi wamwona wazi, akizungukwa na vitambaa, yule ambaye walifurahia kumtazama kwa njia ya giza katika sayari. Leo mamajusi watafakari kwa msahangao mkuu wanayoonna katika hori: mbingu imeshuka juu ya nchi, nchi imeinuliwa mpaka mbingu na yule ambaye ulimwengu mzima hamwezi kumshika, ameingizwa katika mwili mdogo.

Wakiona, waamini, wala hawajadili na wamtagaza kama alivyo kwa zawadi zao za kiishara. Kwa ubani, wamtambua kama Mungu, kwa dhahabu wamkubali kama mfalme, kwa manemane wadhihirisha imani katika yule atakayekufa.

Hivyo mpagani aliyekuwa wa mwisho amekuwa wa kwanza, kwa sababu imani ya mataifa ilizinduliwa na ile ya mamajusi.

Leo Kristo ameshuka kwenye mto wa Yordani ili kuosha dhambi za dunia. Yohane mwenyewe ashuhudia kwamba yeye alikuja hasa kwa hayo: “Tazama Mwanakondoo wa Mungu, aichukuaye dhambi ya ulimwengu” (Yn 1,29). Leo mtumishi anaye mikononi bwana, mwandamu Mungu, Yohane Kristo; amshika ili kupokea msamaha, si kwa kuitolea kwake.

Leo, kama Nabii anenavyo: “Sauti ya Bwana i juu ya maji” (Zab 28,3). Sauti gani? “Huyu ni Mwanangu, mpendwa wangu, ninayependezwa naye” (Mt 3,17).

Leo Roho Mtakatifu ashuka juu ya maji kwa mfano wa hua, ili, kama hua wa Nuhu alivyotangaza kwamba gharika kuu ilikwisha, vile vile kwa mfano wa huyo, tungefahamu kwamba maangamizi ya tangu awali ya ulimwengu yalikwisha, wala hakuleta kama yule tawi la mzeituni wa kale, bali alitoa uwingi wa krisma mpya juu ya kichwa cha baba mpya, ili yatekelezwe aliyonena Nabii: “Kwa hiyo Mungu, Mungu wako, amekupaka mafuta ya furaha kuliko wenzako” (Zab 45,7).

Leo Kristo aanzisha miujiza ya mbinguni, akibadili maji kuwa divai; ila maji yalipaswa baadaye kugeuka kuwa sakramenti ya damu, ili Kristo amwagie yule atakaye kunywa vikombe safi vya utimilifu vya neema yake. Yalitimizwa hivyo yaliyonenwa na Nabii: “Jinsi kilivyo safi kikombe changu kifurikacho” (Zab 23,5).

#### Kiitikizano:

- K. Vipawa vitatu safi mamajusi wamlimtolea Bwana, alama za fumbo lake: \* dhahabu, kwa mfalme mkuu; ubani, kwa kuhani mkuu; manemane, kwa Bwana kwa mazishi yake.
- W. Mamajusi wamwabudu horini mwanzilishi wa wokovu wetu, na toka hazina zao wamtotea vipawa vya kifumbo:
- K. dhahabu kwa mfalme mkuu; ubani kwa kuhani mkuu; manemane kwa Bwana kwa mazishi yake.

## **JANUARI 8 (AU JUMANNE BAADA YA EPIFANIA)**

**SOMO LA KWANZA:** Isa 62,1-12

#### Kiitikizano:

Isa 62, 2-3

- K. Mataifa wataiona haki yako, na wafalme wote watauona utukufu wako; \* nawe utaitwa jina jipya, litakalotajwa kwa kinywa cha Bwana.
- W. Nawe utakuwa taji ya uzuri katika mkono wa Bwana, na kilemba cha kifalme kuume kwa Mungu wako.
- K. Nawe utaitwa jina jipya, litakalotajwa kwa kinywa cha Bwana.

**SOMO LA PILI:**

Toka “Hotuba juu ya Epifania” ya Mt. Hipolito, mpresbiteri.

*Maji na Roho*

Yesu alikua kwa Yohane, akapokea ubatizo toka kwake. EE tukio lijazalo mshangao! Mto mkuu unaofurahia mji wa Mungu unaoshwa na matone machache ya maji. Chemchemi isiyokwama unamotoka uzima kwa watu wote na ni ya kudumu, yaingia kwenye maji kidogo na ya muda.

Yule aliye kote, wala hakosi po pote, yule ambaye malaika hawawezi kumfahamu na watu hawawezi kumwona, akaribia kupokea ubatizo kwa hiari. “Na tazama mbingu zikamfunikia na sauti kutoka mbingu ikisema: Huyu ni Mwanangu, mpendwa wangu, ninayependezwa naye” (Mt 3,17).

Yule apendwaye azalisha upendo, na mwanga usiomalizika wazalisha nuru isiyofikika. Huyu ni yule aliyeitwa mwana wa Yosefu, na ni mwanangu wa pekee katika maumbile ya kimungu.

“Huyu ni mwanangu, mpendwa wangu”: asikia njaa, yeye anayelisha idadi isiyohesabika ya viumbe; amegongwa na uchovu, yeye anayeimarisha waliochoka; hana pa kulaza kichwa chake, yeye anayetegemeza yote mikononi mwake; anaumwa yeye anayeponya kila maumivu; anapigwa yeye atoaye uhuru kwa ulimwengu; ajeruhiwa ubavuni yeye anayetengeza ubavu wa Adamu.

Lakini, nawasihi, nisikilizeni kwa makini: nataka kurudi kwenye asili ya uzima na kutazama chemchemi ya kila dawa.

Baba wa milele alimtuma ulimwenguni Mwana na Neno la milele, aliyekuja kati ya watu ili kuwaosha katika maji na katika Roho, na, kwa kutufanya upya mwilini na rohoni kwa uzima wa milele, alipuliza ndani mwetu Roho ya uzima akatuvika silaha zisizooza.

Ikiwa, basi, mwanadamu amepata kuwa asiyekufa, atakuwa pia mungu. Ikiwa katika maji na katika Roho Mtakatifu apata kuwa mungu kupitia kuzaliwa upya kwa ubatizo, baada ya ufufuko wa wafu ajipata kuwa pia mrithi pamoja na Kristo.

Kwa hiyo, mimi natangaza kama mjumbe: Njoni, makabila na mataifa yote kwenye uzima wa milele wa ubatizo. Haya ndiyo maji yaliyounganika na Roho Mtakatifu, ambaye kupitia kwake paradiso imemwagiliwa maji, ardhi yapata rutuba, mimea hukua, kila kiumbe hai kinazalisha uzima; na kwa kusema yote kwa maneno machache, ni maji ambayo kwayo mtu aliyezaliwa upya apokea uzima, mle Kristo alibatizwa, na pia alishuka kama hua Roho Mtakatifu.

Ashukaye na imani kwenye maji haya ya kufanywa upya, amkataa shetani na kujiunga na Kristo, amkana adui na atambua kwamba Kristo ni Mungu, aacha utumwa na kuvaa kuhesabiwa kuwa mwana, arudi toka ubatizo aking’aa kama jua na akitoa miali ya haki; lakini, na hayo ni ukweli mkubwa zaidi, arudi kama mwana wa Mungu na mrithi pamoja na Kristo.

Kwake utukufu na uwezo pamoja na Roho mtakatifu sana, mfadhili na mhuisha, kwa karne zote, sasa na milele. Amen.

**Kiitikizano:**

Yn 1, 32. 34. 33

**K.** Nimemwona Roho akishuka kama hua kutoka mbinguni; naye akakaa juu yake. Nimeona na natoa ushuhuda: \* huyu ni Mwana wa Mungu.

**W.** Yeye aliyenipeleka kubatiza kwa maji, aliniambia: Yeye ambaye utamwona Roho akishuka na kukaa juu yake, huyo ndiye abatizaye kwa Roho Mtakatifu;

**K.** huyu ni Mwana wa Mungu.

## JANUARI 9 (AU JUMATANO BAADA YA EPIFANIA)

**SOMO LA KWANZA:** Isa 63, 7-19

Kiitikizano:

Isa 63,19; 59,11

- K.** Tulikuwa kama watu usiowamiliki kamwe, kama watu wasioitwa jina lako: \* laiti ungepasua mbingu na kushuka!
- W.** Twatazamia haki, lakini hapana; na wokovu lakini u mbali nasi:
- K.** laiti ungepasua mbingu na kushuka!

**SOMO LA PILI:**

Toka “Hotuba” za Mt. Proklo, askofu wa Konstantinopoli.

*Kutakatifuza kwa maji*

Kristo alionekana ulimwenguni na, akitia utaratibu ulimwenguni katika fujo, aliufanya mzuri. Alichukua juu yake dhambi ya dunia, akaangamiza adui wa ulimwengu; akatakatifuza chemchemi za maji, akaangazia roho za watu. Kwa miujiza aliongeza miujiza daima mikubwa zaidi.

Leo nchi na bahari ziligawa kati yao neema ya Mwokozi, na ulimwengu mzima umejaa furaha, kwa sababu siku ya leo yatuonyesha idadi kubwa zaidi ya miujiza kuliko sikukuu iliyotangulia. Naam, katika sikukuu iliyopita ya Kuzaliwa kwa Bwana nchi ilifurahi, kwa sababu ilibeba Bwana katika hori; katika siku ya leo ya Epifania bahari yashangilia; yafurahi kwa sababu imepokea katikati ya Yordani baraka ya utakatifu.

Katika sikukuu iliyotangulia alionyesha kama mtoto mdogo, aliyedhihirisha kutokamilika kwetu; kwenye sikukuu ya leo twamwona kama mtu mpevu aonyeshaye yule aliye mkamilifu na kutoka kwenye mkamilifu. Kwenye siku ile mfalme alivaa zambarau ya mwili; katika hii chemchemi yazungusha mto na karibu kumvika. Inukeni, basi! Tazameni miujiza ya ajabu: jua la haki linalojiosa katika Yordani, moto ulioingia kwenye maji na Mungu anayetakatifuza na mtu.

Leo kila kiumbe aimba tenzi na kupaza sauti: “Abarikiwe ajaye kwa jina la Bwana” (Zab 118,26). Abarikiwe ajaye wakati wote, kwa kuwa haji sasa kwa mara ya kwanza... Naye ni nani? Nena wazi wewe, Daudi mbarikiwa: “Ni Bwana Mungu na alituangazia” (Zab 118,27). Wala si nabii Daudi tu amesema hayo, bali pia mtume Paulo amfanya mwangwi kwa ushuhuda wake na anena maneno hayo: “Neema ya Mungu iwaokoayo wanadamu wote imefunuliwa” (Tit 2,11). Si kwa wachache, bali kwa “wote”. Naam kwa wote, wayahudi na wayunani, atoa neema kombozi ya ubatizo, akiwatolea wote ubatizo kama fadhila ya wote.

Inukeni, angalieni gharika la ajabu, kubwa na la thamani zaidi kuliko lile lililokuja wakati wa Nuhu. Pale maji ya gharika yaliwaangamiza wanadamu; bali sasa maji ya ubatizo, kwa uwezo wa yule aliyebatizwa, yawaita wafu kwenye uzima. Wakati ule hua, akibeba kinywani tawi la mzeituni, alionyesha harufu nzuri ya manukato ya Kristo Bwana; bali sasa Roho Mtakatifu, akishuka kama hua, atuonyesha Bwana mwenyewe, akijaa huruma kwetu.

Kiitikizano:

- K.** Leo ametokea kwetu Kristo, mwanga wa mwanga, akibatizwa na Yohane katika Yordane. \* Sisi twamkiri Mwana wa Mungu, aliyezaliwa toka Bikira Maria.
- W.** Mbingu zilifunguka juu yake, wakati iliposikika sauti ya Baba.
- K.** Sisi twamkiri Mwana wa Mungu, aliyezaliwa toka Bikira Maria.

## JANUARI 10 (AU ALHAMISI BAADA YA EPIFANIA)

SOMO LA KWANZA: Isa 63,19 - 64,11

Kiitikizano:

Isa 56,1; Mik 4,9

K. Wokovu wako u karibu kuja, mji wa Mungu: kwa nini unayeyuka kwenye maumivu? Huna wa kukufariji, ili ujiache kuangamizwa na huzuni? \* Mimi nitakuokoa, asema Bwana, usiogope: nitakuja kukukomboa.

W. Mimi ni Bwana Mungu wako, Mtakatifu wa Israeli, mkombozi wako.

K. Mimi nitakuokoa, asema Bwana, usiogope: nitakuja kukukomboa.

**SOMO LA PILI:**

Tokea “Maelezo juu ya Mt. Yohane” ya mt. Sirilo wa Alesandria, askofu.

### *Ujio wa Roho Mtakatifu juu ya waumini wote*

Wakati yule aliyeutoa uzima ulimwengu alipoamua kwa tendo zuri ajabu, kukamilisha vitu vyote katika Kristo na alitaka kuongoza upya maumbile ya mwanadamu kwa hali yake asili ya heshima, alifunua kwamba angempatia, kati ya vipaji vingine, pia Roho Mtakatifu; haikuwezekana kwamba mtu angerudi vinginevyo kumiliki kwa muda mrefu mema yaliyopokelewa.

Mungu alipanga, basi, muda wa kushuka kwetu kwa Roho, na ni muda wa ujio wa Kristo, anaotutangazia akisema: “Siku zile”, yaani, katika muda wa Mkombozi wetu, “Nitamwaga Roho yangu juu ya kila kiumbe” (Yoe 3,1).

Wakati saa ya huruma ya ajabu ya Mungu ilipoleta duniani kati yetu Mwana pekee katika maumbile ya kibinadamu, yaani mtu aliyezaliwa toka mwanamke, kulingana na utabiri wa Maandiko Matakatiifu, yule aliye Mungu na Baba alitoa tena Roho, akaipokea kwanza Kristo, kama limbuko la maumbile ya kibinadamu yaliyofanywa upya kabisa. Ayashuhudia nayo Yohane asemapo: “Nimemwona Roho akishuka kutoka mbinguni; naye akakaa juu yake” (Yn 1,32).

Kristo alipokea Roho kama mwanadamu na kama ilivyokuwa inafaa kwa mtu kuipokea. Mwana wa Mungu, aliyetoka kwa Baba, akibaki na asili moja naye, na kuwepo kabla ya kuzaliwa kwake kibinadamu, na hata kabla ya nyakati, hachukii kwamba Baba, baada ya kuzaliwa kwake katika umbile la kibinadamu, amwambie: “Ndiwe mwanangu, Mimi leo nimekuzaa” (Zab 2,7).

Baba anena kwamba yule aliye Mungu kabla ya nyakati na hutoka kwake, amezaliwa leo, akimaanisha kwamba katika Kristo alitukaribisha sisi kama wanawe. Naam Kristo, kwa kuwa alijifanya mtu, alichukua ndani mwake hali yote ya kibinadamu. Baba anaye Roho yake mwenyewe na kumpa tena Mwanawe, ili hata sisi tumpokee toka kwake kama utajiri na chemchemi ya fadhila.

Kwa sababu hiyo, yeye alitaka kushiriki ukoo wa Abrahamu, yanenavyo katika Maandiko, na katika yote amejifanya sawa nasi ndugu zake.

Mwana wa pekee hakupokea, basi, Roho kwa ajili yake mwenyewe; naam, Roho ni Roho wa Mwana, na yumo ndani mwake, na ametolewa kwake, kama tulivyosema: lakini kwa kuwa, akijifanya mtu, Mwana alikuwa ndani mwake na maumbile yote ya kibinadamu, alipokea Roho ili kumfanya mtu upya kabisa na kumrudisha kwenye ukuu wake wa asili.

Tukitumia, basi, hekima ya akili na kutegemea maneno ya Maandiko Matakatiifu, tuelewe kwamba Kristo alikuwa na Roho si kwa jili yake mwenyewe, bali kwa ajili yetu; naam, kila fadhila huja kwetu kupitia kwake.

Kiitikizano:

Eze 37, 27-28; Yer 31, 31; Ebr 8, 8

- K. Nami nitakuwa Mungu wao, nao watakuwa watu wangu. Patakatifu pangu patakapokuwa katikati yao milele, mataifa watayajua: \* mimi ni Bwana, anayetakatifuza Israeli.
- W. Nitafanya na nyumba ya Israeli na nyumba ya Yuda agano jipya:
- K. mimi ni Bwana anayetakatifuza Israeli.

**JANUARI 11 (AU IJUMAA BAADA YA EPIFANIA)****SOMO LA KWANZA:** Isa 65,13-25Kiitikizano:

Ufu 21, 1.3.4

- K. Niliona mbingu mpya na nchi mpya, nikasikia sauti kubwa: \* Tazama maskani ya Mungu pamoja na wanadamu: naye ataishi pamoja nao
- W. Naye atafuta kila chozi katika machoyao; wala mauti haitakuwapo tena: mambo ya kwanza yamekwisha kupita.
- K. Tazama maskani ya Mungu pamoja na wanadamu.

**SOMO LA PILI:**

Toka "Hotuba" za Mt. Massimo, askofu wa Torino.

*Sakramenti za Ubatizo wa Bwana*

Injili yasimulia kwamba Yesu alikuja kwenye Yordani ili kubatizwa na katika mto ule alitaka kutakatifuza na miujiza ya mbinguni. Akili yadai kwamba sikukuu hii ifuate ile ya kuzaliwa kwa Bwana, kwa sababu matukio yote mawili yalitukia wakati ule ule hata ikiwa kwa umbali wa miaka. Kwa hiyo naamini kwamba sikukuu hii yapaswa kuitwa pia Kuzaliwa kwa Bwana.

Kwenye siku tunayoita ya Kuzaliwa kwa Bwana, yeye alizaliwa kati ya watu, leo yeye amezaliwa upya katika dhihirisho la kimungu; siku ile alizaliwa toka bikira, leo amezaliwa katika fumbo. Kabla, akizaliwa kama mtu, ameshikwa kifuani mwa Maria; sasa, akizaliwa kulingana na fumbo, amezungukwa na sauti ya Baba asemaye: "Huyu ni mwanangu, ninayependezwa naye: msikieni yeye" (Mt 17,5). Mama ambembeleza mwanaye kwa upole kifuani mwake; Baba amtolea Mwana ushuhuda wa upendo; Mama amtolea kwa mamajusi ili wamwabudu, Baba amfunulia kwa mataifa ili wamheshimu.

Leo, basi, Bwana Yesu alikuja kwenye ubatizo na alitaka kwamba mwili wake mtakatifu uoshwe na maji. Lakini mtu angeweza kuuliza kwa nini yeye aliye mtakatifu alitaka kubatizwa. Sikiliza kwa nini: Kristo hakutaka kubatizwa ili kutakatifuza na maji, bali ili kuyatakatifuza yeye mwenyewe, kusudi, alipotakaswa yeye, angekuwa yeye kutakasa maji aliyogusa. Kuwekwa wakfu kwa Kristo ni kuwekwa wakfu rasmi kwa maji. Wakati anapooshwa Mwokozi, hapo yatakaswa maji yote ili kufaa kwa ubatizo wetu na kuyasafishwa chemchemi ili neema ya kuoshwa igawanywe kwa mataifa ya baadaye. Kristo, basi, alijitoa kwa ubatizo akitutangulia, ili mataifa ya kikristo wampate nyuma kwa tumaini.

Naingia katika fumbo: kwenye mtazamo huu, nguzo ya moto iliwatangulia wana wa Israeli kupitia Bahari ya Shamu ili wakabili njia bila hofu: ilitangulia mbele kwenye maji ili kuandaa



mpito nyuma yake kwa wale waliofuata. Tukio hili, kama anenavyo Mtume, lilikuwa ishara ya ubatizo. Kwa namna fulani, ulikuwa ubatizo halisi ambamo wingu lilifunika watu, maji yaliwabeba.

Lakini hayo yote anayatekeleza Kristo mwenyewe ambaye, kama wakati ule aliwatanguliza kwenye bahari wana wa Israeli katika nguzo ya moto, hivyo sasa kwenye nguzo ya mwili wake, tukitumia mfano ule ule, anawatanguliza katika ubatizo mataifa ya kikristo. Nguzo, nasema, iliyoangazia macho ya wale waliofuata, yatolea sasa mwanga kwa mioyo ya wale wanaoamini; wakati ule ilifunguliwa njia salama kati ya mawimbi, sasa zinasalimishwa hatua katika kuoshwa kwa imani.

### Kiitikizano

Yn 1, 29; Isa 53, 11

**K.** Yohane alimwona Yesu anakuja kwake, akasema: Tazama, Mwanakondoo wa Mungu; \* ndiye aichukuaye dhambi ya ulimwengu.

**W.** Mtumishi wangu mwenye haki atawafanya wengi kuwa wenye haki, naye atachukua maovu yao:

**K.** ndiye aichukuaye dhambi ya ulimwengu.

## **JANUARI 12 AU JUMAMOSI BAADA YA EPIFANIA**

**SOMO LA KWANZA:** Isa 66,10-14. 18-23

### Kiitikizano:

Isa 66,18.19; Yn 17,6.18

**K.** Nitakuja na kukusanya mataifa yote na lugha zote: \* watauona utukufu wangu na kuutangaza kwa mataifa.

**W.** Jina lako nimewadhihirishia watu wale ulionipa katika ulimwengu: kama vile ulivyonituma, nami vivyo hivyo naliwatuma:

**K.** watauona utukufu wangu na kuutangaza kwa mataifa.

### **SOMO LA PILI:**

Toka “Hotuba” za Fausto wa Riez, askofu.

### *Arusi za Kristo pamoja na Kanisa*

“Siku tatu baadaye palikuwa na arusi” (Yn 2,1). Arusi hizi ni nini isipokuwa tamaa na furaha za wokovu wa kibinadamu? Naam, wokovu unaadhimishwa katika mfano wa namba tatu: au kwa kuungama Utatu mtakatifu, au kwa imani ya ufufuko, uliotukia siku tatu baada ya kifo cha Bwana.

Kuhusu mfano wa arusi tukumbuke kwamba, pengine katika Injili, mtoto aliye kijana zaidi alikaribishwa aliporudi kwa musiki na michezo, kati ya mavazi ya fahari ya arusi, kwa kuonyesha uongovu wa mataifa ya kipagani.

“Kama bwana arusi akitoka chumbani mwake” (Zab 19,6). Kristo alishuka duniani ili kujiunga na Kanisa kupitia umwilisho wake. Kwa Kanisa hili lililokusanywa kati ya watu wa mataifa, yeye alitoa dhamana na ahadi. Dhamana ukombozi wake; ahadi, uzima wa milele. Kwa hiyo, hayo yote yalikuwa mwujiza kwa aliyeona na fumbo kwa yule aliyefahamu.

Naam, tukitafakari kwa undani, tutaelewa kwamba katika maji yenyewe, inatolewa aina fulani ya mfano wa ubatizo na ufufuko. Kitu kinapobubujika toka kingine kwa mfumo wa ndani au wakati kiumbe cha chini kinapelekwa kwa uongofu wa siri kwenye hali ya juu, twajipata mbele ya kuzaliwa upya. Maji yamegeuka ghafula, nayo baadaye yatageuza watu.

Huko Galilaya, basi, kwa kazi ya Kristo, maji yageuka kuwa divai; sheria yatoweka, huja neema; kivuli kinatoka, waingia ukweli; mambo ya duniani yakabiliwa na yale ya kiroho; matendo ya kale yaacha nafasi kwa Agano Jipya.

Mtume mbarikiwa anena: “Ya kale yamepita, tazama, yote ni mapya” (2 Kor 5,17). Kama maji yaliyokuwemo katika mabalasi hayapotezi kitu cha yale yaliyokuwepo na yaanza kuwa yale yasiyokuwepo, hivyo Sheria haikupunguzwa na ujio wa Kristo, bali ilikamilishwa, kwa kuwa toka huo ilipata utimilifu wake.

Ikikosa divai, divai nyingine yahudumiwa; divai ya Agano la Kale ni nzuri; lakii ile ya Agano Jipya ni bora zaidi. Agano la Kale wanalolitii Wayahudi, lamalizika katika herufi; Agano jipya tunalotii sisi, larudisha onjo la neema. Divai “nzuri” ni amri ya Sheria isemayo: “Umpende jirani yako na umchukie adui yako” (Mt 5,43), lakini divai ya Injili iliyo “bora zaidi” yasema: “lakini mimi nawaambia: Wapendeni adui zenu, watendeni mema wanaowaudhi” (Mt 5,44).

#### Kiitikizano:

Tob 13,11.13-14; Lk 13,29

- K. Mji wa Mungu, utang’aa kama mwanga wa ajabu kwa miisho yote ya dunia: mataifa mengi yatakujia toka mbali; \* wakibeba zawadi watamwabudu Bwana ndani mwako.
- W. Nao watakuja toka mashariki na magharibi, na toka kaskazini na kusini;
- K. wakibeba zawadi watamwabudu Bwana ndani mwako.

## **DOMINIKA BAADA YA EPIFANIA**

### *Ubatizo Wa Bwana*

**SOMO LA KWANZA:** Isa 42, 1-9; 49,1-9

#### Kiitikizano:

Mt 3,16. 17; Lk 3,22

- K. Leo Bwana amebatizwa katika Yordani: mbingu zimefunguka, ashuka juu yake Roho Mtakatifu, na sauti ya Baba yasikika: \* Huyu ni Mwanangu, mpendwa wangu, ninayependezwa naye.
- W. Roho Mtakatifu alishuka juu yake akionekana kama hua, na sauti ikatoka mbinguni:
- K. Huyu ni Mwanangu, mpendwa wangu, ninayependezwa naye.

#### **SOMO LA PILI:**

Toka “Hotuba” za mt. Gregorio Nazianzeno, askofu.

### *Ubatizo wa Yesu*

Kristo katika Ubatizo alijifanya mwanga, tuingie nasi katika uangavu wake; Kristo alipokea ubatizo, na tuingie naye ndani ili kuweza kupanda pamoja naye kwenye utukufu.

Yohane atoa ubatizo, Yesu akaribia naye, labda kwa kutakatifuza yule ambaye ambatiza majini, bali hakika kwa kuzika majini mtu wa kale. Aitakatifuza Yordani kabla ya kutakatifuza sisi na aitakatifuza kwa ajili yetu. Na kwa kuwa alikuwa roho na mwili atakatifuza katika Roho na maji.

Mbatizaji hakubali ombi, bali Yesu asisitiza.

“Mimi nahitaji kubatizwa na wewe” (Mt 3,14), hivyo anena taa kwa jua, sauti kwa Neno, rafiki kwa Bwana arusi, yule aliye mkuu kati ya waliozaliwa na mwanamke kwa yule aliye mzaliwa wa kwanza wa kila kiumbe, yule ambaye tumboni mwa mamaye aliruka kwa shangwe kwa yule

ambaye, hata akijificha tumboni mwa mama, alipokea ibada yake, yule aliyetangulia na ambaye angetangulia bado kwa yule aliyeonekana tayari na atakayeonekana kwa wakati wake.

“Mimi napaswa kupokea ubatizo toka kwako” na, aongeza bado, “kwa jina lako”. Naam, alijua kwamba angpokea ubatizo wa shahidi au, kama Petro, angeoshwa sio miguuni tu.

Yesu anatoka kwenye maji na abeba pamoja naye juu ulimwengu wote. Aona kupasuka na kufunguka mbingu, zile mbingu ambazo Adamu alijifungia kwake na kwa ukoo wake wote, zile mbingu zilizofungwa na kuzibwa kama paradiso na upanga wa moto.

Na Roho ashuhudia umungu wa Kristo: ajitambulisha kama mfano juu ya Yule aliye sawa naye. Sauti yatoka kwenye undani wa mbingu, toka ule undani ambamo alitoka Yule ambaye wakati ule alipokea ushuhuda.

Roho aonekana wazi kama hua na, hivyo, amheshimu pia mwili wa kimungu na, basi, Mungu. Haisahauliki kwamba, muda mrefu kabla, alikuwa pia hua aliyetangaza mwisho wa gharika kuu.

Tuuheshimu, basi, siku hii ubatizo wa Kristo, na twaadhimishe kama ifaavyo sikukuu hii.

Jitakaseni kabisa na msonge mbele katika usafi huu. Mungu hafurahii kitu kamwe kama uongofu na wokovu wa mtu. Naam, kwa mwanadamu yametamkwa maneno yote ya Mungu na kwa ajili yake yametekelezwa mafumbo yote ya ufunuo.

Yote yalifanyika ili mpate kuwa kama jua, yaani, nguvu ya uhai kwa watu wengine. Mwe nuru kamili mbele ya ile nuru kuu. Mtafurikwa na mwangavu wake wa pita-maumbile. Itawafikia kwenu, safi na moja kwa moja, nuru ya Utatu mtakatifu, ambayo, mpaka sasa, mlipokea mwali mmoja tu, ukitoka Mungu wa pekee, kupitia Yesu Kristo Bwana wetu, ambaye kwake ziende utukufu na uwezo milele na milele. Amen.

#### Kiitikizano:

**K.** Leo mbingu zafunguliwa, maji ya bahari yamekuwa matamu; nchi yashangilia, vilima vyatetemeka kwa furaha: \* Kristo amebatizwa na Yohane katika Yordani.

**W.** Una nini bahari, ili ukimbie? Nawe Yordani, ili urudi nyuma?

**K.** Kristo amebatizwa na Yohane katika Yordani.